

1. 29
1. 29

V I A
COMPENDII
A D D E V M

PER MOTVS ANAGOGICOS,
& orationes jaculatorias.

LIBER ISAGOGICVS
ad mysticam Theologiam.

Auctore D. IOANNE BONA
Congregat. Reformata S. Bernardi Or-
dinis Cisterc. Abbate Generali, sacra-
rum Congregationum Rituum & Indi-
cis Consultore.



Ermitar
Camaldulens.
Montis Reg.
prope
Warsavia

PARISIIS,
Apud FREDERICVM LEONARD, viâ
Iacobzâ, sub insigne Scuti Veneti.

M. DC. LXII.
CVM PRIVILEGIO REGIS.

COMPENDII AD DEVM

PER MOTVS ANAGOGICOS
 & orationes iactationes.
 LIBER ISAGOGICVS
 ad mysticam Theologiam.
 Auctore D. IOHANNIS BONAE
 Congregat. Reformatae & Benedictinae
 Ordinis Cister. Abbatis Generalis, sacra-
 rum Congregationum Rituum & Indi-
 cis Consultore.



PARISIIS
 Apud THEOPHILUM LEONARDUM, vii
 Jacobus, sub insigni sancti Vincentii.
 M. DC. LXXII.
 CVM PRIVILEGIO REGIS.

Bien. B. VII. 24



SS. DOMINO NOSTRO
ALEXANDRO VII.
SYMMO PONTIFICI
IOANNES BONA F.




*Xiguum hoc mu-
nus, BEATISS.
PATER, pedibus
tuis aduoluere demississi-
ma veneratione ausus
sum, post diuturnam flu-
ctuantis animi trepida-*

tionem. Vt enim me alliebat Sanctitatis Tua dudum nota benignitas; ita multum deterruit Augustissima dignitatis, qua proximè ad Deum accedis, veneranda Majestas. Vicit tandem incertum quid consilij caperem incomparabilis clementia Tua: nam me prorsus immerentem, & nihil tale cogitantem è celsissimi throni fastigio respicere, ad conspectum Tuum

euocare, & honoribus au-
gere dignatus es ; ut iam
ambigere nefas sit , quin
eadem humanitate , qua
me excipere voluisti , &
hunc minimum ingenij
mei foetum prosequaris.
Accedit argumenti San-
ctitas , ob quam futurum
confido , ne tibi prorsus
displiceat hac qualiscun-
que lucubratio. Viam
enim describo , quam Tu
feliciter cucurristi , quam
è specula Apostolici cul-

minis toti orbi Christiano
demonstras , quam te au-
spice arripient omnes , qui
Diuinitatis illapsu digni
fuerint. Et quia Isagogen
hîc trado ad Mysticam
Theologiam , felicitatis
meae erit , si Tuo praesidio
munita in lucem prodeat.
Paucis siquidem nota my-
steria à profanorum cri-
minationibus Tua aucto-
ritate tueberis : eisque fi-
dem , quam imperiti ab-
negant , Tuâ experientiâ

conciliabis. Deus Optimus
Maximus diu Te seruet
incolumem, SANCTISS.
PATER : & Pontificium
Tuum omni honore, &
virtute locupleter.



PRÆFATIO *ad Lectorem.*

MUltum luctatus sum ,
Christiane Lector , me-
cum cogitans , & animo voluens ,
quidnam potissimùm in hoc ve-
stibulo tecum colloquerer. Diu
tamen cogitanti nihil occurrit,
nisi vt plurimam tibi salutem ex
imis sensibus optem; quæ vtinam
per hunc Librum vera & æterna
tibi contingat. In hoc voto sistere
satius est , quàm te prolixa præfa-
tione grauare : quicquid enim
addidero quid erit? An fauores
tuos , & laudes captem? Parce,
ista non ambio. An tuam saltem
beneuolentiam exquisitis verbo-

rum flosculis conciliem? Hoc non fit verbis, sed mutuis officiis, & beneficiis. An de usu & praxi huius Opusculi documenta præscribam? Congererem inutiliter, quæ infra suis locis utilius leges. An materiæ utilitatem, & præstantiam extollam? Iam ex titulo & prospectu intellexisti nihil melius fore, quàm citò ad Deum peruenire. An formam, stylum, & dicendi characterem, quod plerique solent, excusem? Neglexi hæc lenocinia, Manilij versum sequutus, [Ornari res ipsa vetat, contenta doceri.] An studium meum prædicem, & laborem, qui multus fuit? Pietati scripsi, non pompæ. An te de scopo instituti Operis præmoneam? Frustra, quia in limine primi capitis descriptus est. An aduersus maledicos, & obrectatores tuum implorem patrociniū? Non est

neceſſe, nam ſperno & fugio hoc
genus hominum; quòd ſi non
effugio, cauſa Dei hîc agitur, ip-
ſe tuebitur, & iudicabit. An pro
terminis & phraſibus myſticis
præmittam Apologeticon? Nec
quidquam: à vocibus enim ob-
ſcuris abſtinui, vel ſi quas mate-
ria exigēte intermiſcui; non mea,
ſed rerum hæc culpa eſt, quæ
non aliter tractari poſſunt. An
objectiones præoccupem, qui-
bus conuelli ſtudium meum po-
teſt, & audacia reprehendi? Non
admittunt hæc paginæ talem le-
ctorem qui velit contentioneſ
deſeruire, & clareſcere inimi-
ciſ. Tum vltro ipſe fateor me
rem ſublimem, non meâ, ſed
alienâ experienciâ edoctum ſcri-
piſſe; ſicut ſcriptum eſt: [Cre-
didi propter quod locutus ſum.]
Addo ſolatium meum eſſe de
perfectiōe diſſerere, inſtar lan-

guentium, qui cūm vacent à fa-
nitate, de bonis eius tacere non
norunt. Denique generosa res
est in altum conari. Quæ causa
igitur mihi est, vt te sine fructu
hīc morer? Nulla, nisi vt Deum
ames, & ad eum properes, eius-
que gratiam mihi concilies: ne
in semita immobilis hæream,
dum aliis ad metam festinanti-
bus viam ostendo. Vale.





ORDO , ET INDEX CAP.

CAP. I. *Scopus, & usus libri. Pro scriptione, & fine ad Deum oratio. Duplex via, qua itur ad Deum. Vtriusque discrimina,* pag. 1.

CAP. II. *Viam mysticam duplicem esse, actiuam & passiuam. Quid utraque sit. Cupienti ad apicem mysticae Theologiae peruenire omnia relinquenda,* 6.

CAP. III. *Mystica Theologia quid sit. Quomodo differat ab aliis scientiis. An cognita fuerit antiquis Platoniciis. Eius principium, & scopus,* 12.

CAP. IV. *Quae sint dispositiones ad mysticam Theologiam: Quae eius impedimenta: Qui ad ipsam discendam incapaces,*

qui magis idonei. Oratio & gratiarum actio, 18.

CAP. V. Quid sit unio mystica: Quomodo fiat: Qui eius effectus: Quid incapacibus & ignavis conferat lectio mystice Theologie: Transitus ad Aspirationes, 26.

CAP. VI. Aspirationes, motus Anagogici, orationes jaculatorie quid sint: Sententiis, & exemplis Sanctorum Patrum approbantur: De illarum prestantia, & utilitate, 34.

CAP. VII. Varia documenta pro usu & praxi Aspirationum, 47.

CAP. VIII. Qui sint fontes Aspirationum, quæ materia, quis ordo: De triplici statu Incipientium, Proficientium, & Perfectorum, 63.

CAP. IX. Transitus ab aspirationibus ad Contemplationem, Addita quadam de Aspiratione

*passiva: Quid sit Contemplatio:
Eius obiectum, & causa, 74.*

CAP. X. *Indicantur auctores,
qui de Contemplatione scripse-
runt: Quotuplex ea sit: Qui
eius gradus & status: Exempla
diutinae probationis, & patien-
tia in desolatione: Diuisio ani-
mae, & potentiarum eius secun-
dum mysticos Hymnus ad Deum,
88.*

CAP. XI. *Gemitus animae peni-
tentis pro incipientibus, 113.*

CAP. XII. *Pia desideria ad vsum
Proficientium, 129.*

CAP. XIII. *Suspiria amantis ani-
mae pro perfectis, 145.*

CAP. XIV. *Laudem virtutis in
actione consistere: Actus diuersa-
rum virtutum, 165.*

CAP. XV. *Fasciculus Aspiratio-
num ad Iesum, ad Beatam Vir-
ginem, ad Caelites vniuersos,
183.*

CAP. XVI. *Aspirationes ex Nomini-
bus Dei, eiusque attributis,
& perfectionibus,* 193.

CAP. XVII. *Vitam Christi esse
fontem omnium bonorum: Quo-
modo ex ea p̃i affectus elician-
tur,* 222.

CAP. XVIII. *Ex qualibet re, quæ
occurrit, motus anagogicos elici
posse: Scale à visibili creatura
ad invisibilem creatorem,* 246.

CAP. XIX. *Diarium & Syluula
aspirationum pro omni actione
diei, & pro qualibet occasione,*
254.

CAP. XX. *De Amore Dei:
Quid sit Amor: Eius origo, præ-
rogatiua, & proprietates. Amo-
ris Philosophia à quibus discen-
da: Posse Deum facilius amari,
quàm cognosci,* 291.





CENSURA REVERENDISS. P.

*Magistri Fratris Michaëlis de
Alcātara Vicarij Generalis Ita-
lia, & Sicilia, & Procuratoris
Generalis totius Ordinis Beate
Mariæ de Mercede Redemptio-
nis Captiuorum Sanctæ Inqui-
sitionis in Hispania Qualifica-
toris, & Sacre Congregationis
Indicis in Vrbe Consultoris.*

I Vssu Reuerendiss. P. Fr. Ray-
mundi Capizucchi S. A. P.
Magistri, Ord. Prædicatorum,
vidi librum istum, cuius titulus
est: *Via Compendij ad Deum*, Au-
ctore Reuerendiss. P. D. Ioanne
Bona de Monte regali Congreg.
S. Bernardi, Ordinis Cisterciens-
is Abbate Generali, ipsumque
cum magna animi voluptate (vti-
nam fructu) perlegi, & præter-

quam nihil in eo reperi Catholi-
cæ nostræ Fidei, aut bonis mo-
ribus non conforme, iudico il-
lum spiritualis vitæ amatoribus
vtilissimum fore, in eo enim mi-
ro modo, ac singulari methodo
digestum traditur quidquid in
hac materia sparsim congestum
est à Sanctis Patribus, & aliis ar-
canæ huius Theologiæ professo-
ribus, quos omnes Bonus Au-
ctor magno studio, ac maiori ex-
perientia percurrisse videtur, vt
de illo verificari possit quod jux-
ta Magnum Gregorium homil 5.
super Ezech. de perfectis viris
post contemplationem suam re-
deuntibus dicitur P sal. 144. *Me-
moriæ suauitatis tuæ eruſta-
bunt:* Eruſtat equidem, quæ dul-
citer hausit, & sapienter docet,
quæ vſu didicit, simulque adeò
efficaciter mouet, ac jucundè de-
lectat, vt quamplures profectus

ex huius Operis lectione in Dei
obsequium sperari possint. Qua-
re dignissimum censeo, vt typis
mandetur, ac in lucem prodeat.
Romæ in hoc Conuentu S. Ha-
driani Ordinis B. Mariæ de Mer-
cede Redemptionis Captiuorum
die 26. Iulij 1657.

Fr. Michaël de Alcantara.

Imprimatur si videbitur Reue-
rendiss. P. Mag. Sac. Pal. Ap.

M. A. Oddus Episc. Ierap. Vicesg.

Imprimatur Fr. Raymundus Ca-
pisuccus Magister Sacri Pala-
tij Apostolici, Ord. Præd.



VIA

Dei
qua-
typis
eat.
Ha-
ler-
um


a.

ue-
Ap.

esg.

Ca-
ala-

IA






V I A
COMPENDII
AD DEVM

PER MOTVS ANAGOGICOS,
& ignitas aspirationes.

C A P V T I.

Scopus, & vsus libri. Pro scriptione,
& fine ad Deum Oratio. Duplex
via, qua itur ad Deum. Vtriusque
discrimina.

I.  I T Æ sanctioris
viam nosse volenti-
bus breui compen-
dio indicare propo-
situm mihi est, non meis, sed vete-
rum Patrum monitis, ac documen-
tis. Vsus erit huius Libelli, vti spero,
non inutilis, nec iniucundus. Nam

A

2 VIA COMPENDII

cum plerisque longum iter ad Deum, plenumque sentibus videatur, haurient fortasse animo non modicam voluptatem, cum viam sibi facillimam, sed vulgo ignotam, proponi animaduernerint, à qua labor absit, & longitudo. Nec erit hæc via scandalum mihi docenti, & non facien-

Clem. ti: nam, vt quidam vir sapiens scri-
Alexad. bit, *Docens aliquis plus discit, & di-*
x. Strō. *cens sæpè vna audit cum ijs qui ipsum*
audiunt: vnus est enim magister &
eius qui discit, & eius qui audit, qui
& mentem irrigat, & rationem. Dirigens ergo pedes aliorum in viam pacis, & ipse incipiam ab omni via mala prohibere pedes meos: & cum perfecero gressus audientium me in semitis Dei; sequar ego, & exultabo sicut gigas ad currendam viam, quæ me ad verticem montis, ad tertium cælum, ad caliginem, in qua Deus habitat, recto itinere vel pertrahat, vel perducatur.

2. Sed quia socordia depressus, & mundi huius simulacra circumferens assurgere ad eum, qui posuit renebras latibulum suum, sine ipso

non possum; orationem præmittere par est, vt scientiarum Dominus, ductorque viæ ad supernaturalem illapsum, lumenque arcanum cor meum aperire, & mentem eleuare dignetur.

Tu Domine, qui corda nosti omnium, dirige me ad mysticorum oraculorum lucidissimum, indemonstrabile, & summum fastigium: vbi simplicia & immutabilia Theologiæ mysteria aperiuntur in caligine splendidissima silentij arcana docentis, quæ in summè tenebricosa obscuritate clarissimè superelucet, & pulcherri-
mis splendoribus mentes oculis captas superadimplet. Hic enim est scopus, hæc meta votorum meorum ad te peruenire principium & finem meum, & optatissimum centrum animæ meæ.

3. Duplex autem est via, per quam
itur ad Deum, vt summi viri asseue-
rant. Vnam vocant scholasticam, &
communem: alteram mysticam, &
secretam. Vtraque est donum cœle-
ste desursum descendens à Patre lu-
minum, sed multiplex inter vtram-

Ex
Dion.
Areop.
c. l.
myst.
Theo-
log.

Harph.
lib. 1. p.
2. cap.
48. &
lib. 2. p.
3. cap.
30. & p.
5. collat.

4 VIA COMPENDII

myst.
Theol.
Victor.
Gele-
nius in
summa.
pract.
myst.
Theol.
part. I.
decif. I.
art. 3.

que intercedit discrimen. Illa humanum studium, & inquisitionem requirit, paucisque conuenit altiori præditis literatura; hæc vbique, semper, & ab omnibus haberi potest. Illa speculatiua, hæc practica. Illa propriè in intellectu; hæc in voluntate sita est. Illa exposita illusionibus, superbæ, & curiositati, habet vnde timeat; hæc tutò ac simpliciter ambulat, nihil quærens præter Deum. Illa naturaliter cum phantasia & discursu operatur; hæc supernaturaliter cum pura & simplici intelligentia. Illa à scientia acquisita; hæc à donis infusis Spiritus sancti procedit. Illa angusta est, limites non excedens humanæ speculationis; hæc cor dilatat ad infinita, & omnem modum naturalis cognitionis transcendit. Illa longa, laboriosa, & difficilis: hæc breuis, expedita, & facillima est. Illa ab infimis incipiens, à prauorum scilicet habituum extirpatione, & tumultuantium affectionum moderatione, per studium virtutum, & vitæ actiuæ officia ad apicem perfectionis ascendit: hæc admirabili circulo ab amo-

AD DEVM, CAP. I. 5

re incipiens ad amorem progreditur,
& definit in amore per motus ana-
gogicos, & flammigeras aspirationes.

Est enim amor, vt Plato etiam co-
gnouit, circulus à bono in bonum per-
petuò reuolutus. Illam alibi^e, Deo du-
ce, edocui: hanc breuiter hîc trade-
re animus est. Sed iterum ad Deum
preces, vt mentem, & manum diri-
gat, & cor amore inflammet; occulta
enim ipsius meliùs amando, quàm
ratiocinando intelliguntur, & ex-
plicantur.

Spiritus superûm decus,

Sancta fiderea domus

Aura labere cœlitus,

Aura sacra, ter optimi

Dia flaminis aura.

Spiritus radians veni,

Terror agminis inferi,

Efficax hominum salus,

Aura sacra, ter optimi

Dia flaminis aura.

Alma lux sapientia,

Dulcis hospita mentium,

Cordis ardor amabilis,

Ima pectoris occupa

Ignē, pectus adure.

In con-
uiuio,
vbi do-
ctè &
fuse de
amore.

^eIn mea
ad cœ-
lum
Manti-
ductio-
ne.

Ex
Hymno
elegant.
Vrbani
VIII. ad
Spiritu
sanctū.

*Fausta nuntia gaudij,
 Flamma prouuba gratia,
 Sancta lux animi veni,
 Aura sacra, ter optimi
 Dia flaminis aura.*

CAPVT II.

*Viam mysticam duplicem esse actiuam,
 & passiuam. Quid utraque sit. Cu-
 pienti ad apicem mystica Theologia
 peruenire omnia relinquenda.*

1. **O** Missâ igitur viâ Scholasticâ de
 sola mystica agendum est. Hæc,
 vt docet Dionysius Cartusianus ^a
 Doctor extaticus, duplex est, acti-
 ua & passiuâ. Colligitur hæc diuisio
 ex Magno Dionysio Areopagita, ^b
 qui ad Timotheum sic scribit. Tu
 verò, care Thimothee, in mysticis con-
 templationibus, intenta exercitatione
 & sensus relinque, & intellectuâles
 operationes, & sensibilia, & intelli-
 gibilia omnia, & ea quæ sunt & quæ
 non sunt vniuersa, vt ad vniõnem
 eius, qui supra essentiam & scientiam

^a Lib.
 de fon-
 te lucis.

^b Myst.
 Theol.
 c. i.

AD DEVM, CAP. II. 7

est, quantum fas est, indemonstrabiliter assurgas; siquidem per liberam & absolutam, & puram tui ipsius à rebus omnibus auocationem, ad supernataralem illum caliginis diuinæ radium, detractis omnibus & à cunctis expeditus eueheris. Et alibi ita loquitur. Est item diuinissima Dei notitia, quæ per nescientiam accipitur, secundum illam, quæ supra intellectum est vnionem, quando mens à rebus omnibus recedens, ac demum semetipsam deferens, de super fulgentibus radijs vnitur, quibus in illo inscrutabili sapientiæ profundo collustratur. Quibus verbis vtramque viam attingit, actiuam, quæ in nostra sita est voluntate, non tamen sine diuini auxilij infuso lumine, dum monet Timotheum, vt se disponat ad vnionem per omnimodam abstractionem à rebus omnibus, sensus relinquendo, quia non percipiunt quæ sunt spiritus Dei; & omnia obiecta sensibilia ac intelligibilia, principia scilicet scientiarum & ratiocinationum; & ea quæ sunt, essentias videlicet rerum immutabiles; & ea quæ non sunt, res nimirum temporales, quæ

Idem
de diui.
nomi-
nib.
cap. 7.

8 VIA COMPENDII

propter continuam mutationem merito dicuntur non esse. Sic autem expedito ab omnibus impedimentis futurum pollicetur, ut ad supernaturalem diuinæ caliginis radium analogicè sublimetur, & à Deo trahatur: quia tunc anima diuinitus rapitur, & absorbetur, quæ est via passiuæ, supponens præuiam viæ actiuæ dispositionem.

Cap.
2. de
Ascens.

2. S. Bernardus hanc duplicem viam tendendi ad diuinam vñionem his verbis exponit. *Quidam trahuntur, qui dicere possunt; Trahe me post te. Nonnulli ducuntur, qui dicunt; Introduxit me Rex in cellam vinariam. Alij rapiuntur, sicut Apostolus raptus est ad tertium cælum. Et primi quidem felices, qui in patientia sua possident animas suas. Secundi feliciores, qui ex voluntate sua consentiunt Domino. Tertijs felicissimi, qui in profundissima Dei misericordia, quasi sepulta arbitrij libertate, in diuitias gloria in spiritu ardoris rapiuntur; qui spreto ac suppresso adminiculo rerum ac sensuum, non ascensorijs gradibus, sed inopinatis, instantaneisque excessi-*

bus feruntur in Patrem. Hæc Doctor mellifluus, qui duos priores dispositioni actiuæ deputat, tertios passiuæ. Deus itaque sublimis, verba sunt excellentissimi magistri Dionysij Cartusiani, Cum viderit mentem De hominis spiritalis zelo iusticie penetra- fonte lucis, art. 16.
tam, charitate flammigeram puritate
ac omni virtute fulcitam, ad diuina
fortiter aspirantem, mox dignantissimè,
exuberantissimè, amorosè, ac frequen-
tissimè ei occurrit, succurrit, coopera-
tur, seque ei communicat, manifestat,
infundit, eam ad se eleuat, intra se
rapit, deosculatur, amplectitur, atque
se ei intnendum, gustandum, fru-
endum offert ac exhibet, habetque com-
placentiam magnam in ea, & tanquam
amicam ac sponsam apprehendit, fœ-
cundat, & sibi adstringit.

3. Tunc verò animæ nostræ su-
prema portio ad Dei receptionem
parata erit, vt in speculo æternæ sa-
lutis summus rerum diuinarum con-
templator Rusbrochius admonet, In spe-
cūlō æ-
ternæ
salut.
cap. 8.
cūm fuerit prorsus nuda, & formis
seu imaginibus vacua, in suum sem-
per principium intuens. Sed quia

IO VIA COMPENDII

Itiner.
mentr.
c. vlt.

ad hoc, teste D. Bonauentura, nihil potest natura, modicum potest industria; parum dandum est inquisitioni, multum vnctioni; parum verbo & scripto, totum Dei dono. Moriamur ergo, & ingrediamur caliginem, imponamus silentium solitudinibus, concupiscentiis, & phantasmatibus: transeamus cum Christo crucifixo ex hoc mundo ad Patrem, vt eo viso dicamus cum Phi-

c Ioan.
14. 9.
d In fine
lib. vlt.
Ennead
vlt.

c Serm.
3. de
Pascha.

Prolo-
go in
Op. S.
Diony-
sij.

lippo c, *Sufficit nobis. Hæc est vera vita*, ait Plotinus, *d fuga solius ad solum*. Sed melius de nostris propono. *Relinque hominem, Angelum, cælum*, inquit Taulerus c; & ipsum *essentiale bonum, ipsam essentialem veritatem cape nudè in se ipsa; nam quicquid apposueris, hoc ipsum tgit & excludit unitatem*. Platonici, quos phrasibus & verbis Dionysij Areopagitæ sæpissimè vti S. Maximus affirmat, nihil frequentius docent, quàm nos debere omnia relinquere, vt ad Deum ascendamus. Hinc Plato in Phædone Philosophiam esse docet animi à corpore auulsionem, à corporeis scilicet affectionibus separa-

AD DEVM, CAP. II. 11

tionem. Eandem veritatem cognouerunt Pythagorici, quorum vnus, cuius magisterio se subdiderat Iustinus Martyr, sic ipsum hortabatur: *An putas te percepturum quicquam ad felicitatem pertinens, nisi prius animam à rebus sensibilibus ad intelligibiles tractam reddas aptam virtuti, ipsiusque summi boni contemplationi?*

Initio
Colloq.
cū Tri-
phone.

4. Hæc est vera sapientia à fonte omnium bonorum beatissima emanatione procedens, ac mentibus Sanctorum diuinitus illapsa, quâ perfusa anima, non Dei dona, sed ipsum largitorem scintillantibus affectionibus, insatiabilibus votis, vnitius aspirationibus desiderat; & ad eum suspirat, donec obtineat. Huc suspirabat Propheta, cū dicebat, *Quis dabit mihi pennas sicut columba, & volabo, & requiescam?* Quod si quæras, vbi vera sit requies, subiungit, *Ecce elongari fugiens, & mansi in solitudine.* Verbum namque sempiternum non nisi in solitudine profertur: in ea, inquam, solitudine, vbi homo & à seipso, & ab

psal.
54. 7.

12 VIA COMPENDII

omni multiplicitate relictus, desertus & exul effectus est. Propria Sanctorum est hæc solitudo, quorum hæc sunt verba apud Tertullianum.

De
pallio.

Ego nihil foro, nihil campo, nihil curia debeo: nihil officio aduigilo, nulla rostra præoccupo, nulla pratoria obseruo, cancellos non adoro, subsellia non contundo, iura non conturbo, causas non elatro, non indico, non milito, non regno. Seceſsi de populo: imò unicum negotium mihi est, nec aliud nunc curo, quàm ne curem. Erat olim ista sententia, Nemo alij nascitur, moriturus sibi. Certè ad Epicuros & Zenones ventum est: sapientes vocas totum quietis magisterium, qui eam summa atque unica voluptatis nomine conseruanere.

CAPVT III.

Mystica Theologia quid sit. Quomodo differat ab aliis scientiis. An cognita fuerit antiquis Platoniciis. Eius principium & scopus.

1. **H**Ac via quietis, secessus, & Abstractionis peruenitur ad

mysticam Theologiam, ad illam vi-
 delicet indoctam sapientiam omni^a Dio-
 sapientia humana superiorem, qua^{nyf.}
 mens Deum suum sine discursibus^{Cart.}
 agnoscit, & quasi contrectat, & si^{super}
 ne ratiocinationibus gustat. Est au-^{Dio-}
 tem mystica Theologia secretissima^{nyf.}
 mentis cum Deo locutio^{a.} Est ani-^{myst.}
 mi extensio in Deum per amoris de-^{Theol.}
 siderium^{b.} Est motio anagogica in^b Io.
 Deum per purum & feruidum amo-^{Ger-}
 rem^{c.} Est cœlestis quædam Dei no-^{son. de}
 titia per vnionem voluntatis Deo^{myst.}
 adherentis elicitæ, vel lumine cœli-^{Theol.}
 tus immisso producta^{d.} Est sapien-^{specul.}
 tia experimentalis, Dei affectiua, di-^{confid.}
 uinitus infusa, quæ mentem ab om-^{28.}
 ni inordinatione puram per actus su-^c Idem
 per naturales fidei, spei, & charita-^{ibid.}
 tis cum Deo intimè coniungit^{e.} A-^d Ioan.
 lias alij definitiones tradunt, quæ^{à Iesu}
 cum prædictis coincidunt. Res enim^{Ma.}
 abstrusa & difficilis, ac prorsus diui-^{myst.}
 na certis finibus circumscribi nequit,^{Theol.}
 & Dialecticorum regulis concludi.^{cap. i.}
 2. Liquit ex his Theologiam my-^e Balth.
 sticam non esse propriè scientiam,^{Cor-}
 prout scientia est habitus acquisitus: cap. 2.^{der.}
 Isag. ad
 myst.
 Theol.
 Dio-
 nyf.
 Arcop.
 cap. 2.

sed si accipiatur pro actu, nihil aliud est quàm ipsa mentis in Deum desidio, admiratio maiestatis, suspensio animi in lumen immensum ac æternale, feruentissima, quietissima, ac transformatiua inspectio Deitatis: si verò sumatur pro habitu, realiter idem est ac præstantissimum donum Spiritus sancti, quod sapientia nuncupatur, secundum altissimum eius

Dion. gradum.

Carth. 2. Differt à Theologia Scholastica,
 sup. & symbolica, quia scholastica è cal-
 myst. liginosis fidei orthodoxæ principiis
 Theol. sua deducit asserta: symbolica figu-
 Dio- ratas de Deo locutiones explanat:
 nyf. q. hæc puris quibusdam, & tranquil-
 3. art. 5. lis obtutibus sine rationis fatagentis
 excursibus diuinæ sapientiæ arcana
 dignoscit. Per scholasticam discit
 homo rectè vti intelligibilibus per
 symbolicam sensibilibus, per hanc
 rapitur ad supermentales excessus.
 Scientiæ humanæ in valle phantasiæ
 discuntur, hæc in apice mentis. Illæ
 multis egent discursibus, & erroribus
 subiectæ sunt: hæc vnico & simplici
 verbo docetur & discitur, & est

merè supernaturalis tam in substantia, quàm in modo procedendi.

3. Multa quidem de Platoniciis legimus, quæ primo aspectu persuadere videntur eos mysticæ Theologiæ non omnino expertes fuisse: Euanapius enim in vita Iamblici scribit eum aliquando decem cubitis à terra eleuatum fuisse: & Porphyrius in vita Plotini mira de ipsius contemplatione scribit: Proclus quoque in libris de Theologia Platonis, & ipse Plotinus passim, multa tradunt de mentis excessu, & de abstractione à rebus sensibilibus sapientiæ nostræ placitis haud dissentanea. Auctor item diuinæ sapientiæ secundum Ægyptios sic de seipso loquitur ^f: *Ego* ^f Au&. *sapiens animo contemplans relicto corpore* ^{diu.} *visus sum perfrui summo bono cum* ^{sap. secund.} *voluptate incredibili.* Sed vt Taulerus ^{Ægyptios} obseruat ^{lib. i. c.} 8, quicquid isti fecerint vel ^{4.} ^g *dixerint*, nunquam terminos naturæ transcederunt. Magna enim & subtilissima ingenia ita phantasmata extenuare potuerunt, vt species intelligibiles, quæ inde abstrahebantur, vix cum aliqua tenui vmbra sen-

^f Au&. ^{diu.} ^{sap. secund.} ^{Ægyptios} ^{lib. i. c.} ^{4.} ^g *Serm.* ^{2. de S} ^{Ioan.} ^{Bap.}

sibilitatis sua objecta representa-
 rent. Quodd si acuto ipsorum in-
 tellectui in rerum sublimium con-
 templatione occupato phantasma-
 ta seingerebant, ipse intellectus se
 altius eleuabat, & phantasmatum
 nubes, vt ita dicam, infra se despi-
 ciebat. Hoc autem quomodd fiat,
 res admodum obscura est. Fromun-
 dus Libertus, qui de hac re acutè,
 vt solet, disputat in sua Philosophia
 Christiana, fieri hoc autumat bene-
 ficio cuiusdam lucis interioris, de
 qua Valerianus Magnus, Fromundo
 non visus, doctè sed obscurè disserit
 duplici libello de luce mentium. Ve-
 rùm de hac quid sentiendum sit alibi
 nos fusius Deo fauente. Nam de Pla-
 tonicis posterioris æui certissimum
 est, quod Augustinus scribit, eos
 rerum magicarum curiositate deprau-
 atos fuisse. Antiquiores autem spi-
 ritu superbiæ inflati, cùm cognouis-
 sent Deum, non sicut Deum glori-
 ficauerunt, sed euauerunt in cogi-
 tationibus suis, frigidi speculatores
 facti, sine fide & charitate.

4. Porro mysticæ Theologiæ prin-

Philo-
 sophiæ
 Chri-
 stianæ
 de ani-
 ma lib.
 4. art.
 6. &
 seqq.

Epist.
 56. &
 Con-
 fess. lib.
 10. cap.
 42.

eipium est ipsa essentia bonitatis, re-
 rumque omnium causa superessen-
 tialis Trinitas, à qua per bonitatis
 redundantiam in nos effluxit, cum
 inequali tamen participatione ob di-
 uersam hominum aptitudinem, &
 multorum repugnantiam cum diui-
 nis illustrationibus. Dicimus itaque
 cum sanctissimo Dionysio, *Dei prin-*
cipalem beatitudinem, naturam Diui-
nitatis, principium Deificationis, ex
quo Deificandi deificantur, mysticam
Theologiam in salutem & Deificatio-
nem hominum concessisse, modo scilicet
magis immateriato, & spiritaliori, non
extrinsecus ad diuina mouendo, sed in-
telligibili ratione atque intrinsecus pura
liquidaque illustratione diuinissimam ips
voluntatem irradiando. Et hic sco-
 pus huius sapientiæ est erga Deum
 & res diuinas continua dilectio, co-
 gnitio Dei perfectissima, & simpli-
 cis perfectionis eius diuina partici-
 patio atque fruitio, quæ Dei con-
 templatorem spiritali modo reficit,
 eiusque animam modo prorsus inef-
 fabili arctissimè cum Deo vnit, &
 deificat. In ipso siquidem vis quæ-

Eccles.
 Hierar-
 ch. c. 1.

dam superhumana reperitur, & operatio Diuinitatis, à qua mens deificanda sacris mysticis initiatur, & theodidactis mystagogijs eruditur. Sed iam videndum quomodò possit mortalis homo ad hæc sublimia & diuina mysteria proprijs actibus disponi.

CAPVT IV.

Qua sint dispositiones ad mysticam Theologiam. Qua eius impedimenta. Qui ad ipsam discendam incapaces, qui magis idonei. Oratio, & gratiarum actio.

1. **A**Xioma certissimum est apud Scholasticos debere dispositionem eiusdem ordinis esse cum forma, ad quam disponit: quare cum suprà dictum sit mysticam Theologiam esse omnino supernaturalem, hinc euidentissima consecutione deducitur prærequiri ad ipsam statum quendam supernaturalem ipsi proportionatum. Neque

enim fas est, teste Dionysio, mysticis Theologis quidquam operari, quod diuinis inspirationibus vel minimum repugnet, imò nec iisdem dissentire, si diuinam appetant claritatem, & ad hanc sanctè, sicut decet, aspirent. Continua igitur in rebus omnibus mortificatione opus est, vt secum ipse non dissideat, nec diuisus sit, qui ad vnum colligi cupit. Propterea pauci sunt viri spirituales, & religiosi, qui huius mysticæ sapientiæ notitiam habeant; quia, vt optimè obseruat Iacobus Aluarez, paucissimi sunt, qui se ipsos fortiter abnegent, & perfectè mortificent.

Cap. 3.
caelestis
Hierar.

Tom.
2. de vi-
ta Spi-
rit. lib.
2. part.
1. c. 11.

Actus deinde supernaturales prærequiruntur fidei, spei, & charitatis, quibus mens immediatè Deum attingit: & fides quidem intellectum, spes memoriam, charitas voluntatem mysticè perficit & informat, vti pulchrè ac diffusè exponit Ven. Pater Ioannes à Cruce in suis diuinissimis libris de Ascensu montis Carmeli, de Nocte obscura, & de Viua amoris flamma. His accedat necesse

est magnum, feruens, & infatiabile desiderium assequendæ perfectionis, sicut dicit sapiens, *Hanc amari & exquisiri a iuuentute mea, & quasi sponsam mihi eam assumere, & amator factus sum formæ illius. Absque dubio enim*, ait Richardus, *sine ingenti exercitio, sine frequenti studio, sine ardenti desiderio ad perfectam scientiam huius altitudinem mens non subleuatur.*

Sap. 8.
2.

De-
præpa-
rat. ad
con-
temp.
cap. 79.

*Epist.
29.

2. Ioannes Taulerus * rerum mysticarum expertissimus sex homini obseruanda præscribit, vt ad culmen perfectionis pertingat; tria quo ad exteriora; totidem quo ad interiora: nempe vt vestes, & omnia exteriora illius simplicia sint, quibus nemini placere appetat, nisi Deo: vt verba illius sint succincta, necessaria, simplicia, & de rebus diuinis: vt in omni eius externa actione nihil appareat, quod possit offendere intuentes. Deinde quo ad interna necessarium est vt illius cogitationes sint puræ, & cœlestes: vt Deum solum purissima intentione quærat: vt quicquid illi eueniat, im-

perturbabilem animi pacem retineat. Antonius Monelia Ordinis Minorum, vir magnus inter Mysticos, sed ferè incognitus, sex esse causas docet, quibus ligatur anima, ne ad mysticam Theologiam ascendat. Prima est negligentia circa spiritualia, quia homo non vult se exercere & mortificare: secunda, euagatio sensuum: tertia, curiositas intellectus circa scientias: quarta inordinatus amor erga temporalia: quinta, impuritas in operationibus: sexta, occupatio circa exteriora. S. Bernardus quatuor enumerat huius ascensus impedimenta his verbis: *In hoc arcanum, in hoc sanctuarium Dei, si quem fortè vestrum aliqua hora sic rapi & sic abscondi contigerit, ut minimè auocet, aut perturbet vel sensus egens, vel cura pungens, vel culpa mordens, vel ea certè quæ difficilius amouentur irruentia imaginum corporearum phantasmata; poterit quidem hic, cùm ad nos redierit gloriari & dicere: Introduxit me Rex in cubiculum suum.* Est autem sensus egens nimis exigens sensualitas, quæ inor-

In
myst.
Theol.
Dionys.
c.
1.

Serm.
23. in
Cant.

Epist.
72.Lib.
4. de
con-
templ.
cap. 16.

* Lib.

1. Soli-
loq. de
cognit.
Dei &
animæ
c. 14.
* Cap.
1. myst.
Theol.

dinaris affectuū moribus nos exagitat: cura pungens, rerum temporalium sollicitudo: culpa mordens, prauæ conscientix stimulus: irruentia denique phantasmata sunt rerum sensibilibium, & corporearum imaginēs, quas vocat Augustinus animæ nostræ plagas per sensus inflictas. Hæc omnia abdicanda, & extirpanda prorsus sunt, vt Deum inueniamus. *Quamdiu enim, ait Richardus, consolationem ab aliqua creatura accipimus, nondum dilectum perfecte tenemus.* Quando autem tales fuerimus, vt nihil prorsus terrenorum nos delectet, eodem momento, eodem puncto temporis videbimus quod cupimus, vt promittit Augustinus. *

3. Cū tot igitur dispositiones ad mysticam Theologiam sint necessariae, libet hīc veteri ritu proclamare: Procul hinc, procul este prophani. Nam & Dionysius* monet Timotheum, vt caueat, ne quis eorum hæc audiat mysteria, qui rebus adhærescunt, & nihil vltra naturalia supernaturaliter esse imaginan-

tur: qui materialibus rebus immer-
si nondum per studium mortifica-
tionis, & exercitium virtutum ani-
mi candorem acquisuerunt: qui am-
bulantes in mirabilibus super se ar-
cana Dei sua cognitione se posse per-
cipere arbitrantur. His meritò oc-
cinimus cum Christiano Poëta.

*En adest Deus, impios
Hinc procul procul arceo.
Inuisum superis genus,
Hinc abite profani.
Fumus ut fugit, obuijs
Cera cedit ut ignibus:
Sic, intrante Deo, procul
Hinc abite profani.*

Franc.
Mont-
moren-
cius in
para-
phrasi
psal. 67.

Ceterùm hæc sapientia citiùs ac su-
blimiùs Idiotis simplicibus, qui nihil
aliud quàm salutem in timore & tre-
more curant, quàm magnis & erudi-
tis Theologis conferri solet, nisi &
ipsi toto mētis affectu studeāt humi-
litati. Ita scribit vir eximius Bartho-
lomæus de Martyribus Bracharensis
Archiepiscopus^a. Et Bernardus de
hac re sermonem habens sic exclam-

a Com-
pend.
doct.
Spirit.
p. 2. c.
13. §. 3.

b Serm. mat ^b. *O quisquis curiosus es scire quid
 85. in sit hoc Verbo frui, para illi non aurem,
 Cant. sed mentem: non docet hoc lingua, sed
 c De gratia absconditur à sapientibus & pru-
 proces- dentibus, & reuelatur paruulis. Simi-
 fu Re- lia docent alij plures sapientissimi
 lig. viri c Bonauentura, Gerson, Vi-
 Gerson ctor Gelenius, Constantinus de
 de myst. Barbanfon, Franciscus Suarez. At-
 Theol. que idem confirmant scriptis suis, &
 Gelen. exemplo sanctæ ac Theodidactæ
 in praxi mulieres, tres Catharinæ Senensis,
 myst. Genuensis, & Bononiensis; Angela
 Theol. de Fulgineo, Gertruda, Mechtildis,
 p. 1. de- Brigida, Baptista Vernatia, Tere-
 cis. 1. sia à Iesu, & aliæ plures.
 & dec. 4. Ita nimirū, æterne Deus, rex cœli
 10. art. & terræ, ita fuit placitum ante te. Tu
 2. enim superbis resistis, & humilibus
 Bar- das gratiam, & cum simplicibus ser-
 banf. monatio tua. Confiteor tibi, Do-
 in se- mine, quia abscondisti hæc à sapien-
 mitis tibus, & prudentibus, & reuelasti
 occult. ea paruulis. Non sic illuxisti inflatis
 diuini cordibus sapientum huius seculi, si-
 amor. cut lucis in mente paruulorum, &
 Suarez humilium humum deferetium. Ve-
 10. 2. de re tu es Deus absconditus, & lucem
 Relig. lib. 2. deferetium. Ve-
 de orat. re tu es Deus absconditus, & lucem
 c. 10. habitas*

habitas inaccessibilem: sed lucem tuā
 copiosè illis & amanter communi-
 cas, qui Iesum crucifixum corde &
 corpore exprimentes animam ex-
 purgarunt ab omni labe ac sorde vo-
 luptatum. Penetrasti animam illo-
 rum profundius & vitalius quàm so-
 leas, cùm solam mentem ignotus ir-
 radias, ieiuna voluntate. Penetra-
 sti intimè, & intelligibili tui conta-
 ctu experti sunt quàm suauiter mul-
 ces, & mirabiliter imples hanc im-
 mensam mentis nostræ capacitatem.
Tum ex abundantia cordis eructa-
 runt verba, verba vtique bona, dul-
 ciora super mel & fauum; ex qui-
 bus didici veram sapientiam, quæ
 non reperitur in siccis, & insulsis li-
 bris inanium Philosophorum, qui
 narrant mihi fabulationes, sed non
 vt lex tua. Ita, Pater, quoniam sic
 fuit placitum ante te.



CAPVT V.

*Quid sit unio mystica. Quomodo fiat.
Qui eius effectus. Quid incapaci-
bus, & ignaris conferat lectio my-
stica Theologia. Transitus ad Aspi-
rationes.*

I. **E**O tendunt omnia, quæ de
mystica Theologia scribun-
tur, vt animam perducant ad inti-
mam cum Deo vnionem, in qua me-
dulla huius sapientiæ, & summum
eius arcanum consistit. Non est au-
tem hæc vnio localis, siue præsen-
tiæ, qua Deus vbique est, nihil se
vacuum relinquens propter suam
immensitatem. Non est vnio per
gratiam sanctificantem, quâ anima
à peccatis emaculata in Dei amicitia
restituitur, fitque diuinæ consors
naturæ. Non est vnio per charita-
tem, de qua scriptum est, *Qui ma-
net in charitate in Deo manet, & Deus
in eo.* Prima enim harum vnionum
conuenit etiam rebus inanimatis,

Ioan.
4. 16.

Secunda omnium iustorum est, & puerorum ante vsum rationis; fiuntque istæ in substantia animæ: Tertia communis est omnibus probis, qui Deum quidem ardentissimè diligunt, sed dono contemplationis, & mystica vnione carent. Est igitur alia vnio felicissima & arcana, inexpertis imperuia, & difficilis explicatu, quæ fit in potentijs animæ, in intellectu scilicet & voluntate; istæ enim Deum attingunt, & illi coniunguntur actionibus proprijs vitalibus: atque in ista vnione summa felicitas vitæ hujus consistit, & quædam futuræ gloriæ prægustatio.

De hac vnione non est meæ imbecillitatis fusiùs differere: immundis enim & impuris diuina attingere nefas. Legat qui dignus fuerit vberri-
mè de illa differentem virum doctissimum, & quasi alterum Hierotheû diuina patientem, Thomam à Iesu, qui sanctorum Patrum de ea, omniumque Mysticorum doctrinam affert, multa addens ex propria experientia.

Lib. 4.
de diuina ora.
per totum.

2. In hac vnione clarissima luce sa-

pientiae perfusus intellectus Deum respicit, vt quoddam totum, in quo est omne bonum, ita vt ab eo in aliud diuertere nequeat: voluntas autem ardentissimo amore constringitur, qui instar ignis erumpens omnia quodammodo absumit, ita vt anima iam in se non viuat, neque actionibus naturalibus intendat, sed toto affectu in eum transeat, cui ardentissimo amplexu coniungitur. Ambae verò potentiae in vastissimam Diuinitatis solitudinem, vt ita dicam, introducuntur; vbi Pater cunctis imaginibus nudans intellectum supra rationem nos euehit; Filius verò vacuum intellectum infinita claritate perfundit: sanctus autem Spiritus immenso ardore inflammans voluntatem omnes affectus nostros secum conglutinat; quia nimirum id quod mortale in nobis est à vita immortalis absorbetur. Hic dicit anima, *Bonum est nos hic esse*: hic introducitur in cellam vinariam, vbi læta bibit sobriam ebrietatem spiritus: hic canit epithalamium dicens, ° *Dilectus meus mihi, & ego illi.* P *Vino ego iano*

° Cant.

2. 16.

P Galat.

2. 20.

non ego, viuit verò in me Chistus. Defluit hîc amans anima, deficitque à seipfa, & velut ad nihilum redacta in abyffum æterni amoris collabitur: vbi sibi mortua viuit in Deo, nihil sciens, nihil sentiens præter amorem. Perdit enim se in diuina caligine, sed sic se perdere inuenire est.

3. O sanctam illam animam, quæ à Deo singulariter visitata, & supra omnia creata, supraque omnem operationem eleuata, mediante mystica vnione in Deum transformatur! Quàm benè illi conueniunt verba illa sapientis, *Venerunt mihi omnia bona pariter cum illa?* Cùm enim felicissima vnio sit amplexus, & degustatio summi boni; omnia bona ab ipsa, quasi riuuli à fonte, in animam deriuantur. ¶ Hinc decor, & pulchritudo, & Spiritus sancti charismata, quibus mirabiliter exornatur. Hinc splendor lucis, & præfulgida illustratio, ardorque amoris, & suauitas ineffabilis. Hinc contemptus rerum omnium terrenarum, & insatiabile cœlestium desiderium. Hinc perfecta Christi imitatio, & ex redundantia

Sap. 7.
II.

¶ De his
fuit
Har-
phius,
Ruf-
bro-
chius,
Car-
thusia-
nus,
Blossius
& alij
Mysti-
ci.

spiritus exultatio sensuum, & corporis admirabilis transmutatio. Hinc animæ annihilatio coram Deo, & mystica mors: hinc feruor, languor, liquefactio, ebrietas spiritualis, silentium internum, osculum Verbi, ecstasis, raptus, suspensio, & alia multa, quæ libens prætermitto, quia de his sola vnctio illos docet, qui digni sunt experiri.

In Ti-
mao.

4. Altissima quidem sunt hæc mysteria, & supra communem hominum captum, sed vt optimè ait Plato, *De rebus diuinis credendum est falsis Dei, etiam si nullas afferant rationes.* Res sublimes & arcanas, quod sibi notæ non sint, quasi falsas aspernari; fidemque abnegare spectatissimæ probitatis viris, cum de diuinis perceptionibus ex propria loquuntur experientia, stultorum est, & impiorum. Nec ideo inutiles æstimandi sunt, aut prorsus abiiciendi Mysticorum libri, quod sublimia tractent, & mirabilia super nos; nam hoc saltem ex illis discimus, quàm longè adhuc versemur à culmine Christianæ perfectionis, nondum

digni qui cum Moyse in caliginem ingrediamur. Narrat Guilielmus Abbas Sancti Theodorici, sibi infirmo in Monasterio Clareuallensi 9. Bernardum etiam infirmum moraliter exposuisse Canticum Canticorum: [In quo, *inquit*, cum benignè & sine inuidia exponeret mihi, & communicaret sententias intelligentiæ, & sensus experientię suæ, & multa docere niteretur inexpertum, quæ non nisi experiendo discuntur; & si intelligere non poteram adhuc quæ apponebantur mihi, plus tamen solito intelligere me faciebat, quid ad ea intelligenda deesset mihi.]

In vita
S. Bernardi
lib. 1.
c. 12.

5. Hic sisto. Voces enim audio plenas querelarum, quibus à legentibus interpellor. Et ubi, inquit, via compendij ad Deum, quam te initio hujus Tractatus ostensurum promissisti? Hactenus de mystica Theologia, & de vnione cum Deo disseruisti, opus proponens difficilimum, iter arduum, & altissimum fastigium humanis viribus inaccessi-

Psal.
138. 6.

bile. Vnde meritò illud Psalmogra-
phi quisque nostrū vsurpare potest:
*Mirabilis facta est scientia tua ex me,
& non proptero ad eam* Quomodò enim
terrenus homo terram despicere po-
terit, cœlum conscendere, Ange-
lorum choros transcendere, ad Dei
solium accedere, quicquid est hu-
manum exuere, Deo intimè vniri?
Libenter quidem ista legimus, &
audimus; sed tam arduo operi nos
accingere, humana fragilitate vires
denegante, non audemus. Rectè ista;
si sola hominum imbecillitas atten-
datur: malè, si diuinæ gratiæ effica-
ciam adjuuantem respiciamus. Adest
hæc omnibus, qui à Deo præuenti
iter ad ipsum aggrediuntur. Aderit
& mihi viam docenti, datamque fi-
dem liberanti.

6. Dico igitur viam compendij ad
Deum, ad culmen mysticæ Theolo-
giæ, ad intimam cum Verbo vnio-
nem esse motus Anagogicos, & exer-
citium Aspirationum. Testes hujus
dicti afferro omni exceptione mayo-
res. Primus est Ioannes à Iesu Ma-
ria Carmelita excalceatus, qui ita

scribit: [Concors omnium, quos legerim, sententia est, ad altissimam Dei cognitionem & sensum, siue experimentum, aspirationum exercitio ita animam erigi, vt si hoc Angelicum exercitium miris laudibus celebratum, cæteris omnibus antepositum frequentet, plurimum proficiat. Habet enim tam egregiam vim extimulandi, & diuinis flammis vrendi, vt hoc vnum idoneis circumstantijs septum, & studio virtutum armatum, ad summam christianæ vitæ perfectionem & puritatem corda nostra perducatur. Quamuis enim dona Dei sint vnio, raptus, fruitio, reuelatio, & illa indulgentissimi Dei interna blandimenta, & solis conatibus nostris, quantumuis nervosis, illa non producamus; at certè animæ sese idoneè ad eas nuptias ornanti & comparanti munificentius, quàm cogitare valeat, indulgentur.] Hæc Ioannes, cui alterum adjungo ejusdem instituti Thomam à Iesu.^r [Si Sanctorū Patrum, inquit, aliorumque Mysticorum, qui hanc

Myst.
Theol.
cap. 9.

De di-
uina
orat.
lib. 4.
cap. 20.

34. VIA COMPENDII

^s Cap. 3. myst. Theol. ipsi ascriptæ, quæ est Henrici de Palma. ^t Myst. Theol. lib. 2. initio p. 5. ^u In myst. Theol. ^x Lib. de fonte lucis. ^y In semit. occult. p. 1. cap. 5. & p. 2. c. 3. Lanf. perg. init. Pharetræ.

viam experti sunt, sententiæ credendum est, nullam compendiosorem viam, nullumve alium in Dei assurgendi modum faciliorem ac nobiliorem eo inuenies, quem sapientiam vnitiuam, siue amorem vnitiuum Mystici appellant, qui in motibus anagogicis siue aspirationibus, quibus cor enititur ad Deum assurgere, ac illi auidissimè adherere, consistit.] Possem paginas latè implere aliorum testimonijs hanc veritatem confirman-
tium, præsertim Bonauenturæ^s, Henrici Harphij^t, Ioannis Gersonis^u, Dionisij Cartusiani^x, Constantini de Barbanfon^y; sed pro indicta mihi breuitate duo proposita sufficient.

CAPVT VI.

Aspirationes, Motus anagogici, Orationes jaculatorie quid sint. Sententijs, & exemplis Sanctorum Patrum approbantur. De illarum præstantia, & utilitate.

1. **A** Baridem Hyperboreum Pythagoræ æuo nobilem, &

famosum habuisse ferunt aureum telum, quo vectus, vt poëtico Pegaso, celeriter per aërem volitabat, vnde dictus est Æthrobates, scandens per aëthera, vt refert Iamblicus in vita Pythagoræ. Sed quod genus aurei reli potentius est, quam alaræ & ignitæ Aspiraciones, quæ deuotam animam momento in cœlum efferunt, & penetrant vsque ad thronum Diuinitatis? [Anima, in qua habitauit ignis Dei, ait Magnus Antonius Abbas, Similis est aui duabus prædita alis, quibus volat, & sursum per cœli aëra eleuatur. Etenim aui præ omnibus creaturis alæ peculiare sunt: alæ verò animæ Domino obsequentis sunt virtus ignis Dei, quibus ad cœlum sursum volare valet. Si autem his caruerit alis, minimè sursum eleuari in aëra poterit, cùm sit illius ignis expers; similisque erit aui suis spoliata alis, quæ volare nequit.] Hæc Antonius, qui supra iam dixerat causam ascensionis Sanctorum ad Cœlum fuisse ignem inuisibilem, calorem scilicet accensum in cordibus eorum. Hoc

Cap.
28.Epist.
18.

enim igne deficiente, nemo ad cœlum aspirare, necdum ascendere valet.

2. Sunt autem Aspirationes brevissimæ quædam Orationes, siue mente sola, siue mente simul ac ore conceptæ, atque prolata, quibus debet fidelis anima in quouis loco & tempore assuescere, & frequenter incumbere, cor suum & voluntatē ad Deum, erigens die ac nocte, domi & foris, sedēs & ambulans, in quouis negotio, in quauis actione, & occupatione. Scriptum est enim, oportere semper orare & numquam deficere; sed quia instabilitas naturæ nostræ, corporis cura, & aliæ occupationes sæpe nos distrahunt, hæc Angelica Aspiratio-
num exercitatio perpetuitatem orationis compensat. Fiunt quidem in momento, & transeunt; sed jugiter permanet earum fructus, & continuatur oratio continuatione boni desiderij in charitate fundanti: bonum autem desiderium semper orat, quia semper clamat ante Deum sinceri amoris affectus. Beati in cœlo nunquam cessant ab actuali amore;

LUC.
18. 1.

& cognitione Dei : nos verò hanc
 felicitatem continuis aspirationibus
 æmulamur, dicentes cum Aposto-
 lo: *Nostra conuersatio in cœlis est.* Ora-
 tio enim est ascensus spiritus ad Deū^z; Philip.
3. 20.
Per quem ascensum, ait S. Ioannes ^z Da-
 Chrysostomus, ^a *societatem effugimus,* mascē.
quam cum brutis animalibus habe- l. i. de
mus, & cum Angelis copulamur. Vo- fide or-
 cantur Aspirationes, quia illis aspi- thod.
 ramus ad Deum, & per eas aspirat c. 14.
 Deus conatibus nostris: dum verò ^a De-
 ad Deum aspiramus, nil nisi Deum orando
 spiramus; & per easdem feruor cha- Deum
 ritatis, non minus quàm vita corpo- lib. i.
 ris aëris aspiratione, sustinetur. Mo-
 tus quoque anagogici, id est sur-
 sum ducentes, nuncupantur, quia
 illis à rebus terrenis abducimur, &
 ad superna leuamur, ac tandem ad
 beatam cum Deo vnionem euehi-
 mur. Dicuntur orationes jaculato-
 riæ, quia instar jaculorum & fagit-
 tarum velocissimè transeuntium in
 eorum diuinum tanquam in scopum ja-
 ciuntur, vt ab eo dona cœlestia obti-
 neamus. Affectus denique appellan-
 tur, quia sunt affectiones cordis, &

Part. I.
decif. 6.
art. I.

desideria, ac proposita voluntatis: nihilque aliud est Aspiratio, ut eam Gelenius diffinit, præterquam expeditus affectus erga Deum, ut summum bonum.

Epist.
121.

3. De his plura sanctorum Patrum documenta habemus, & exempla. Augustinus ad Probam. [Dicuntur fratres in Ægypto crebras quidem habere orationes, sed eas tamen breuissimas, & raptim quodammodo jaculatas, ne illa vigilanter erecta, quæ oranti plurimum necessaria est, per productiores moras euanescat, atque hebetetur intentio.] Cassianus instituta Monachorum describens: [Vtilius censent breues orationes, sed creberrimas fieri. Non enim multitudine versuum, sed mentis intelligentia delectantur.] Et in Collationibus: [Frequenter sed breuiter orandum est, ne immorantibus nobis inferere aliquid cordi nostro insidiator possit inimicus.] Chrysostomus ad populum Antiochenum: [Breues & frequentes orationes fieri Christus, & Paulus præcepe-

Lib. 2.
Inst. c.
10. & 11.

Collat.
9. cap.
vlt.

Homil.
79.

runt paruis ex interuallis. Nam si sermonem in longum extenderis, in negligentiam frequenter lapsus multam diabolo subrependi facultatem dederis, & supplantandi, & abducendi cogitationem ab his quæ dicuntur. Si verò continuas & crebras orationes facias, totumque tempus interpolans frequentia, facile poteris modestiam exhibere, & ipsas orationes cum multa facies solertia.] Aëlredus Abbas ^a: [Hæc deuota suspiria tam ^a De gratiosa sunt in oculis eius, qui ^{duo-} scrutatur renes & corda, quòd non ^{bus} possit diu abscondere multitudinem dulcedinis suæ, quam abscondit timentibus, & diligentibus se.] ^b Epist. Guilielmus Abbas S. Theodoric ^b: ^{ad Fr.} [Hauriendus est sæpè de lectionis ^{de} serie affectus, & formanda oratio, ^{Monte} quæ lectionem interrumpat, & ^{Dei,} non tam impediatur interrumpendo, ^{inter} quàm puriorem continuò animus ^{Op. S.} ad intelligentiam lectionis restituat.] Huiusmodi oratiunculas ^{Bernardi} rectè appellat Tertullianus ^c, [Orationes sine agmine verborum:] & ^c De ^{orat.} ^{cap. 1.}

40 VIA COMPENDII

Col-
lat. 9.
cap.
vlt.

De
intern.
confli-
ctu. c.
10.

De An-
na, to.
1.

Abbas Isaac apud Cassianum eas commendat tanquam verum sacrificium, pingues hostias, pura libamina, holocaustomata medullata. [Sunt enim, teste B. Laurentio Iustini-
niano, opus spiritualis arcus, sagittæ contra aduersarios directæ, ignita vota, quæ à Christi militibus in cælum corde tacito destinantur; eminus feriunt, celeriter emittuntur, hostem non sinunt propiùs accedere, & ascensorem frequenter vnico prosternunt ictu. Rursus Chrysostomus: [Dic in mente, Miserere mei Deus, & absoluisti precationem. Qui enim dicit, Miserere, confessionem offert, & peccatum suum agnoscit, quia lapsorum est misericordiam requirere. Qui dicit, Miserere mei, remissionem delictorum accepit: qui enim misericordiam consecutus est, non punitur. Qui dicit, Miserere mei, regnum cælorum obtinuit: quem enim Deus miseratur, non à pœna solùm liberat, sed futurorum etiam bonorum possessione dignatur.]

AD DEVM, CAP. VI. 41

4. Porrò hunc orandi modum exemplo suo nos Christus Saluator edocuit. In horto enim iterabat hæc verba : *Pater si possibile est , transeat à me calix iste : veruntamen non mea , sed tua voluntas fiat.* Et in Cruce magnos sustinens cruciatus aliquam interdum ex his aspirationibus ardentissimo feruore iaculabatur, dicens; *Pater dimitte illis, quia nesciunt quid faciunt.* Deinde: *Deus meus, Deus meus, ut quid de reliquisti me.* Ac postea : *Pater in manus tuas commendo spiritum meum.* Nehemias interrogatus à Rege, priusquam responderet, mentem ad Deum sustulit, ad solium Diuinitatis animi sui nuntio celerissime amandato. Iudith Holofernem percussura apprehendit comam capitis eius, & ex corde ignitam protulit & breuissimam orationem dicens, *Confirma me Domine Deus in hac hora.* Sancti in cælo requiem non habent die ac nocte dicentes ^d, *Sanctus, Sanctus, Sanctus.* ^e Basilii suadet peccatori, vt ad imitationem Chananeæ identidem inclamet il-

Matt.
26. 39.

Ibid.
27. 46.

Esdra
2. 4.

Iudith
13. 9.

d Apoc.
4. 8.

e Exhort.
ad Baptism.

42 VIA COMPENDII

Epist.
16. ad
Princi-
piam.

lud, *Miserere mei fili David.* De S. Marcella scribit Hieronymus, eam semper cantasse illud Psalmi, *In corde meo abscondi eloquia tua, ut non peccem tibi.* S. Malachias, teste Bernardo in eius vita, raptim quodammodò, & velut jaculum mittebat orationē. Thais olim meretrix edo-
cta à Paphnutio Abbate sic orabat:

Collat.
10. cap.
10. 1.
vitæ.
Pat.
Ros-
ueidi,
lib.
5. libel.
12.

Qui plasmasti memiserere mei. Cas-
sianus vsum multiplicem hujus ver-
ficuli, *Deus in adiutorium meum in-
tende,* elegantissimè commendat in
Collationibus. Ex vitis Patrum mul-
ta hic referri possunt. Abbas Isaias
vidit cujusdam Monachi orationē,
dum manducaret, ascendere instar
ignis in conspectu Dei. Alius qui-
dam, dum colloqueretur cum alijs
fecit centum & tres orationes. Ab-
bas Macarius de modo orandi à qui-
busdam interrogatus dixit, Non est
opus multum loqui in oratione, sed
extendere manus frequenter, & di-
cere, Domine, sicut vis & scis, mi-
serere mei. Moyses Æthiops olim
princeps latronū quinquaginta quo-
tidie orationes peragebat: Paulus

Ibid.
libel. 8.

Monachus trecentas: quædam Virgo septingentas. Narrat Theodoretus Simeonem Stylitam innumeras quotidie adorationes peregisse, adeo vt vnus numerauerit aliquando mille ducentas quadraginta quatuor, alias omittens, quia lassus destitit numerare. Quidam Christophorus Monachus centies in nocte orabat. Beata Clara de Monte Falco millies quotidie Deum adorabat genua flectens, & totidem fundens jaculatorias orationes, vt testatur in eius vita Baptista Pergilius. S. Franciscus tota nocte orabat hæc sola verba repetens: *Deus meus & omnia*. Pater Didacus Martinez, Peruani Regni dictus Apostolus, quotidie dicebat sexcentis quandoque vicibus, *Deo gratias*; & ad hoc alios hortabatur dicens, nullam orationem breuiorem esse, nullam Deo magis acceptam. Alius quidam è Societate Iesu Iacobus Cerrutus nomine innumerabiles actus amoris, & gratiarum actionis singulis diebus eliciebat, qui perueniunt aliquando ad viginti quatuor millia: vota verò ter millies

Ibid.
libel. 9.

Ibid.
lib. 10.

Part. r.
c. 6.

Nicol.
Lancius

Opusc.
Spir.
II. cap.
30.

44 VIA COMPENDII

Ilid. quotidie renouabat. Sub regimine
 II. P. Consalui Sylueriæ erant qui bre-
 eNicol. ui oratiuncula decies millies in die
 Codi- diuinum auxilium inuocarent^e. Si-
 gnus milem orandi frequentiam æmula-
 in vita. bantur ex eadem Societate suis scri-
 P. Con- ptis notissimi viri Sebastianus Barra-
 salui da, & Franciscus Suarez^f, vt alios
 I. 3. c. omittam. Non erit finis exemplo-
 IO. rum, si omnium Religiosorum Or-
 f Ioan. dinum percurrere historias velim, &
 Rho gesta omnium Sanctorum. Recen-
 in Hist. tiora quædam habet Ioannes Rho in
 virtu- Historia Virtutum.
 tum I. 3. c. 8.

5. Tanti momenti est ad assequen-
 dam breui tempore perfectionem
 hoc exercitium, vt illud semper plu-
 rimi æstimarint quotquot fuerunt
 viri doctrina, & sanctitate conspi-
 cui. Hoc enim tamquam igne in cor-
 dibus nostris accenso consumuntur
 omnia peccata, vitia omnia de-
 struuntur. Tollit id à nobis quic-
 quid est terrenæ adhæSIONIS, quic-
 quid deformitatis, quicquid diffi-
 miles nos facit Deo, & sanctam cum
 illo vnionem impedit. Eo mediante
 vincuntur tentationes, acquiruntur

AD DEVM, CAP. VI. 45

virtutes, perficiuntur operationes,
cœlesti lumine inbuitur intellectus,
exercentur actus supernaturales, pu-
rificatur intentio, erigitur affectus,
inflammatur voluntas, disponitur
mens ad contemplationem, & to-
tus homo in Deum transfundi-
tur. [Preces tacitæ multum habent
acuminis, ait Abbas Gillebertus,
priuatim fiunt, sed priuata non
petunt; submissior est vox, sed
mens intensior. Verbis non eget,
nec vtitur oratio quæ puro & ple-
no fertur affectu.] Diuinus homo
& in schola amoris versatissimus
Franciscus Salesius Episcopus Ge-
neuensis studium orationis, & vsum
Aspirationum vnum & idem esse
cum mystica Theologia doctè & lu-
culenter ostendit. Quia sicut Scho-
lastica Theologia habet Deum pro
objecto, mystica etiam non nisi de
Deo loquitur, sed cum triplici dis-
crimine. Illa differit de Deo, vt Deus
est: hæc vt summè amabilis est. Illa de
Deo loquitur cum hominib⁹, & inter
homines: hæc de Deo cum eodem
Deo, ac in ipso Deo. Illa tendit ad

Serm.
23. in
Cant.

De
amore
Deil.
6. c. 1.

Dei cognitionem, facitque nos doctos & Theologos: hæc tendit ad amorem, & nos ardentem reddit, ac Theophilos. Principale itaque huius exercitium est cum Deo loqui, & ipsum Deum in fundo cordis loquentem audire secretis aspirationibus & alloquijs, quæ à nemine nisi ab ipso dicente & à Deo intelliguntur. Optimè de hac re pius Poëta.

Herman.
Hugo
Piorum
elegia
præ-
miali.

*Ille meos gemitus, mea scit suspiria
solus,*

*Quem fugit humani nulla latebra
sinus.*

*Quid clamen, mea dum sese suspi-
ria rumpunt,*

*Non nisi nos soli novimus, ille &
ego.*

*Nemo meos gemitus, vota, aut
suspiria novit.*

*Nemo, duo nisi nos, & duo suffi-
cimus.*



CAPVT VII.

*Varia documenta pro vsu, & praxi
Aspirationum.*

I. **V**T qui domum moliantur à
fundamentis, ita nos docu-
menta scripturi pro vsu & praxi aspi-
rationum à fulcro, & veluti basi ip-
sarum, à Dei scilicet præsentia, or-
diri debemus. Ab hac omnino pen-
det hæc Angelica exercitatio, neque
enim ad absenti aspiramus aut pre-
ces fundimus, qui nos audire & exau-
dire non possit. Præsens est ille om-
nibus, & vbique: atque vt canit qui-
dam Religiosus Poëta.

Man-
tuanus
3. Syl-
varum.

*Cuncta Deus replet, Deus est supra,
Deus infra,
Æthereos orbes habitat, sub Sole,
sub aura,
Sub tellure latens, sub Dite, sub aquo-
ris unda,
Omnia plena Deo.
Romanus sapiens ad suum Lucil-*

Epist.
41.

hium sic scribit: [Non sunt ad cœ-
 lum eleuandæ manus, neque exoran-
 dus ædituus, vt nos ad aures simu-
 lachri, quasi magis exaudire possi-
 mus, admittat. Prope est à te Deus,
 tecum est, intus est. Ita dico, Lu-
 cilli, sacer intra nos spiritus sedet,
 malorum bonorumque nostrorum
 obseruator & custos: hic propt̃
 à nobis tractatus est, ita nos ipse
 tractat. Bonus vir sine Deo nemo
 est.] Præsentiâ itaque diuina per se
 considerata facillima est: nam quid
 facilius quàm illum intueri, qui vbi-
 que est, in quo viuimus, mouemur,
 & sumus? Sed attenta naturæ nostræ
 corruptione, quæ per inepta & cor-
 pori iucunda vagari consuevit, cœ-
 cutimus plerique, & lucem vbique
 fulgentem non videmus. Sicut ho-
 mini cœco præsens est sol, sed ipse
 soli absens est: sic omnis stultus &
 impius procul à Deo est, non quia
 Deus illi sit absens, sed quia ipse, vt
 potè cœcus, præsensem non videt.
 [Magna hæc miseria est, vt scribit
 Augustinus, cum illo non esse:
 hominem, sine quo non potest esse:
 in quo

Lib. 14.
de Tri-
nit. c.
12.

in quo enim est, sine dubio sine illo non est, & tamen si eius non meminit, eumque non intelligit & diligit, cū illo non est.] Vt ergo cū illo simus, semper ad illum respiciamus, ejusque amorem assiduis aspirationibus excitemus & augeamus. Amor enim oculum mentis ita afficit, vt non nisi amatum videre libeat. De illo quem amat semper cogitat homo, semper loquitur, semper ad ipsum aspirat: & mutuo ista fiunt, præsencia Dei studium aspirandi gignit, ipsisque aspirationibus eadem fouetur, & nutritur.

2. Cū autem varij sint modi à diuersis scriptoribus & traditi, quibus Deum præsentem habere & concipere possumus; ille cæteris præferendus, qui nec caput lædat aut imaginationem, nec stolidos & quasi abstractos in peragendis ordinarijs actionibus nos reddat, sed potius adiuuet ad solita exercitia perfectius obeunda. Hic duplex est. Primus consistit in actuali fidei exercitio circa tria: circa eius immensitatem, qua cælum & terram implet; circa

8 Virgil. Cæparius, Ioan. de Angelis Anton. Gardier, Nicol. Lancicius, Franc. Arias, Alphonf. Rodriguez, to. 1. Iacob. Aluarez, tomo 3. Ludo. de Ponte in Duce Spirit. Thomas Massutius lib. 2. de celesti con-

uersat.
 Ludo.
 Paris
 Capu-
 cinus
 in Pa-
 lat. di-
 uini
 amo-
 ris c.
 130. vñ-
 que ad
 e. 159.
 & alij.
 h Cor.
 3. 16.
 i Variæ
 sunt
 Plato-
 nico-
 rum
 senten-
 tiæ de
 anima
 mundi,
 v. Pro-
 clum;
 & ex re-
 cen-
 tiori-
 bus
 Foxii
 in Ti-
 morum:
 Alci-

scientiam infinitam, qua omnia vi-
 det & penetrat, etiam intimas co-
 gitationes: circa eius concursum ad
 omnes nostras actiones. Per simpli-
 cem enim istarum veritatum appre-
 hensionem Dei assidue recordari fa-
 cillimum erit: cumque hinc phan-
 tasmata absint, & actus imaginatio-
 nis, non erit hic modus illusionibus
 subjectus, & capitis fatigationi. Se-
 cundus multò isto perfectior ille est,
 quo Deum non iam extra nos, sed
 in abdito cordis, & in intimo spiri-
 tus nostri præsentem, & in nos sua
 bona effundentem purissimo mentis
 oculo intuemur. *Nescitis*, ait Apo-
 stolus^h, *quia templum Dei estis, & spi-*
ritus Dei habitat in vobis? Magna cæ-
 citas multorum est, & non modica
 ignorantia Deum semper extra se
 quærentium, ac si procul ab illis ef-
 fet. Nam si est in omnibus rebus, vt
 fides docet, procul dubio etiam in
 nobis est, magis intimus nobis,
 quàm anima corpori, qua de cau-
 sa à Platoniciⁱ *Anima mundi* di-
 citur, non quasi pars & forma ipsius,
 sed tanquam perfectissima causa tri-

AD DEVM, CAP. VII. 51

buens omnibus esse & operari. Tuius est autem Deum intra nos ipsos, quam in alijs creaturis quærere, & aspicere; species enim externa creaturarum ita nos sæpe detinet & rapit, vt non sinat ad Creatorem in illis habitantem intrare. Ided querebatur Augustinus^k se foris Deum quæsisse, qui intra ipsum erat. *Mecum eras*, inquit, & *tecum non eram*. Hæc Dei præsentia Sanctæ Catharinæ Senensi vsui erat, quæ, teste Raimundo in eius vita, cellulam sibi secretam intra se ipsam fabricauit, in qua iugiter cum Deo morabatur. Felix planè cubiculum, in quo anima seipsam abscondit à tumultu creaturarum, & cum magna tranquillitate Deo creatori intendit. Sententia Saluatoris est^l, *Regnum Dei intra nos esse*: Regnum verò Dei est ipsemet Deus cum vniuersis diuitijs suis. Ad ipsum igitur intra nos habitantem in fundo & essentia animæ ignitis aspirationibus introuertere nos debem⁹, semper de illo cogitando, vt ad eius amplexum, & felicem cum eo vnionem tandem peruenire, seu perducere mereamur.

nouum
cap. 12.
ac ibid.
Com-
ment.
Iac.
Car-
penta-
rij. Plo-
tinum
lib. 2.
3. 9.
enn.
2. ac
ibid.
Fici-
num,
qui
item le-
gendus
lib. 4.
Plato-
nicæ
Theol.
k Lib.
10.
Con-
fess. c.
27.
l Luc.
17. 21.

Lib. 4.
de con-
templ.
c. 13.

3. Semper debet anima sancta, & veri sponsi amica, vt docet Richardus, ad dilectum suum summo cum desiderio inhiare, parata semper & vocanti occurrere, & pulsanti apere. Sed in hac introuersione & praxi aspirationum, sicut & in reliquis exercitijs, vulgatum illud attendere debet, *Ne quid nimis*: ne videlicet vltra vires assumantur, ita vt caput grauetur ex nimia attentione, vel intensione affectus. Cauendum quoque ne nimis extendat intellectum; ne si altiùs, quàm oporteat, volare tentauerit, à simplicitate aberrans internis tenebris inuoluatur, ex quibus intolerabiles miseriæ & anxietates oriri solent. Discretio hîc necessaria est, & simplicitas cum suauitate conjuncta, sicut dicit Scriptura, *Mel inuenisti, comede quantum sufficit.*

Prou.
25. 16.

4. Eliciendæ sunt Aspirationes non perfunctoriè & festinanter, sed cum matura serenitate spiritus, & interiori harmonia; ita vt reuera sentiat anima se Deum quærere, & ipsum velle in mente sua inuenire, non alia

de causa, nisi vt ipsum diligat toto corde, totis viribus, tota virtute. Proderit aliquando, ex doctrina Seraphici Bonauenturæ, puras manus ad cœlum leuare, & suam interdum audire vocem: proderit ad subleuandam intentionem in cœlum suspicere; sed cauendum ne extra se vagetur spiritus, & ne ipsæ Aspiraciones sola voce prolatae steriles fiant, & sine fructu. Spiritus enim fertur in Deum per anagogicos excessus oculo intellectûs ferè clauso, ac sopitis eius discursibus, cum sancto silentio ac feruentissimo affectu. Quare minima pars intellectui, maxima voluntati tribuenda est.

5. Conuenit hoc exercitium illis præsertim, qui animam iam à vitijs expurgarunt, & aliquantulum in via illuminatiua, studioque virtutum, & exercitio meditationis profecerunt. Postquam enim anima ab affectu seculi mentalis orationis exercitatione abducta fuerit, ita vt sentiat diuinum in se ignem succensum, relicto statu meditationis ad statum transit aspirationis, post quem demum ad con-

Spec.
discipl.

P. I.
partic.
2. c. 6.

De
orat.
c. 57.
Gradu
28.

m I.
part.
c. 19.
n I.
part.
decif.
4. art.
10. &
decif.
6. per
totam.
o Af-
cens.
mon-
tis
Carm.
I. 2. c.
13.

templationem, & ad mysticam Theologiam pertingit. Rectè S. Nilus, *Si es Theologus, verè orabis; & si eris Theologus, & verè orabis, Theologus verè eris.* Et B. Ioannes Climacus: *Statum tuum oratio tua manifestat tibi, hanc enim Monachi esse speculum tradunt Theologi rectissime.* Sententia hæc est omnium Mysticorum post orationem vocalem & meditationem poni aspirationes, tanquam modum orandi perfectiorem, per quem fit transitus ad orationem internam, & diuinitus infusam. De qua re legendi sunt duo viri eximij ex Ordine Capucinorum, Benedictus Anglus in Regula perfectionis^m, & Victor Geleniusⁿ in Praxi mysticæ Theologiæ. An verò deferendus sit status meditationis tribus indicijs cognoscas: quæ tradit Ioannes à Cruce^o in Ascensu montis Carmeli. Primum est, si iam non possis meditari, neque imaginationis opera vti, nec vllam ab hac re mentis refectionem, sed potiùs ariditatem percipias. Secundum, si nec placeat, nec gratum sit animæ tuæ ex industria occupare

imaginationem, & defigere in aliquo objecto. Tertium, quando libet & placet animæ solam manere cum amorosa ad Deum attentione in quadam interiori pace & quiete, absque actu saltem discursiuo potentiarum. Tria hæc indicia simul sumpta in te animaduertere debes quicumque optas à statu meditationis tuò ad alium sublimiorem progredi.

6. Requiruntur alia quædam ad hoc exercitium, puritas cordis, rectitudo intentionis, perfecta abnegatio & nuditas ab omnibus imaginibus & idolis creaturarum; fuga curiositatum, inutilium sermonum, humanarum consolationum, & vanarum occupationum; desiderium semper proficiendi, humilitas, mens libera, & expedita ab omni terrena delectatione; lectio spiritualis, collocutio de rebus diuinis; internum, externumque silentium, sicut scriptum est: *Qui minoratur actu percipiet sapientiam.* Quælibet vel minima inordinatio, quicumque tenuissimus affectus erga aliquam creatu-

Eccli.
38. 25.

Gerla-
cus in
solilo-
quijs c.
25.

ram, quævis leuior offensa, aut exterior distractio, moram iniiciunt animæ ad vnionem cum Deo prope-
peranti. [Quantumcunque enim, *ait quidam vir sanctus*, profecisse videamur ad extra in bonis spiritua-
libus, & apparentijs, seu in reputa-
tione sanctitatis, totum inane, & paruum est; nisi interior homo fuerit reformatus, & Deo confor-
mis.] Constat autem ex his non exigi ad hanc sapientiam acumen inge-
nij, & multiplicem cognitionem, sed simplicitatem, & purum atque ar-
dentem affectum, cum assistentia Spi-
ritus sancti, qui super humiles & par-
uulos requiescit. Quare multum lu-
gendi sunt illi, qui solis externis exer-
citijs contenti, & interiorem animæ fundum negligunt, & sanctam cum Deo vnionem. Nunquam enim satiari anima poterit, & si omnibus spi-
ritualibus diuitijs abundet, nisi per amoris contactum, & intimam vnio-
nem Deum consequatur. *Fecisti nos Domine ad te*, inquit Augustinus, & *inquietum est cor nostrum, donec requiescat in te*: donec scilicet arctissi-

Lib. I.
Con-
fess.
c. I.

mo tecum amoris vinculo conjungatur.

7. Solet praxis aspirandi dura admodum, & difficilis nondum exercitatis apparere. Natura enim instabilis & libera, varijsque cogitationibus & desiderijs assueta frœnum diuini amoris pertinaciter fugit: & quia statim fructum non videt, tanquam laborem nullius momenti contemnit. Sed hoc commune est omnibus exercitijs, quorum initia semper sunt difficilia: labor autem assiduus omnia vincit, & cùm laudabilis consuetudo firmiter in anima stabilita fuerit, quasi in naturam transibit, rebusque diuinis tam facile intēdet, quàm facile spirat ac viuit. Accedit gratiæ auxilium, quod assiduè implorare oportet: nam vt ait Chrysostomus,

Supra vires hominis est serere cum Deo colloquium, nisi adsit vis, & actus Spiritus sancti. Vnde sicut ad calorem nulla propinquior dispositio inuenitur, quàm ipsemet calor; ita nulla ad orationem conuenientior præparatio ipsa oratione. Quod si anima interdum langueat, ita vt agrè aspira-

Lib. 2.
de orat.

i. p. de-
cif. 6.
art. 5.

iones producat; aliqua pia meditatione utendum est, donec cor meditando incalescat, & mox ad aspirationes redeundum. Docet hoc Genlenius, & addit debere vnumquemque in hunc finem sibi ipsi instituere colloquia plangentia sui ipsius vilitatem & infidelitatem circa mortificationem & virtutes: quæ si desint petenda erunt ex meditationibus, & soliloquijs Sancti Augustini. Si verò nec meditatione, nec huiusmodi colloquijs cor excutitur, non propterea abijcienda spes est, sed constanter perseverandum difficulter agendo, & varias aspirationes quantumvis frigide & aride eliciendo, quo ad vsque probata fide victoria à Domino misericorditer concedatur. Tale est augmentum sanctarum exercitationum, quale & plantarum, quotidie crescunt, quantumvis id non appareat: processu verò temporis creuisse videbis, licet ipsum non videris incrementum.

8. Cum eliciuntur Aspirationes extendenda intentio est ad finem ipsarum, qui est animam purifi-

care, & disponere, aptamque red-
dere ad contemplationem, & vnio-
nem cū Deo. Qui gressum men-
tis in ipsis figit, nihil agit; quia juxta
Sanctorum Patrum vulgatissimum
proloquium, non progredi in via
Domini retrogredi est: & qui non
ascendit, descendit. Omnis fructus
& finis orationis, ex sententia Bona-
uenturæ, est Deo adhærere, & vnum
cum eo spiritum fieri per liquefactio-
nem purissimi amoris, & speculatio-
nem serenissimæ cognitionis, & abs-
consionem in Dei vultu ab omni
mundanorum strepitu, per excessum
quietissimæ fruitionis; vbi omnes vi-
res animæ, & potentiæ à suis disper-
sionibus simul collectæ, & in vnum
verum, & simplicissimum, ac sum-
mum bonum fixæ, in quamdam di-
uinæ confortationis & æternæ stabi-
litatis similitudinem transformatur.
Ad hunc finem datæ sunt nobis à crea-
tore vires animæ nostræ, non vt eas
rebus terrenis mergamus, sed vt eas
sanctis aspirationibus ad ipsum Deū
efferamus, ad quem possidendum
conditi sumus; & his quasi brachijs

De
procef.
Relig.
proc.
7. cap.
14.

bonum nostrum, nostramque felicitatem amplectamur.

9. Qui ex hac saluberrima exercitatione vberes fructus percipere cupit, nulla vnquã die, imò nulla hora, si fieri possit, eam intermittere debet. Cùm enim non sit opus continuum, sed morulis discretum, omnibus ferè actibus interferi potest, seu quis mente perspicax, seu tardus ingenio sit. Præclare Sanctus Ephrem: [Bonum fuerit semper orare, & nunquam deficere, quemadmodum ait Dominus. Quare siue opereris, siue dormias, siue iter facias, siue comedas, siue bibas, siue decumbas, caue orationem tuam intermiseris. Siue in Ecclesia fueris, siue domi tuæ, siue in agro: & si oues pascas, & ædificia construas, & si in symposio verferis, ab oratione caue desistas.] Olim præcepit Deus, vt ignis in altari suo semper arderet, quem nutrit, inquit, Sacerdos subijciens ligna mane per singulos dies. Altare autem Dei, vt magnus Gregorius interpretatur, est cor nostrum, in quo jubetur ignis semper ardere, quia

To. i.
hom.
de orã-
do Deū.

Leuit.
6. 16.

Lib 25.
moral.
c. 7.

AD DEVM, CAP. VII. 61

neceſſe eſt ex illo ad Dominum charitatis flammam indefinenter accendere. Sunt qui certum quotidie penſum aspirationum à ſe exigunt, quod vix probarim, niſi diſcretio adſit, & magiſtri ſpiritualis conſilium: affectum enim ſequi in his oportet, & impulſum Spiritus ſancti, qui certæ regulæ non ſubijcitur. Quidam cum legiſſet S. Bartholomæum Apoſtolum centies in die oraſſe, vt eum imitaretur, centies quotidie aſpirabat ad Deum factis ſibi quibuſdam Litanijſ ex Dei nominibus & attributis: quod qualiter fieri debeat ſcribit Iacobus Aluarez. Uſus & vnctio plura docebunt.

To. 3.

lib. 4.

P. 3.

cap. 10.

10. Concludo hoc caput aliquot documentis ab his ſpecialiter obſeruandis, quibus gratia Aspirationum à Deo conceſſa eſt. Et primò quidem ne huius doni jacturam faciant, ſe illo prorsus indignos fateantur, nec propterea inſoleſcant, ſed viliùs de ſe ſentiant, & gratiam Dei humilitatis velo occultent. Secundò caueant, ne eos contemnant, qui ejuſmodi dono carent: fieri enim poteſt vt maiorem

illi charitatem habeant, & gratiores Deo sint in sua simplicitate. Tertiò aduertant, ne aliqua præuenti consolatione ac dulcedine spirituali, nimium erga illam afficiantur, sicut ait

Psal. 61. II.

Psalmistæ: *Diuitia si affluant, nolite cor apponere.* Satiùs enim, & tutius est gloriari cùm Apostolo in cruce Domini nostri Iesu Christi, quàm in sensibili deuotione, & delitijs spiritualibus. Cessante autem operatione diuina, recurrant ad propriam, & gratiæ subtractionem patienter fiant. Quartò ita influxui diuinæ gratiæ satisfacere curent, vt vires corporales minimè lædantur: magno etenim periculo subiecta est spiritualis ingluuies, qua quis percepta gratiæ suauitate spiritum vrget indiscretè ad maiorem feruorem, quàm corpus ferat. Quintò diuinæ gratiæ abundantiam ad sui mortificationem dirigant, & ad virtutum exercitationem; nec ita sinant se deuotione absorbere, vt opera misericordiæ, & vitæ actiue officia negligant. Hæc monita Thomas à Iesu in libris de diuina oratione tradit, exercitatis au-

AD DEVM, CAP. VIII. 63
tem plura suggeret Spiritus fan-
ctus.

CAPVT VIII.

*Qui sint fontes Aspirationum, quæ
materia, quis ordo. De tripli-
ci statu Incipientium, Profi-
cientium, & Perfectorum.*

I. **F**ontes copiosissimi, è quibus
elici & hauriri possunt quàm
plurimæ aspirationes, hi ferè sunt.
Consideratio cœlestis patrię, tædium
huius miseræ vitæ, desiderium vi-
dendi Deum; diuinæ bonitatis, & mi-
sericordiæ magnitudo, Dei sapien-
tia, potentia, iustitia, & cætera at-
tributa; dolor de peccatis, affectus
gratitudinis erga Deum, amor in
Deum, zelus animarum, passio Sal-
uatoris, amor Dei erga nos, diuinæ
prouidentię admiratio, & deside-
rium patiendi pro Christo. His ac-
cedunt actus abnegationis, pœni-
tentię, charitatis, humilitatis, &
cæterarum omnium virtutum. Quo-

rum omnium materia desumi potest
vel ex proprio cujusque affectu & de-
uotione; vel ex verbis sacrae Scriptu-
rae, vel ex Sanctis Patribus, alijsque
pijs Scriptoribus. Sacra Scriptura,
maximè verò in Psalmis, hujusmo-
di affectuum feracissima est: & hi cæ-
teris præferendi, quia nihil Deo gra-
tius esse potest, quàm si verbis à Spi-
ritu sancto dictatis eum alloquamur.
Sequuntur opuscula Sanctorum Pa-
trum, & mysticorum Theologorum,
quæ vberriam aspirationum mate-
riam suppeditant; præsertim confes-
siones S. Augustini, & ejusdem so-
liloquia, Manuale, & Meditationes:
opera item S. Laurentij Iustiniani,
Dionisij Cartusiani, Ioannis Lanf-
pergij, Thomæ à Kempis, & Ludo-
uici Blosij, aliorumque recentio-
rum P.

p Vide
Iacob.
Alua-
rez to.
3. &
Viam
vitæ
æternæ
Ant.
Suc-
quet.
¶ Init.
lib. 2.
de cæ-
les. cõ-
uers.

2. Thomas Massutius 1 triplicem
librum describit, vnde materia As-
pirationum desumi potest. Primus
liber magnus est valde, semper aper-
tus, omnibus visibilis. Secundus par-
uus, occultus, omnino inuisibilis, & à
paucis tantummodò intelligibilis.

Tertius magnus, & paruus; apertus,
 & clausus; visibilis & inuisibilis, &
 ex se intelligibilis. Primus est Mun-
 dus, qui, vt ait Basilus, perinde est
 ac liber literis exaratus palam conte-
 stans & prædicans gloriam Dei. Hu-
 jus quatuor sunt paginæ euoluendæ,
 à quo factus sit, ad quid, quâ ratio-
 ne, & quanta rerum varietate exor-
 natus. Hunc verò nonnulli inutili-
 ter legunt, vani scilicet & curiosi
 mundi sapientes, quales fuerunt in-
 fideles, qui cùm Deum cognouissent,
 non sicut Deum glorificauerunt, sed
 euanuerunt in cogitationibus suis:
 alij perniciosè, qui tanquam pueri
 alphabeti solam externam spe-
 ciem creaturarum respicientes, inde
 sumunt occasionē recedendi à Crea-
 tore, vt adhæreant creaturæ: qui-
 dam vtiliter & cum fructu spiritali,
 qui Deum in creaturis contemplan-
 tur, & in singulis operibus condito-
 ris sapientiam, bonitatem, poten-
 tiam, & reliqua attributa laudant,
 prædicant, admirantur. Secundus
 est conscientia, siue cor nostrum
 prauum, profundum, & inscruta-

Homil.
 II. exa-
 mer.

bile. In eo legere oportet quid fuit homo, quid est, quid erit: quid potuit, quid possit, quid poterit: quid fecit, quid nunc faciat, quid facturus sit. Deinde obseruandum à quo sit scriptus, quæ sint in eo scripta, & ad quem finem. Scriptus est autem à Deo, & à nobis, sed stylo valde diuerso: à Deo literis aureis inspirationum, admonitionum, legum, & dictaminis rectæ rationis: à nobis atramento culparum, & imperfectionum. Tertius est sacra Scriptura, cujus sunt libri historici, prophetici, morales & mixti: in quibus quot apices, tot mysteria; quot verba, tot sunt incentiua nostri erga Deum amoris: si tamen legatur eo spiritu, quo scripta est.

3. Quod verò spectat ad ordinem Aspirationum, ille in praxi omnino promiscuus est. Nimia enim amoris fecunditas est, nec attendit quo ordine, qua lege, quæue serie erumpat. Interdum nec verba requirit, nec voces omnino vllas, solis ad hoc contentus suspirijs: tunc præcipuè quando voluntas accensa est, quia

runc, vt monet Seraphica Virgo Teresa, tollendi sunt discursus intellectus, & strepitus verborum, ne his tanquam lignis amoris scintilla opprimatur & suffocetur. Aliæ quidem Aspirationes incipientibus, aliæ proficientibus, aliæ perfectis conueniunt: sed quandoque incipiens proficientium, & perfectorum orationes assumit, vt discat ad altiora cor suum erigere: & isti vice versa incipientium aliquando induunt affectus, ne perdant humilitatem, dum semper habitant in excelsis. Porro affectus incipientium sunt horror inferni, detestatio peccati, timor iudiciorum & iustitiæ Dei, contritio, petitio veniæ, odium & contemptus sui, suæ vilitatis cognitio & erubescencia. Proficientium, imitatio Christi & Sanctorum, gratitudo, perfecta abnegatio, amor virtutum, & desiderium eas acquirendi. Perfectorum, gaudium spirituale, admiratio diuinæ maiestatis, amor Dei, ingens desiderium sanctificationis nominis eius, & aduentus regni ipsius.

Vitæ
suæ
cap. 15.

4. Triplex igitur est status vitæ spi-

Homil. ritualis, quia, vt dicit D. Gregorius,
 15. in aliud sunt virtutis exordia, aliud pro-
 Ezech. fectus, aliud perfectio. In primo sta-
 tu sunt incipientes quasi tyronum
 agmen; in secundo proficientes qua-
 si tyrocinium prætergressi; in tertio
 De Ec- perfecti, quasi milites veterani. San-
 cl. my- ctus Maximus martyr primos ser-
 sta- uis, medios mercenarijs, postre-
 gogia mos filijs comparat. Angelicus Do-
 c. 24. ctor tribus ætatibus hunc triplicem
 S. Tho. statum assimilât, infantia, iuuentu-
 2. 2. q. ti, & virilitati: vt enim docet Augu-
 24. a. 9. stinus, *Nascitur charitas diuina ope-
 rante misericordia, cum nata fuerit,
 Tract. crescit & roboratur, roborata denique
 5. in perficitur.* Primus status purgat, se-
 Epist. cundus illuminat, tertius perficit: qui
 Iohan. sunt tres actus Angelicæ & humanæ
 Hierarchiæ à Dionysio Areopagita
 descripti. S. Bonauentura tres assignat
 Part. 5. operationes, quas juxta hanc tri-
 Breni- plicem viam charitas in anima exer-
 logij c. cet. Primam vocat virtutis vigorem,
 10. quia mediante vigore gratiæ anima
 purgatur à peccatis: secundam veri-
 tatis splendorem, quia studio mor-
 tificationis diuinorum cognitione ani-

ma illustratur: tertiam charitatis ardorem, quia vi amoris anima in Deum transformatur. Via purgatiua purgat ac perficit sensus, illuminatiua rationem, vnitiua spiritum siue mentem, quæ est animæ superior pars. Purgatiua Deo Patri appropriatur, cui potentia attribui solet: illuminatiua Deo Filio, tum quia est sapientia Patris, tum quia hæc via in Christi imitatione consistit: vnitiua Spiritui sancto, cuius proprius effectus est vnio per amorem. In prima cognoscit homo seipsum, in secunda Deum, in tertia studet vnioni & transformationi in ipsum: quia omnis vitæ spiritualis substantia ad hæc tria puncta refertur; quid sit homo, quid sit Deus, & qualiter hæc duo vnum per amorem efficiantur. Sicut ignis cum in lignum viride operatur, primò frigus & humiditatem tanquam obstacula sua expellit; deinde calorem & siccitatem immitit, veluti qualitates ad aditum suum necessarias; ac tandem intimè illi vnitur; sic ad vnionem animæ cum Deo, primùm amoliri oportet om-

nia impedimenta, postea requisitas dispositiones adferre: quibus peractis infallibiliter vnio subsequetur.

5. In primo purgantium statu sunt peccatores post conuersionem, qui præterita peccata puniunt, & pugnant ne iterum labantur in ea; qui prauos habitus exsecant, & passionnes interimunt. Et idèd carnem castigant jejunijs, vigiliis, laboribus, aliisque austeritatibus; lacrymisque & contritioni operam dant. In secundo proficientium illi degunt, qui terrenorum affectum deponentes puritati student, & virtutum acquisitioni: virtus enim est proprium, ac verum animæ lumen. Crebris id cird meditationibus de Christi virtutibus & doctrina vrgent semetipsos, & accendunt ad imitationem. In tertio demum illi quiescunt, qui purgata iam mentis acie arcano nexu Deo vniri merentur, & ea pace fruuntur, quæ exsuperat omnem sensum. Vna sanè est charitas, cui omnes isti incumbunt, sed gradus, & incrementa diuersa sunt. Contingit autem

nonnunquam, Deo sic disponente, ut tyrones perfectorum prærogatiuis locupletentur, & ad diuinæ contemplationis altitudinem, quamuis breuimora, eleuentur: ne fortè obiecta virtutis difficultate, ac temptationum pressura territi, ab incæpto itinere resiliant. Sicut è contrario acerrimis temptationibus perfectiores animæ aliquando infestantur, Deo permittente; ne, sicut de ipso testatur Apostolus, magnitudine reuelationum extollantur. Gustata enim à pœnitentibus suauitate spiritus, desipiunt illis mundus & caro: & cùm perfectus incipientium molestias patitur, despicit se ipsum, & impensius laborat, ac si ab apice perfectionis longo admodum itinere distaret.

6. Sunt autem hîc tria aduertenda, quæ ex dictis colliguntur. Primum, quod cùm vita spiritualis duplex sit, actiua & contemplatiua; ad actiuam duo priores status pertinent, tertius ad contemplatiuam. Secundum, quod amor, de quo loquimur, & in quo sita est Christiana perfectio, non

est amor afficiens, siue affectuosus, ut aiunt, sed efficiens, practicus, & obedientialis, qui à proprio bono voluntatem omnino abducit, Deoque subijcit, ejusque voluntati tam imperanti quàm consulenti conformem facit. Affectus quidam teneri & molles, ignavi sunt & otiosi, & lacryma nihil citius arescit. Si quis Dominus seruum habeat, qui domini otiosus sedeat, magnificentiam eius & opes semper contemplans, & nihil aliud obsequij præstet, is certè hunc seruum tanquam muneri suo ineptum arguet, & à seruitio amoueabit. Ideò Christus obseruantiam mandatorum præcipit, & Sancti Patres studium bonorum operum super omnia commendant. Ad hunc amorem practicum omnes aspirationes dirigi debent, ex illo quippe oritur vera & solida deuotio, purum gaudium, atque acquisitio virtutũ. Tertium, quod licet distinxerimus tres supradictos status penes tria officia & exercitia, puritatis scilicet, lucis, & amoris; non id tamen eo sensu intelligendum est, ac si purgatio ad cæteros

terôs status, illuminatio ad primum
& tertium, & perfectio ad duos prio-
res non extendatur: In vnoquoque
enim omnes actus hierarchici repe-
riuntur, & in purgatiua non solum
emundatio à peccatis, sed etiam no-
titia veritatis, & Dei amor viget,
& sic de reliquis; tantòque excellen-
tius isti actus fiunt, quantò status est
sublimior. Idcirco tamen vnicui-
que statui proprium destinatur offi-
cium, quia illi congruentius, ma-
gisque essentiale est, & ad ipsum duo
reliqua dirigere oportet: in primo
nimirum lucem & amorem ad pur-
gationem, in secundo purgationem
& amorem ad illuminationem, in
tertio puritatem & lucem ad amo-
rem. Hac autem actuum cōmunica-
tione fit*, vt & dolor ex amore dul-
cior sit, & amor ex causis ritè per-
pensis iusti doloris securior, & inci-
tator: cumque commiscantur actus
vnius viæ cum actibus & exercitiis
alterius, incipientes ad maiora iugi-
ter aspirant: proficientes verò & per-
fecti memoriam retinent & affectum
earum rerum, quæ sunt fundamenta

*Hêric.
Mo-
rus
in Me-
thod.
exer-
cit. S.
Igna-
tij.

74 VIA COMPENDII
perfectionis, & prima principia san-
ctitatis.

C A P V T IX.

*Transitus ab Aspirationibus ad
contemplationem. Addita que-
dam de Aspiratione passiva.
Quid sit Contemplatio. Eius
objectum, & cause.*

Vita
Pat. lib.
5. libel.
XI.

I. **A**spirationibus tanquam aliis
euehitur Anima ad felicissi-
mas cum Deo nuptias : earum enim
mediante usu id euenire potest quod
dixit Abbas Allois : *Quia si vult ho-*
mo, in una die vsque ad Vesperam per-
uenit ad mensuram Diuinitatis. Sed
hoc rarum, difficillimum, & vix in-
telligibile est ; & nos infra de dura-
tione status aspirationū differemus.
Nunc videndum quo pacto ab illis
ad contemplationem fiat transitus.
Reuocata si quidem ad interiora sua,
mediante aspirationum actiuitate,
inferioris hominis capacitate, & ele-

uata ad Deum mente motibus anagogicis, affectuque succenso, spiritus rationalis à vinculis passionum & fallaciis seculi expeditus, ad cælestia perlustranda lumen internum dirigit, & ad statum transit altissimæ, ac diuinæ contemplationis. *Illuxerunt*, inquit Psalmographus, *coruscationes tue orbem terræ; vidit, & commota est terra.* Sunt enim Aspirationes quasi subitanæ illustrationes, quibus subinde coruscantibus, terra humani cordis admiratione cælestium excitata, terrena relinquens ad superna eleuatur Quia verò celerimè motiones istæ anagogicæ peraguntur, nisi aspirans cogitationes impertinentes, quæ animo sese ingerunt, reijciat, aliamque protinus substituat aspirationem, cujus additione distractio cohibeatur, haud fieri poterit, quin mens prona ad euagationem statim ad externa dilabatur, quæ sensibus obijciuntur. Hanc calamitatem in seipso experiebatur, & sic deplorabat Augustinus: [Aliquando intromittis me in affectum multum inusitatum introrsus, ad nescio

Psal.
76. &
96.

Lib. 10.
Cōfess.
c. 40.

quam dulcedinem: quæ si perficiatur in me, nescio quid erit, quod vita ista non erit. Sed recido in hæc ærū-
 nos ponderibus, & resorbeor solitis, & teneor, & multum fleo, sed multum teneor. Tantum consuetudinis sarcina digna est. Hic esse valeo, nec volo; illic volo, nec valeo, miser utrobique.] Satagendum est itaque, ut spiritus in se ipso conclusus, atque à distractionibus, affectu-
 que inordinato liber exardescat sicut ignis; & suspiriis ac desideriiis pie scintillantibus seipsum bene afficiat, & Deo conjungat.

¶ Part.

1. dec.

6. art.

6. &

Can-

feld. de

volunt.

Deip. 1.

cap. 18,

¶ Dio-

nyf. c.

1. myst.

Theo-

logiæ:

& epist.

¶ d. Ca-

sum.

2. In hoc statu aspirationis vix ultra annum deuotus exercitator detinebitur, ut Gelenius obseruat^r: solet enim eo spatio emenso ad firmum intuitum contemplationis transire, ut ignem amoris intus clausum ab instantaneo motu anagogico ad ampliora spiritualis magnitudinis spatia extendat. Si quis tamen gratia abundantiori à Deo præuentus, & illustratus fuerit, breuissimo tempore, & ut Mystici nonnulli asseuerant^s, intra duos menses ad magnam perueniet

contemplationem. Vtrum verò transire quis debeat ab Aspiratione ad contemplationem hoc indicio cognoscer : si constet experientia orationes jaculatorias solito ardore destitui, & internam dispositionem ad intuitus & inhæssiones spirituales inclinare, quasi ad quietem mentalem, non per gustum & intuitum transcuntem, sed qui permanens sit, & perseverans. Sunt quidam spiritus vteri sui coarctati, quasi mustum absque spiraculo, quod lagunculas novas dirumpit, qui parum memores vicissitudinis humanæ ac inconstantis naturæ, impatientissimo desiderio ad Deum feruntur, quasi velint omnia diuina quodammodo deglutire : Hi miserè decipiunt se ipsos, quia mox fatigati deficiunt, & internam animi serenitatem adeò necessariam ad contemplationem obscurant, & perdunt. Alij inconsultò statum Aspirationum deserunt, ne minus proficere videantur, quam cæteri, quos legunt vel audiunt in altiori statu versari : & hi consilio ac humilitate carentes præcipitio pro-

ximi sunt & ruinæ, quia sine duce
viæ, sine ope scilicet diuinæ gratiæ,
per ignotas sibi semitas iter difficilli-
mum arripiunt. Alij denique subti-
lioris ingenij nudis discursibus & spe-
culationibus intellectus contēti, pos-
se se illis Deum possidere existimant,
sine amore, qui nos similes Deo fa-
cit: & hi similes sunt antiquis Philo-
sophis, euanescentes in cogitationi-
bus suis, & colentes pro Deo suo
phantasmata sua. Quælibet enim
speculatio intellectus est quid huma-
num, quod nos in proprio carcere
vinctos detinet: amor autem est quid
diuinum, quod nos eleuat & rapit
extra nos, atque in Deum transfor-
mat. Quare Dionysius Timotheum
monet, vt omnia intelligibilia trans-
cendat, & ad Caium scribens ait: [Di-
uinæ tenebræ omnem abscondunt co-
gnitionē, & si quis viso Deo, cognouit
id quod vidit, nequaquam ipsum
vidit, sed aliquid è rebus eius, quæ
existunt & cognoscuntur.] Cui con-
sonans Maximus Martyr: [Vnus, in-
quit, Deus sine principio, incom-
prehensibilis, totam vim vt sit ha-

bens per totum, notionem quando
& quomodo sit penitus repellens, ut-
pote nulli eorum qui sunt ex repræ-
sentatione naturali cognitus.] Qui
putant aliter se posse Deum intellige-
re & contemplari, parum tutâ gra-
diuntur viâ; solido enim fundamen-
to pietatis destituti, cùm naturalis
de Deo oblectatio disparuerit, ad
fallaces seculi voluptates miseran-
do lapsu reuertentur.

3. Non est hoc loco omittendum,
quod Ioannes à Cruce in Flamma Cantu.
amoris viua scriptum reliquit, præ- 4.
ter aspirationes, de quibus hætenus
differuimus, esse aliam aspirationem
arcanam, occultam, & passiuam,
quam Deus in anima mirabiliter
producit, aspirans illi Spiritum san-
ctum, qui profundissimè illam ab-
sorbet, & amore sui inflammat super
omnem gloriam, & sensum: in cen-
tro enim animæ, quæcumque illa sit,
latenter moratur Deus, sed cum dis-
crimine. In quibusdam manet velut
extraneus in aliena domo, nihil im-
perans, aut efficiens. In aliis liben-
ter habitat, quasi in propria domo,

regens illam & gubernans. Talis est anima, in qua nullus iam appetitus, nullæ imagines, aut formæ creaturarum reperiuntur: huic enim se intimè Deus communicat, hanc amplectitur, in ea quiescit, eique se ipsum reuelat eam excitando, & ad proportionem notitiæ Diuinitatis ipsi concessæ eidem aspirat, illam replens Spiritu sancto, ejusque gloria & bonitate. Cæterùm hæc Aspiratio passua ineffabilis est, & ab illis vix intelligitur, qui ea felicissimè perfruantur. Hac igitur prætermissa, quædam breuiter de Contemplatione, quæ statum Aspirationis subsequitur, pertractanda sunt.

4. Contemplatio propria Mysticorum functio, & optima pars humanæ vitæ, habet pro scopo suo & objecto ipsummet Deum, vt D. Thomas testatur: consistit autem in visione quadam suauis, quieta, & amabili veritatis æternæ, quam sine discursuum varietate sincerè aspicit, & penetrat, ingenti amore, atque admiratione tantaque certitudine, & claritate, vt facie ad faciem, sicut de

2. 2. q.
180.
art. 3.
& 4.

Moysè dicit Scriptura, Deum intue- Exod.
 ri dicatur, non quemadmodum Bea- 3. II.
 ti in gloria, sed minori quodam lu-
 mine, caliginoso, & fidei innixo,
 quæ ab eo valde perficitur, & clari-
 ficatur. Ex cognitione verò accendi-
 tur amor, & vicissim ex amore ipsa
 crescit cognitio. Amor enim ignis
 est ardens & lucens, & ardens in vo-
 luntate illuminat intellectum; impel-
 litque nos ad ibi figendos oculos, vbi
 est thesaurus, quem diligit cor no-
 strum, cujus bonitas & pulchritudo
 cum sit immensa & infinita, acriores
 iterum amoris flammæ in corde suc-
 cendit, ex quibus crescit videndi de-
 siderium; nec vllus est finis, donec
 anima Dilecto adhæreat, & vnus fiat
 cum eo spiritus in æternum. Opti-
 mè Clemens Alexandrinus: [Non 5. Stro-
 cessabit qui quærit, donec inueniat; mat.
 cum autem inuenerit admirabitur,
 admirans regnabit, regnans con-
 quiescet.] Est igitur contemplatio, si
 latinæ vocis notionem respiciamus, Cicero
 rerum occultarum consideratio, seu 1. Acad.
 veritatis inuestigatio: Theologicè & 4. de
 verò accepta, est terminus meditatio- finibus.

e Siue
 Aucto-
 ris lib.
 de spi-
 ritu &
 anima
 apud
 Au-
 gust.
 u lib. 2.
 de Cō-
 fid. c.
 2.
 x Lib.
 1. de
 con-
 templ.
 c. 4.
 y Vide
 Maxi-
 mil.
 San-
 ctum
 myst.
 Theol.
 lib. 1.
 com-
 ment. 8.
 z Sua-
 rez to.
 2. de
 Relig.
 lib. 2.
 c. 9.
 a 1. 2.

nis, siue considerationis, qui est ve-
 ritatis quæsitæ & inuentæ intuitio,
 Auctor libri de spiritu & anima inter
 opera D. Augustini¹, sic eam defi-
 nit: [Contemplatio est perspicuæ
 veritatis jucunda admiratio.] Con-
 sonat Bernardus^u: [Contemplatio
 est verus, certusque intuitus animi
 de quacumque re; siue Apprehensio
 veri non dubia.] Aliter Richardus^x,
 aliter alij^y. Breuissimè D. Thomas^z,
 [Contemplatio est diuinæ veritatis
 simplex intuitus.] Fusius & clarius
 Iacobus Aluarez^a, [Est liber, per-
 spicax & certus intuitus Dei ac re-
 rum cœlestium, admirationem infe-
 rens, in amorem desinens, & ex amo-
 re procedens.] Dicitur intuitus, quia
 non est opus rationis discurrentis, &
 inquirentis veritatem, sicut Medita-
 tio, sed opus intelligentiæ veritatem
 simpliciter absque discursu inspiciē-
 tis. Liber autem vocatur ex parte ho-
 minis, quia liber esse debet à pecca-
 tis, ab affectibus inordinatis, & à
 curis superfluis: ex parte actus, quia
 animus à rebus terrenis expeditus,
 quasi auis in aëre, liberrimo motu

vagatur, quocumque Deus illum quaest.
 fert: ex parte objecti, quia illud nu- 180.
 dum ab imaginibus sensibilibus, vel art. I.
 in ipsis sibi patefactum contempla- & 3.
 tur. Est etiam perspicax, id est cla- To.
 rus, apertus, & conspicuus, non in 3. lib.
 lumine gloriæ, sicut in patria, sed in 5. P. 2.
 lumine fidei, quam lux sapientiæ per- c. P. I.
 ficat, & exacuit. Certus præterea
 est, licet non excludat fidei obscuri-
 tatē, quia de rebus diuinis eò certio-
 res reddimur, quò clariùs eas perspi-
 cimus. Hic verò intuitus admiratio-
 nem maximam infert, quia licet ob-
 jecta, quæ contemplamur, iam no-
 bis cognita & perspecta sint, tam no-
 uo tamen, & insolito modo propo-
 nuntur, vt stupenda & mirabilia vi-
 deantur. Tandem contemplatio ab
 amore Dei incipit, & in amorem de-
 finit: tametsi enim essentialiter sit
 actus intellectus, principium nihilo-
 minus habet in voluntate, quia ex
 charitate Dei ad eius contemplatio-
 nem incitatur: & quia finis corres-
 pondet principio, finis quoque eius
 est in affectu, dum in visione rei
 amatae delectamur, & ipsa delec-

ratio magis excitat amorem.

5. Multiplex est objectum circa quod versatur contemplatio, Deus in primis optimus maximus, ut iam supra dictum est, eiusque infinitæ perfectiones. Deinde Christus Redemptor noster, & quicquid ad illum spectat: B. Virgo, Angeli, & Sancti, eorumque dotes, & beatitudo statûs Ecclesiæ militantis, & eiusdem persecutiones & triumphi: mundus iste visibilis, & omnes creaturæ, quatenus perducunt nos ad Dei cognitionem, & amorem: atque ut vno verbo omnia complectar, quicquid ad meditandum assumitur, materia est quoque contemplationis, nisi quod meditatio inuestigat, contemplatio degustat: illa discurrit circa objectum, hæc simpliciter intuetur. Causa proxima unde oritur, est Spiritus sanctus mediantibus donis suis, sapientiâ præsertim & intellectu. Sapientia enim cõfert intellectui cognitionem altissimam, & simplicissimam rerum diuinarum, cum quadam mirabili suauitate, sapore, atque dulcedine. In-

tellectus intellectui nostro superad-
ditur, vt res fidei intimiùs penetret,
& subtiliùs apprehendat. Scientia
fidei veritates manifestat rationibus
capacitati nostrę accommodatis, ele-
uatque spiritum nostrum à creaturis
ad Creatorem, & ab eis cor nostrum
auellit, docens nos aspicere ea quę
habent à Deo, & bonum quod per il-
las nobis confert. Consilium perfici-
cit mentem nostram, vt se mobilem
præbeat ad dictamina Dei, & vt dis-
cernat in quauis occasione quid fa-
ciendum aut fugiendum sit. Pietas
voluntatem exornat, & excitat in ea
piam affectionem ad opera diuini
cultus, & misericordię erga proxi-
mos. Neque enim otiosa est con-
templatio, sed practica esse debet, &
dirigere non solùm ad cognitionem
& amorem, verùm etiam ad operan-
dum, & exequendum quod Deus iu-
bet. Fortitudo corroborat ad opera
difficillima, vires naturę exceden-
tia, ita vt exeamus ab ipsa contem-
platione quasi leones Dæmoni for-
midabiles. Timor denique impri-
mit cordi magnam erga Deum re-

b Ruf-
 broch.
 in re-
 gno
 Deum
 aman-
 tium.
 Har-
 phius
 l. 3. p.
 1. c. 10.
 & 11.
 Massut.
 de Cæl.
 conu.
 lib. 4.
 Alua-
 rez to.
 3. lib.
 s. p. 2.
 c. 4.
 Ponte
 in Du-
 cespi-
 rit.
 tract.
 3. c. 3.
 s. 1.
 Bona-
 uent.
 in
 tract.
 deip-
 sis.
 c Tract.

uerentiam, & in prosperis atque ad-
 uersis nos diuinæ voluntati perfe-
 ctissimè subdit. Plura de his Scrip-
 tores Mystici^b. Dionysius Richelus^c
 post dona Spiritus sancti tres adhuc
 causas contēplationis enumerat, fer-
 uidum scilicet amorem Dei, abstra-
 ctionem mentis ab omni operatione
 circa res creatas, & conatum men-
 tis ad extensionem, ac defectionem
 suam in Deo. Et amor quidem ad-
 mirabili circulo causa simul est, &
 effectus contemplationis, vt supra in
 eius definitione notatum est. Abstra-
 ctio autem pertinet ad præparatio-
 nem ipsius, vt idem Dionysius alibi^d
 scribit. Quod verò de conatu dicit
 prudenter intelligendum est: nam
 contemplatio donum Dei est, quæ
 neque industria nostra, neque labo-
 re comparari potest; quia tamen dis-
 positiuè, vt aiunt, nos circa eam ali-
 quid agimus, ad hoc applicare co-
 natum nostrum debemus, vt præuiis
 dispositionibus ad eam præparemur;
 abnegatione nimirum, mortificatio-
 ne, puritate vitæ, meditatione, iu-
 gi præsentia Dei, & exercitio Aspi-

rationum. [Status enim diuinus, te-
 ste Hefychio ^e, nascitur in animo
 nostro ex continua Dei memoria, &
 assidua eius inuocatione.] Per vi-
 tam verò practicam, siue actiuam, vt
 ait Olympiodorus ^f, quæ est veluti
 præuia introductio ad theoricam,
 peruenimus ad contemplandam di-
 uinarum rerum sublimitatem. Vt
 enim tutum non est cum veste nata-
 re, ita nec cum passione aliqua Theo-
 logiam attingere, vt sapienter Cli-
 macus scribit ^g. His igitur præpara-
 tionibus ritè præmissis, ad fores di-
 uinæ sapientiæ cum magna longani-
 mitate & constantia pulsare oportet,
 quousque ad contemplationem ip-
 sius, ipsa auspice, introducamur; ac
 tandem ad arcanam cum Deo vnio-
 nem eleuemur, quæ est finis contem-
 plationis, & hujus mortalis vitæ su-
 prema beatitudo.

de con-
 templ.
^d De
 fonte
 lucis
 c. 9.
 inf.
^e Cen-
 tur. I.
 c. 96.
^f In Ec-
 cles.
 cap. 7.
 v. 12.
^g Grad.
 27.



CAPVT X.

Indicantur Auctores, qui de contemplatione scripserunt. Quotuplex ea sit. Qui eius gradus & status. Exempla diutine probationis, & patientie in desolatione. Diuisio Animæ, & potentiarum eius secundum Mysticos. Hymnus ad Deum.

I. **Q**Uæ de contemplatione dicenda forent, paucis verbis perstringo. Quid enim opus pluribus? Patent fontes. Omnes Mystici Scriptores, & qui de ea ex professo agunt, Richardus Victorinus libris quinque, Dionysius Cartusianus libris tribus, & aliis opusculis, Iacobus Aluarez libro quinto tertij tomi de vita spirituali, Ludouicus à Ponte in suo Duce spirituali, & optimè libris sex Thomas à Iesu; quibus addo eximiam Christi heroinam S. Tereſiam. Ab his petenda quæ

hic defunt. Quòd si aliquis cupit Mysticorù effata scholastico rigore examinare, Franciscum Suarez consulat in vtraque Theologia versatissimum libro secundo de oratione; & Maximilianum Sandæum in sua Mystica Theologia, & in ejusdem Clavi siue Onomastico.

2. Inter Ethnicos sapientes plures fuisse diuinorum contemplationi intentos ex scriptis Platoniorum liquet, & ex historiis. Sed vt notat Albertus verè Magnus, illorum contemplatio ob contemplantium perfectionem erat, & idè extra intellectum minimè procedebat, cujus solius illustratione posse se ad vniõnem cum summo bono peruenire, neglectâ curâ voluntatis, falsò existimabant. Nostra verò propter amorem Dei est, & idcirco ab intellectu transit ad affectum per amorem. Hæc diuiditur in acquisitam & infusam. Acquisitam voco, quam propria industria, & exercitatione, sed non sine diuina cooperatione & gratia, acquirimus: Infusam, quæ ex sola gratia siue inspiratione diuina pro-

Lib.
de ad
hæren-
do Deo
c. 9.

§ Theol

myst.

l. i.

com.

12.

h De

con-

templ.

l. 5. c.

1. & seq.

i Dio-

nyf.

Basil.

Mag.

Iohan.

Cypa-

rius.

Au-

gust.

Bónau.

& alij

relati à

Sandæo

lib. cit.

com.

11.

κ 1. p.

qu. 13.

& ubi

agunt

de attri-

but. in

genere.

manat. Illa ab habitu fidei, aliisque virtutibus Theologicis, & moralibus procedit: hæc à dono Spiritus sancti. Illa longa, & difficilis: hæc facilis, prompta, & suavis. Illa ratiocinativa dicitur, ista experimentalis. Qui primam habent optimè de ea, ejusque regulis discunt, experientia destituti; qui secundam, minus periti in sermone sunt, sed in usu, & experientia excellentissimi.

Diuiditur hæc etiam in puram, & mixtam. Mixta nuncupatur, quando intellectus contemplans ab operatione phantasiæ dependet. Pura, cum sine interuentu phantasmatum exercetur. Hæc difficilis est, & admodum rara, & communiter à Scholasticis negatur; admittitur tamen à Sanctis & Mysticis Scriptoribus, ut diffusissimè probant Sandæus §, & Thomas à Iesu h.

Alia diuisio est in affirmatiuam & negatiuam. Approbant hanc duplicem viam Deum contemplandi plerique veterumⁱ & Scholastici^k, docentes alia nomina dici de Deo negatiuè, alia affirmatiuè. Cum enim

Deus sit infinitus, illi attributimus
 quicquid perfectionis reperitur in
 creaturis, sed quia creatis perfectio-
 nibus aliqua semper adhæret imper-
 fectio, hanc remouentes in Dei no-
 titiam per negationes assurgimus.
 Vterque hic modus aptè explicatur
 duplici symbolo, pictoris & sculpto-
 ris. Qui enim imaginem pingit, eam
 in tabula multorum colorum adje-
 ctione delineat: qui sculpit, segmen-
 ta marmoris aut ligni paulatim de-
 mit, donec simulachrum perfectum
 reddat. Sic cùm asserimus Deum es-
 se sapientem, bonum potentem, ju-
 stum, misericordem; perfectiones
 ei creaturarum, velut colores iconi,
 adiicimus. Cùm verò dicimus Deū
 non esse ens, neque vitam, neque
 sapientiam, neque potentiam, ne-
 que aliud cæterorum, eo scilicet mo-
 do, quo à nobis concipiuntur, quasi
 statuem dedolamus: & hoc est Deum
 per nescientiam scire, vt S. Maxi-
 mus obseruat¹, quod est proprium
 mysticæ Theologiæ. Vtitur prædi-
 cta similitudine S. Dionysius^m; cui
 aliam non dissimilem corporis vesti-

¹ In
 cap. 2.
 myst.
 Theol.
 Diony-
 sij.
^m Ibi-
 dem.

ⁿ Serm. ti & spoliati affert Maximus Tyrius ⁿ
 i. Philosophus Plonicus.

° Thō.
 à Iesu
 de Cō-
 temp.
 lib. 5.
 c. 4.
 p Dio-
 nyf.
 epist.
 5. ad
 Doro-
 theum.

Rursum diuiditur contemplatio in clarain, & caliginosam. Clara est Beatorum in patria. Caliginosa Viatorum, quæ sublimior est, quàm contemplatio pura, & ab ea differt per maiorem approximationem ad diuinam vnionem °. Caligo autem diuina, vt scribit primus Mysticorum magister p, est lumē inaccessible, in quo Deus habitare dicitur, quod nec cerni potest propter excellentem claritatem, & inaccessible est ob exceedentem supersubstantialis lucis effusionem. Quare hæc contemplatio nihil aliud esse videtur, quàm defixio mentis in huiusmodi lucem intelligentiæ oculum reuerberantem, & sua immensitate seipsam abscondentem.

Alia denique est contemplatio supereminens, altior quàm caliginosa, in qua Deus, non per dona Spiritus sancti, sed per se solus rapit ac eleuat mentem ad diuina, quæ sic eleuata Deum attingit, non per æigmata similitudinum corporalium, sed al-

tiori, atque ineffabili modo. Talem
fuisse existimo Sanctissimi Patris no-
stri Benedicti raptum^q, quando extra
mundum eleuatus, quasi sub vno
Solis radio, vniuersum mundum col-
lectum conspexit. Differunt de hac
profundissimè Thomas à Iesu^r, &
latè Sandæus^s: atque hanc existimo
elegantissimè describi ab Augustino
libro nono suarum confessionum, in
colloquio habito cum Matre de Re-
gno cœlorum.

3. Plures itaque, & diuersi sunt gra-
dus contemplationis, quamuis ipsa
vna sit, nec facilè possunt certo nu-
mero comprehendere. Multis enim
modis animæ contemplanti se com-
municat Deus, & spiritus eius vbi
vult spirat, & quando vult, & quo-
modo vult. Et quis poterit sensum
eius assequi, aut quis audebit termi-
num ponere eius admirandis opera-
tionibus? Ideò à viris Theodidactis
horum sublimium mysteriorum ex-
plicatio petenda est, quibus Deus,
mirabilis in Sanctis suis, incerta &
occulta sapientiæ suæ manifestauit.

Richardus Victorinus^s sex genera

^q Greg.
^{2.} Dia-
log.
c. 35.

^r De
con-
templ.
l. 6.
^s Myst.
Theol.
l. 1.
com.
14.

Lib. de
gratia
con-
templ.
c. 6.

contemplationis enumerat, quæ doctè, copiosè, & eleganter explanat toto opere de gratia Contemplationis. Primum, inquit, est in imaginatione, secundum solam imaginationem. Secundum in imaginatione, secundum rationem. Tertium in ratione, secundum imaginationem. Quartum in ratione, secundum rationem. Quintum est supra, sed non præter rationem. Sextum supra rationem, & præter rationem. Duo itaque sunt in imaginatione, duo in ratione, duo in intelligentia. Vbi notandum rationem distinguere ab intelligentia, quod qualiter intelligendum sit, infra explicabitur. Hos gradus aliter ordinat Auctor libri de spiritu & anima, & post eum Seraphicus Bonauentura^u.

^uItin.
3. æternit.
dist. 4.
art. 3.
^x 2. 2.
qu.
180.
art. 6.
^y Cap.
4. de
diu.
nomi.

D. Thomas^x secutus Dionysium^y tres gradus contemplationis distinguit juxta triplicem differentiam motus localis, circularis scilicet, recti, & obliqui. Anima enim quasi circulariter mouetur contemplando sensibilia, & ex his ad seipsam perueniendo. Mouetur rectè, ascendendo à

se ad substantiam separatam. Oblique, cum ad diuinam veritatem contemplandam eleuatur.

Iacobus Aluarez omnia completens, quæ Sancti Patres & viri spirituales de hac re tradiderunt, quindecim nomina ad contemplationem pertinentia quasi totidem eius gradus explanat, & Sanctorum sententijs confirmat. Nomina do, explicatio apud ipsum vtilius legetur. Sunt autem ista, Intuitio veritatis, secessus animæ ad interiora, silentium spirituale, quies, vnio, auditio loquelæ Dei, somnus spiritualis, ecstasis, raptus, Christi & Sanctorum apparitio corporalis, eorundem apparitio imaginaria, visio intellectualis, visio Dei in Caligine, admirabilis visio Dei disiecta caligine, visio clara & intuitiua Dei, quæ licet propria sit Beatorum in cœlo, fuit tamen, vt probabiliter quidam Theologi docent, quibusdam sanctissimis viris etiam in hac vita concessa.

Thomas à Iesu, Angelorum immixtus choris, tres eorum Hierarchias, & cuiusque Hierarchiæ triplicem ordi-

To. 3.
lib. 5.
p. 3.

nem menti humanæ applicans, tres contemplantium Hierarchias in nouem gradus distinctas constituit. Prima in imaginatione potissimum residet, secunda in intellectu, tertia in apice mentis. Prima à rerum sensibilibus cognitione ad inuisibilibus contemplationem nos ducit. Primus eius gradus in mundi huius visibilis speculatione & admiratione consistit. Secundus Scripturæ sacræ intimos sensus profundè scrutatur. Tertius circa Verbi incarnationem, & omnia Christi mysteria occupatur: in ipso enim sunt omnes thesauri sapientiæ & scientiæ Dei absconditi. Secunda Hierarchia rerum inuisibilium intuitu ad superna eleuat mentem, ipsumque Deum vt vnum, & trinum intuetur. Primus gradus docet nos ad Deum ascendere per suæ imaginis, animæ scilicet rationalis contemplationem, secundùm dona naturalia, & gratuita, & finem eius, qui est gloria cœlestis, ac felicitas Beatorum. Secundus relictis creaturis ipsum Deum, ejusque attributa contemplatur. Tertius tran-

sit

fit ab vnitate Dei ad sanctissimam Trinitatem. Tertia Hierarchia per negationes ad Deum assurgit, & diuinam caliginem ingreditur. Primus ipsius gradus est pura contemplatio sine phantasmatum admixtione. Secundus contemplatio Dei in caligine. Tertius vnio mystica cum Deo.

Victor Gelenius Treuirensis summam practicam mysticæ Theologiæ in duas partes digestam conscripsit, ediditque Colonia anno hujus seculi quadragesimo sexto; in qua septem mysticos status accuratissimè describit, per quos successiuè transit anima, antequam perueniat ad culmen sanctitatis. Primus est status meditationis. Secundus aspirationis. Tertius contemplationis; modia affirmatiui & negatiui. Et hi tres modo actiuo, humano, & naturali procedunt, quamuis principio supernaturali innitantur, nec careant aliquando diuinis perceptionibus. Reliqui verò status ad modum operandi supernaturalem spectant, nec debet aliquis à Deo non vocatus temerè ad eos

transire: sunt enim hæc mystica, & secretissima Dei dona, quæ nemo nouit, nisi qui accipit; nec accipit, nisi qui desiderat; nec desiderat, nisi quem ignis Spiritus sancti inflamat. Est igitur quartus status priuationis rigorosæ, quo disponitur anima ad status supernaturales, & ided medius consetur esse inter status naturales, & supernaturales tanquam dispositio necessaria ad modum operandi supernaturaliter. In eo cessant discursus, & conuersio ad phantasmata: anima omnino expeditur, & deputatur à modo operandi humano & naturali, spoliatur omni solatio, omnibus externis exercitijs, omni sensibili consolatione: omnes potentia in fundo animæ commorantur languentes, ac desolatæ: deficit & obscuratur viuacitas intellectus: actus virtutum essentiali modo exercentur: nulla hîc lætitia, sed tormentum inexplicabile. Dicant quid sit, qui experti sunt, Doctor mellifluus^z comparat hunc statum morti spiritali, quam vocat mortem Angelorum. Rusbrochius^a diuini spiritus

^z Serm.
52. in
Cant.
^a De
orn.
spirit.
nup-
tial.

& nostri concertationem appellat, & quandam desperationem: Taulerus^b pressuram internam: Harphius^c languorem infernalem, & diuisionem animæ ac spiritus: Barbansonius^d item diuisionem naturæ ac spiritus: Maria Vela sanctimonialis Cisterciensis^e, terribile martyrium: B. Catharina Genuensis^f, horribile & indicibile tormentum. Ioannes à Cruce^g sub noctis obscuræ symbolo eum pingit, & purgatorio assimilât. Thomas à Iesu^h purgatorium quoque esse dicit in via vnitiua contingens. B. Angela de Fulgineoⁱ maluisset in inferno esse, quàm talem priuationem sustinere, quæ in ipsa mirabilis fuit. Seraphica Virgo Terefia^k quid pateretur in hac pressura constituta, ipsa enarrat in vita, & scriptis suis. Alia aliorum effata prætermitto, & transeo ad alium statum. Hic est quintus, & dicitur status mysticæ vnionis, quando à pressura rigidæ priuationis respirans anima incipit reuiuiscere, & spe interioris perceptionis erecta lumen & amorem suscipit, in libertatem spiritus paulatim

^b Serm. 1. Dom. 15. post Pentecost. ^c Lib. 3. c. 13. ^d Serm. mit. occult. p. 2. c. 10. ^e Vitæ P. 2. c. 43. ^f Dialogi c. 2. ^g Passim in ascens. mont. Carmeli. ^h De orat. in sc. lib. 4. c. 19. ⁱ Vitæ c. 19. ^k Vitæ c. 25. & mentione 6. c. 1.

transit; & quantò ampliùs ascendit, tantò faciliùs capacitatem spiritus erigit ad Superiora, donec à Deo sursum tracta perueniat ad felicissimam cum ipso vnionem. Sextus est status Transformationis per donum Sapientiæ, per quam intelligimus, non substantialem Transformatio- nem: Absit, vt consentiamus erro- ri iam pridem damnato, quo quidam opinati sunt animam hominis à pro- prio esse desinere, & in ipsam Dei es- sentiam transire: sed arctissimam vnionem cum summo bono, qua My- sticus diuinæ consors naturæ factus modo perfectissimo, in eandem ima- ginem transformatur de claritate in claritatem tanquam à Domini spiri- tu, ita vt in eiusmodi felicitate per- fecta ratio mysticæ possessionis inue- niatur. Hujus Transformationis du- plex est modus, vnus quo ex alto ad inferiora descendere dicitur; alter, quo ab inferioribus ad superiora as- cendit. [Charitas enim, vt verbis vtar S. Bonauenturæ, ad superiora ascendit, vt in eis requiescat; ad in- feriora tendit, vt ea ad se reducat;

quart.
itin.
atern.
dist.
5. art.
3.

furfum mouetur, vt illic maneat; deorfum, vt redeat.] Porro hinc anima fientij myftici quietam fruitio- nem adipifcitur, quoufque fpiritum fuum fupra fe in alto videat. Licet enim in ftatu vnionis fupremas fpiri- tus fruitiones experiatur, nondum tamen plenam requiem, & appeti- tus fatietatem confequta eft; quia fre- quenter re incidit in carentiam & ces- fationem vnionis: in hoc autem ftatu nullam patitur distractionum mo- leftiam, nullam paffionum inordina- tionem, nullam gaudij fpiritualis in- terruptionem. Septimus denique ftatus eft Sanctorum militantis Eccle- fia, quando anima abundantiori gra- tia, vitæ eximia fanctitate, dono miraculorum, aliifque gratiis, quas gratis datas vocant, à Deo illuftra- tur. Hujus autem ftatus ecftafes, rap- tus, & alias mirabiles operationes reuereri oportet, & admirari, non æmulari.

4. Hi funt gradus & ftatus vitæ contemplatiuæ, quos, Deo auspice, majori, qua potui claritate & breui- tate explicare conatus fum: à fuis

enim Auctoribus fusiùs & obscuriùs describuntur. Quæ verò ex præfatis diuisionibus præferri debeat, non est meum diffinire. Hoc solùm admono, quòd Richardus gradus distinxit in ordine ad potentias, quarum ministerio Anima contemplatur. Angelicus doctor modum respexit operandi; Iacobus Aluarez non tam gradus recenset, quàm effectus & proprietates contemplationis. Thomas à Iesu in prima & media Hierarchia omnia objecta complectitur circa quæ versatur contemplatio: in tertia modum tradit, quo anima suum primarium objectum perfectiùs contemplando attingere potest. Tandem Victor Gelenius non gradus contemplationis, sed vitæ mysticæ & contemplatiuæ varios status sibi inuicem succedentes describit, methodum seruans & ordinem, quo solet Anima ab infimis ad suprema per media progredi. Legimus quidē aliquem nonnunquam extitisse, qui ab infimo statu ad supremum sine medio pertractus fuit: sed hæc priuilegia singularia sunt, quæ Deus omni-

potens quando vult operatur: quæ
 nec trahere in consequentiam licet,
 nec curiosè perscrutari. Sapientia
 Dei infinita est, iustissima prouiden-
 tia, iudicia eius abyssus multa. Ali-
 quando imperfectis gratiam con-
 templationis largitur, quam perfe-
 ctis negat, & vni dedit quinque ta-
 lenta, alij duo, alij vnum. Dicam
 cum Augustino: [Nemo venit ad Tra&. 26. in
 Deum, nisi tractus. Non traheris? Ioan.
 ora vt traharis. Quare autem illum
 trahat, & illum non trahat, noli
 velle iudicare, si non vis errare.] Si
 Dei beneficio ad sublimiora euectus
 es, custodi thesaurum tuum cum hu-
 militate, & gratiarum actione: si re-
 lictus es in gradu inferiori, caue tepi-
 ditatem, & negligentiam; & te per-
 fectiùs semper exerce in meditatione
 & aspirationibus; nam vt docet Ioan-
 nes Abbas apud Cassianum: [Me- Coll.
 liùs est deuotum in minoribus, quàm 19. c. 3.
 indeuotum in maioribus professio-
 nibus inueniri.]

§. Libet autem hîc quærere & ob-
 stupefcere, vnde proueniat tam exi-
 guum esse numerum incumbentium

myſtica Theologia & contempla-
 tioni; cùm ſint tamen innumeri vi-
 ri pij, & religioſi, diuinæ gratiæ con-
 ſortes, & donis Spiritus ſancti præ-
 diti: creſcitque admiratio expenſa
 ratione habitus, qui quò nobilior eſt,
 eò maiorem confert potentiæ ope-
 randi facilitatem. Cum ſit ergò in
 omnibus juſtis habitus ſapientiæ, quæ
 eſt donum Spiritus ſancti, cur è tot
 millibus vix vnus reperitur rerum di-
 uinarum contemplator? Profectò
 mirum eſt hoc, & poſſumus cum
 Propheta plorare & dicere, [Viæ
 Sion lugent, eo quod non ſint, qui
 veniant ad ſolemnitatem.] Hujus
 rei cauſas ſubtilius indagare, maio-
 ris otij & voluminis foret. Nonnul-
 las breuiter attingam. Calagurita-
 nus, qui hoc dubium proponit, cau-
 ſam potiffimam eſſe putat, non ſeriò
 vitare leuioreſ culpas, nec perennem
 cordis alere puritatem: ſi enim hæc
 exquireretur, in cordibus puris faci-
 le diuina cerneretur imago. Hæc il-
 le veriſſimè, nam & ſapientes Eth-
 nici hanc veritatem cognouerunt.
 Hierocles tunc hominem poſſe fieri

Thren.
 1. 4.

Ioan.
 à Ieſu
 Maria
 myſt.
 Theol.
 c. 3.

Init.
 carmi-
 num
 Py-
 thag.

diuinum ait, cum exuerit quicquid humanum est. Musonius apud Aristidem, [Eijce, inquit, quod est in anima mortuum, & Deum cognoscas.] Plato mentem à corpore separandam asserit, vt Deo jungatur. Alij causam reiiciunt in naturalem corporis, & temperamenti dispositionem, ratione cuius nonnulli ad mysticas functiones inepti sunt: nam teste Magno Gregorio sunt quidam ita inquieti, vt sedere cum Maria ad pedes Christi minimè valeant. Sed vt obseruat sanctæ memoriæ Episcopus Geneuensis debent qui sunt huiusmodi naturam vincere ope diuinæ gratiæ, quæ omnibus inuocantibus adest, & volenti nihil difficile. Ludouicus à Ponte aliam assignat rationem singularem Dei prouidentiam in Ecclesiæ gubernatione, in qua diuersa officia & gradus sunt. Quare debet vnusquisque suam attendere vocationem, & inuitantis vocem sequi, omnia remouendo impedimenta. Præclarè Bernardus,¹ [Omnes nobis causamur deesse gratiam, sed iustius forsitan ipsa sibi queritur gra-

6. Sa-
crorum
Sermo.
t. 1.

Moral.
cap. 17

De di-
uino
amore
l. 12. c.
Ducis
spirit.
tr. 3.
c. 2.

¹ Init
Serm.
de tri-
castro
dia.

tia deesse nonnullos. Nempe res cordis est gratia deuotionis ista quam quærimus, & hoc munere ipse se fraudat, qui internum ei dissimulat recepraculum exhibere.]

6. Quòd si loquamur non simpliciter de contemplatione, sed de transitu à modo operandi humano, & naturali ad diuinum & supernaturalem; aduertendum est non nisi post longam & durissimam probationem, quam in statu priuationis supra descripto anima experitur, à Deo concedi: qua de re mysticum admonere placuit, ne diutino labore pertæsus animus despondeat, & à cœpto itinere retrocedat. Et ne videar temerè loqui, adfero exempla. Vbertinus de Casali^m quatuordecim annis laborauit, priusquam introduci ad intimam perfectionem mereretur. S. Terefiaⁿ octodecim annis intolerabiles angustias passa est. S. Franciscus^o per biennium grauissimo mœrore tabescebat. B. Clara de Monte Falco^p quindecim annos huic priuationi impendit. B. Catharina Genuensis martyrium suum in suo dia-

in Arb.

vita

prolog.

r.

in Vita

uar c.

o.

Chro-

nic.

Minor.

. 1. lib.

. c. 59.

Har-

ius

b. 2.

. 5.

ollat.

in fi-

e.

logo ipsa describit. Altera Catharina Bononiensis^q per quinque annos valdè desolata fuit, & à Dæmonibus exagitata. Maria Ægyptiaca^r septemdecim annis afflicta ad purum decoxit scoriam suam. B. Maria Magdalena de Pactiis^s per annos quinque, & deinde per alios sexdecim tantam ariditatem passa est, vt videretur à Deo derelicta. B. Henricus Suso^t per decennium diuina caruit consolatione. Balthassar Alvarez^u vir eximie sanctitatis è Societate Iesu non nisi post sexdecim annos in vitamystica cum tenebris & labore decursos diuine lucis adeptus est illustrationē. Thomas à Iesu^x annis plusquam viginti laborans percipere non potuit quid sit vnio animæ cum Deo, donec tandem diuina bonitas ei reuelauit. Quod si in viridi hæc facta sunt, in arido quid fiet? Animo igitur infractione in via Domini perseverare oportet, & ab eius disciplina non deficere, quia vt ait B. Laurentius Iustinianus^y in bono occupatos non derelinquit, illosque ex insperato, & in nesciente caligine visitare consue-

q lib.
de 7.
armis:
& Iacob.
Grasset.
vita
eius.
^r In vitis Patr.
lib. 1.
^s In vita ip-
sius.
^t Vita
sua c.
23.
^u Lud.
Ponte
in vita
eius c.
2. & 13
^x In
præf.
lib. de
de orat
infusa
^y De
trium
phali
Christi
agone
c. 17.

Serm.
de Cir-
cumcis.

uit. D. Bernard. vsque ad finem vitæ hanc spem, & patientiam extendit, sic enim ait: [Multi tota vita sua ad hoc rendunt, & nunquam pertendunt; quibus tamen si piè, & perseueranter conati sunt, statim vt de corpore exeunt, redditur quod in hac vita dispensatoriè est negatum: illuc perducende eos sola gratia, quò priùs tendebant ipsi cum gratia, vt consummati in breui expleant tempora multa.

In fine
lib. i.
adu.
Arium.

In li-
bel.
adu.
Felic.
Urge-
lit. &
Eliphan-
tum
Tolof.
Episco-
pus iti-
ner.

7. Desino, si priùs explicauero quod ante promisi, animæ scilicet & potentiarum eius diuisionem secundùm Mysticos. Marius Victorinus Afer duas distinguit animas in homine, duas mentes, duplicem rationem cœlestem, & hylicam. Constat enim homo duplici natura corporali & spiritali, & idè duplices debet habere operationes corporales, & spirituales; quarum ordinem & directionem in proprium finem respicientes Mystici hominem animale & spirituale distinguunt, non per substantiam, sed per meriti qualitatem, vt loquitur Paulinus Aquileiensis 2.

Animæ autem virēs siue potentias in Ordine ad contemplationem sex esse statuit Seraphicus Bonauétura, nempe sensum, imaginationem, rationem, intellectum, intelligentiam, & apicem mentis, siue synderefis scintillam. Afferunt quidem Philosophi rationem, intellectum, & intelligentiam non esse diuersas potentias; non tamen negant esse diuersos actus, siue gradus intellectus. Nam vis intellectiua, in quantum est discursiua, dicitur ratio; in quantum est simpliciter intuitiua, dicitur intellectus: in quantum est Diuinitatis contemplatiua per simplicem apprehensionem, dicitur intelligētia, quod optimè Richardus obseruat. Synderefis verò, quæ est habitus rationis practicæ animæ concreatus, quo prima principia in operabilibus naturaliter cognoscit, meritò à Mysticis apex mentis nuncupatur, & scintilla rationis siue intelligentiæ, quia per eam sortitur anima quemdam respectum ad Deum immediatum, quo capax est ab ipso immediatè tangi, & irradiari: & quia semper nata est in

Mentis
in Deū
c. I.

Lib. I.
de con-
templ.
c. 9.

110 VIA COMPENDII

superioribus figi, & ad diuina eleuari: illustratque animam splendore cognitionis & ardore inclinationis ad bonum eam succendit. Hæc ad mentem Bonauenturæ. Alij aliter procedunt. Animam vocant secundum operationes partis sensitivæ, & appetitivæ: spiritum quoad vires rationales. Mens vel apex spiritus est nudus ac Deiformis animæ fundus, id est simplex animæ essentia imagine Dei insignita. Per fundum autem intelligo animæ nostræ *ἡγεμονικόν*, seu principem partem, ut voce utar Stoicorum, aliter tamen quam ipsi intelligent. Concipio enim animam tanquam vas quoddam lucidum, capax omnium illuminationum, & umbrarum à rebus quibuscunque provenientium. Sicut autem infimum vas fundus vocatur omnia superinfusa sustentans ac retinens: ita princeps nostri pars, seu apex mentis idem sortitur nomen. Et sicut fundus eò magis absconditur, quò magis repletur corporibus densis: ita anima eò minus diuinam percipit irradiationem, quò crassiores species re-

AD DEVM, CAP. X. III

rum terrenarum Dei illustrationi superinfundit. Cunctis verò imaginibus creaturarum euacuatis, simplex dumtaxat, & amabilis Dei vultus in fundo animæ apparebit. De hoc fundo plura Taulerus, & alij Mystici passim. Eius quoque mentionem facit S. Diadochus Photicensis Episcopus, qui vixisse creditur circa finem quarti seculi, quod notare volui, ne quis hanc vocem nouitatis incuset.

De
perfect.
c. 26. &
33.

8. Quoniam autem huc perueni, & hanc breuem Isagogem mysticæ Theologiæ, Deo duce, conscripsi; iam ad praxim Aspirationum descendendum est, si prius hymnum cecinero, quo & gratias primæ omnium causæ agam, & vires postulem ad ea quæ defunt perficienda.

[**O** Fons decori luminis,
O lux serena siderum,
Ignis Deus purissime,
Vigor perennis cordium.

Te voce semper, te prece,
Te mente grata, vindicem
Meæ salutis concinam;
A Sole Eoo ad Hesperum.

Ex lib.
bel.
meo-
rum
carminum
non-
dum
impres-
so.

112 VIA COMPENDII

Tu spes mihi, tu præmium,

Tu portus es fiducia:

Te fretus vno pertuli

Sortis procellam turbidæ.

Inter labores asperos

Lumen tuæ clementiæ,

Repente fulgens, vim procul

Abeſſe juffit Tartari.

Salve ſupernum incendium,

Clarumque mentium jubar:

Ad te reuertor, ſupplicem

Voca per ignes myſticos.

Descende flamma, illabere

Cœlorum ab arce fulgida,

Infunde cœco pectori

De fonte lucis lumina.

Cor, oſſa, fibras concrema,

Venas, medullas, viſcera,

Ipfamque mentem, ac ſpiritum,

Vt totus ardeam tibi.

O fors beata, ô gaudium,

Conjuncta cùm mens Numini,

Et immemor rerum omnium,

Te diliget perenniter.

Summo Parenti Cœlitum,

Natoque, & almo Flamini

Sit laus, decusque perpetim

Nunc & per omne ſeculum.]

CAPVT XI.

*Gemitus Animæ Pœnitentis pro
Incipientibus.*

QVamuis expertis difficile non sit propriis motibus ad Deum assurgere, possitque vnusquisque ex pharetra sui cordis sagittas orationum depromere; ne his tamen deficientibus pius Asceta aridus reperiatur, defectuue lignorum mysticus ignis in ara cordis extingatur: ex scriptura & Sanctis Patribus syluulam Aspirationum collegi, pro triplici statu Incipientium, Proficientium, & Perfectorum; in quarum vsu & praxi quid seruandum sit, iam supra explicatum est. Habes hîc eas in varias decades distributas, quò faciliùs valeant memoriæ mandari: cui studio aliquot dies tribuendi sunt. Quid enim prodest multas Aspirationes in libello descriptas habere, nisi etiam memoriæ inscripte, imò & insculptæ sint, vt in pròptu habeantur

omni hora, & momento? Propono autem primo loco gemitus animæ pœnitentis, naturæ & doctrinæ ordinem sequutus: quia vt perueniamus ad id quod nondum sumus, purgare primò, id quod sumus, & lacrymis eluere debemus.

D E C A S I.

1. **D**omine Deus meus, ego vilissimus sum peccator; indignus planè, quem terra sustineat. Miserere mei, & salua me.

2. Domine, qui es summum bonum meum, quam longè per peccatum recessi à te, & habito in regione hac longinqua miseriarum, vbi perdididi me.

3. Pater amantissime, peccaui in cœlum & coram te, verè non sum dignus vocari filius tuus, fac me obsecro sicut vnum de mercenariis tuis.

4. O quàm pœnitet me peccasse, dulcissime Deus, quàm pœnitet me, quòd legem tuam transgressus sum: ampliùs laua me ab iniquitate mea, & à peccato meo munda me.

5. Domine Deus meus detestor peccata mea, abominor vniuersa flagitia mea, confiteor ingratitudinem meam, & confugio ad aram misericordiae tuae.

6. Ablue me, Christe Iesu, pretioso sanguine tuo, & munda me ab omni peccato.

7. Sana Domine animam meam peccatis vulneratam, vnge oleo gratiae tuae cicatrices delictorum meorum, ne quaeso despicias me.

8. Domine Deus piissime, ab hac hora nunquam transgrediar legem tuam, nunquam amplius consentire volo in aliquod peccatum: malo incurrere omnem poenam, omnem infamiam, atque ipsam mortem, quam deinceps peccare.

9. O Pater amantissime, da mihi vt faciam fructus dignos poenitentiae, & puniam delicta mea debita castigatione.

10. Erraui sicut ouis quae perierat, audio tamen dulcissimam vocem tuam: Tu fornicata es cum amatoribus multis, tamen ad me reuerte-
re, & ego suscipiam te.

DECAS II.

1. **N**unc cœpi, Domine, nunc vivere incipio, non in fortitudine mea, neque in virtute brachij mei, sed in multitudine miserationum tuarum: confirma hoc tu, quod operatus es in me.

2. Tu, Domine, integros sensus, & cor docile tribuisti mihi: sed heu me miserum & infelicem, quia omnibus bonis tuis abusus sum. Tu verò Pater misericors peccantem reuocasti, & à pœnis inferni liberaasti.

3. Doleo & angor vehementer ob innumera peccata mea, quibus te benignissimum Redemptorem offendi, diaboli seruum me feci, indignationem tuam prouocaui.

4. O si nunquam, Amantissime Pater, præcepta tua transgressus essem? ô si nunquam in tantam miseriam, & calamitatem incidissem? ô si nunquam peccassem? ô illos felices, qui innocentiam non perdidērunt, qui baptismatis gratiam illibatam custodierunt.

5. Statuo, summe Deus, in posterum non peccare: firmissimè propono tua sanctissima præcepta non transgredi; verè & ex corde decerno cum adiutorio gratiæ tuæ vniuersam legem implere

6. Respice in me, Domine, oculis misericordiæ tuæ, dele præterita peccata mea, concede mihi per bonitatem tuam gratiam emendationis.

7. O quanta fuit hætenus ignauia mea? tempus ad pœnitentiam concessum perdidi, gratiam & auxilia reieci, vocibus tuis, quibus me vocabas obsurdui: & nunc, Domine, quid faciam? Pœnitet me peccasse, miserere mei.

8. Eheu Domine Deus, quanta sunt vulnera mea, quanta infirmitas & prauitas mea, pro quibus sanandis crucifixus es, & occisus.

9. Deus propitius esto mihi peccatori: Iesu Fili Dei viui miserere mei.

10. Dominator vitæ meæ, ecce vides quia non est in me bonum, nec sanitas animæ meæ: miser & cæcus sum, nihil possum, nihil sum sine te,

DECAS III.

1. **O** Saluator piissime, tu sci squot mala commisi, quot bona omisi: propitius esto mihi & salua me.

2. O magna domus Dei quàm vilis mihi fuisti, & quàm turpiter te pro nihilo contempsi?

3. O quàm iustè me in infernum detrudere poteras, iustissime iudex, & mihi clementer pepercisti.

4. Confiteor, Domine, me omnium quos mundus habet vitiosissimum esse; sed nihilominus in immensa confido bonitate tua. Et si sunt super numerum peccata mea, non est etiam numerus misericordiæ tuæ.

5. Deus tu scis insipientiam meam, & delicta mea à te non sunt abscondita. Delicta iuventutis meæ, & ignorantias meas ne memineris.

6. Deus meus misericordia mea, oro te per dilectum filium tuum, da mihi virtutes amplecti, vitia reiicere, terrena calcare, cœlestia finire.

7. Væ tempori illi, quando te non
cognoscebam summum bonum ani-
mæ meæ : væ cæcitati illi, quando te
non videbam.

8. Domine Deus meus, quando
plenè mihi moriar, & tibi viuam?
quando me ab omnibus rebus terre-
nis expediam? quando sensus meos
& affectus plenè cohibebo, & quic-
quid est in me vitiosum frænabo?

9. O si iam mundum contemne-
rem? ô si terrena calcarem? ô si quod
amant mundani pro nihilo duce-
rem?

10. Vtinam ab omni vitio purga-
tus, & ab omni inordinata affectione
emundatus diuino illapsu dignus es-
sem, & cœlestium charismatibus
gratiarum.

DECAS IV.

1. **M**ortifica, Domine, passiones
meas, cohibe illas, & mode-
rare amore & præsentia tua, ne me
perturbent; sed magis ad id iuuent,
cuius gratia eas dedisti, ad bonas sci-
licet operationes.

2. Amoue à corde meo inanes cogitationes, & verear illud euoluere in conclauī animæ meæ, vbi tu habitas, quòd si ad notitiā hominū venturū esset, cogitare erubescerem.

3. Vilescat mihi, Domine, omnis creatura, & nihil mihi placeat, nisi tu.

7 4. Dulcis Iesu, quàm amabilis est gratia tua, quàm suavis amicitia tua? ne quæso abiicias me propter peccata mea.

5. Ne proiicias me Deus à facie tua, accelera, precor, & sensus meos erue citò de luto fœcis.

6. Ablue me, Domine, pretioso sanguine tuo, sana me vulneribus tuis, sanctifica me amarissima passione & morte tua.

7. Qui plasmasti me, & per crucem tuam redemisti mundum, adiuua me, & miserere mei.

8. Aperi mihi viscera benignitatis tuæ, clementissime Pater, recipe me in gratiam tuam, & dimitte omnia peccata mea.

9. Da mihi, Domine, fortis & patientis,

riens tantam contritionem, quantam
scis deberi peccatis meis. Peccaui,
miserere mei.

10. Hic vre, hic seca, vt in æter-
num parcas: hic me castiga, & noli
in futurum reseruare mala mea.

DECAS V.

1. **P**ECCAUI super numerum arenæ
maris; indignus sum, Domine,
miserationibus tuis, sed misericordia
tua superat scelera mea.

2. Nonne dixisti, Domine, gau-
dium esse in cœlo super vno pecca-
tore pœnitentiam agente? exple igitur
hoc gaudium in cœlis de me.

3. Tu Domine, qui non vis mor-
tem peccatoris, sed vt conuertatur
& viuat, largire mihi vitam, qua de-
stituor.

4. Venistine, Domine, vt iustos
traheres ad te, an vt peccatores? Si
peccatores, ecce me maximum om-
nium, trahe me ad te.

5. Miserere mei Deus secundum
magnam misericordiam tuam: & se-
cundum multitudinem miserationo-

num tuarum dele iniquitatem meam.

6. Asperge me Domine sanguine tuo, & super niuem dealbabor.

7. Cor mundum crea in me Deus, deterfis sordibus animæ meæ.

8. Redemptor animæ meæ, quamdiu auertis faciem tuam à me, & non succurris gementi?

9. Ecce me filium prodigum, & prodigo deteriorem: miserere Pater, & dona me annulo, & veste, & dignum fac amplexu tuo.

10. Non sit frustra pro me fusus sanguis tuus, dulcissime Saluator, sed in salutem & vitam æternam.

DECAS VI.

1. **Q**uoniam non mederis vulneribus meis medicorum peritissime, & clementissime Iesu Christe? Ecce cæcus sum ad videnda quæ recta sunt, claudus ad obsequia tua, surdus ad monita, mutus ad preces, paralyticus ad opera bona: miserere, & sana me.

2. Sanguine tuo medere mihi Do-

mine, & cura vulneribus tuis vulnera mea.

3. Domine ne in furore tuo arguas me, neque in ira tua corripas me.

4. Ecce ego seruus tuus sum, & filius ancillæ tuæ, lætifica animam serui tui, quoniam ad te, Domine, animam meam leuauit.

5. Non mereor filij nomen, & tamen tu pater es: semper sis, vt semper sim filius.

6. Deus tu scis insipientiam meam, & delicta mea à te non sunt abscondita. Vtinam non peream in insipientia mea.

7. Dixi, confitebor aduersum me iniquitatem meam Domino, & tu remisisti impietatem peccati mei.

8. Non veniat mihi pes superbiæ, & manus peccatoris non moueat me.

9. Delicta quis intelligit? Ab oculis meis munda me Domine, & ab alienis parce seruo tuo.

10. Memento quæso quod sicut lutum feceris me, & in puluerem reduces me.

DECAS VII.

1. **N**on intres in iudicium cum seruo tuo Domine, quia non justificabitur in conspectu tuo omnis viuens. Misericordia indigeo, pacem quæro, non iudicium.

2. Vide humilitatem meam & laborem meum, & dimitte vniuersa delicta mea.

3. Ostendo tibi Pater immania delicta mea, quæ libentiùs occultarem, si possem, & obliterarem sanguine cordis mei. Atque vtinam aboleantur vnâ guttâ sanguinis dilectissimi Filij tui, Redemptoris mei, ne appareat coram te fœditas mea.

12. 4. Heu me Domine quia peior Dæmonibus sum, & in natura quidem manifestum est, in moribus etiam fateor, nam video plura in me peccata, quàm in illis.

5. Confiteor tibi Deus meus decora mea in laude tua: recolo coram te scelera mea, non quod ea amem, sed vt amem te lumē oculorum meorum, & fons misericordiarum.

6. Purissime & sanctissime Deus, malo millies mori, quàm te vel leuissimè offendere.

7. A nullo hoste magis timeo, quàm à meipso. Quis me custodier à meipso? Non utique ego. Nisi enim tu custodieris me, frustra ego vigilo ad mei custodiam.

8. Veni Domine ad me, quia longè recessi à te. Doce me venire ad te, non enim possum, nisi tu qui es via, doceas me.

9. Detestor peccata mea, Deus meus, corde saluatoris mei. Sicut cor Iesu ea fleuit, ita ea ploro & abominor.

10. Quis mihi det vt fit magna velut mare contritio mea, ex quo lacrymarum flumina exeant, & in illud intrent, vt iterum ac perenniter fluant?

DECAS VIII.

1. **U**bi estis lacrymæ, vbi dolores? Deserite omnes & in me tot scelerum reum agminatim irruite.

2. O quàm bonum erat mihi si natus non fuisssem : neque enim vitam mihi dedisti, vt te offenderem Deus meus.

3. O Sol mundi oculo, qui me toties peccantem aspexisti, vtinam me deinceps non nisi dolentem & lugentem aspicias.

4. Contremiscite omnes artus mei ad horrificum nomen peccati. Et vos omnes creaturæ vindicate in me creatoris offensam.

5. O qualem Deum offendi, quàm amabilem, quàm amantem mei, Deum dilectionis, beneficentiæ, & bonitatis?

6. Quid iniquitatis inueni in te, ô bone Iesu, vt tam crudeliter, tam impiè agerem tecum?

7. O si quod factum est possem infectum reddere! ô si tempus præteritum reuocare! quàm libenter cum perdita innocentia vitam commutarem!

8. Pœnitet me peccasse Deus meus, semperque pœnitebit : & si possem infinito dolore dolerem quòd offenderim te.

9. Conuertere Domine, & eripe animam meam, saluum me fac propter misericordiam tuam.

10. Vide Domine afflictionem meam amaram nimis, quia non est qui auxilietur mihi, nisi tu Deus meus.

DECAS IX.

1. **S**iccine permittis, Domine, me indignissimam creaturam tuam à terra sustentari? ô quanta est bonitas, & misericordia tua.

2. Placare, Domine, ostende mihi serenum vultum tuum.

3. Ecce Deus tuus, anima mea, ecce qui delet peccata tua: vide quanta pro te pertulit, quanta charitate te diligit: caue ne vnquam ab eo discedas.

4. Hoc vnum à te peto, Domine mi, exaudi me, vt non peccem, vt cognoscam & faciam voluntatem tuam.

5. Veni Domine in cor meum, fac flagellum de funiculis, & eijce ab eo omnes profanantes domum tuam.

6. Da mihi, Iesu benignissime;

vnam ex tuis lacrymis, quas pro me vberrimè effudisti, vt eam offeram Patri tuo in satisfactionem pro peccatis meis.

7. Recipe fugitiuum tuum, Clementissime Pater, pateat mihi pulsanti janua tua, accipe me fugientem ab inimicis.

8. Mortifica & auelle à me quicquid displicet tibi: viuifica & auge in me quod tibi placet, tu qui mortificas, & viuificas.

9. O Pater amantissime, si vis potes me mundare. Sana animam meā, quia fateor me peccasse.

10. O si omni vitio carerem? ô si sensus ab illicitis objectis cohiberem? ô si totus compositus intus & foris essem? Quando, quando ab omni labe purus ero? Quando ita expurgatus, & ordinatus, vt nihil appareat in me, quod intuētium oculos possit offendere? Adiuua me Domine Deus meus, & peccatricis animæ meæ ablue sordes.



CAPVT XII.

Pia desideria ad vsum Proficientium.

ANima, quæ à Deo aberrauerat, post quam redijt in viam bonam, similis est filiis Israël, quos Dominus in manu forti de seruitute Ægyptiaca liberauit. Sicut enim illi egressi de Ægypto in terram fluentem lac & mel, duce Moyse, progressi sunt: ita anima ad vltiora procedere debet, contemptis hostium tentationibus ad reditum in Ægyptum sollicitantibus, quia Dominus pro nobis pugnat, & adiutor noster est, virtus nostra, & tutissimum refugium; ad quem feruidis motibus cor erigere, ejusque opem jugiter implorare debemus piis desideriis, & aspirationibus, quæ statui Proficientium specialiter conueniant. Harum decades aliquot subijcio in vsum, & exemplum.

DECAS I.

1. **I**llumina, Domine, oculos mentis meæ lumine fidei, & sapientiæ, vt te semper respiciam tanquam exemplum mihi datum ad vitam sanctè instituendam.
2. O si vires animæ meæ, Christe dulcissime, per vires sanctissimæ animæ tuæ perficeres, & reformares? Vtinam ad imaginem tuam me animo & corpore effingam.
3. Deus meus, & vita animæ meæ, quis ego sum, & quæ domus patris mei, vt præstares mihi tot beneficia? A te Domine, & ad te creatus sum: tu requies mea, tu centrum animæ meæ.
4. Bone Iesu, spes mea, & refugium meum, saluto & veneror suavissima vulnera tua, immerge me & absconde in illis; imprime illa cordi meo, vt tui amore totus ardeam & medullitus tibi compatiar.
5. Da mihi Domine intentionem rectam, vt ex filiali amore tuum honorem & beneplacitum in cunctis

quæram. Da intentionem perfectam, vt nec spirituales consolationes exquiram, sed in omni desolatione tibi soli adhærere concupiscam.

6. Tolle Domine à corde meo nimium amorem mei, & infunde perfectum tui amorem: tolle cor serui pigri, & minus fidelis, & da cor filij per sanctam fiduciam in te sperantis.

7. O si tui dumtaxat recordarer, te solum cogitarem, te solum diligerem!

8. O si januas sensuum meorum rebus mundanis occluderem, cunctisque virtutibus ornarer, vt tibi per omnia placerem!

9. O si mentem meam ab omni multiplicitate expedires, si eam penitus in te colligeres!

10. Quæram te diligenter summum bonum meum, te sollicitè cupiam immensa pulchritudo mea, ad te velociter curram vera requies animæ meæ.



DECAS II.

1. **D**iscedite à me creaturæ omnes, vestrarum curarum me expertem relinquire, ne impediatis salutem animæ meæ, nec me ab assidua Dei memoria interpelletis.

2. Ne me permittas, Domine, in salebra tepiditatis hære, & caligine ignorationis obuolui, sed expedire vires meas, vt ad perfectionem velociter curram.

3. In tuum pretiosum sanguinem me totum proijcio, vt vniuersa delicta mea, & imperfectiones absorbeat, ac in humilitate, patientia, cæterisque virtutibus contineat.

4. Hoc vnum volo, Domine, hoc vnum desidero, hoc vnum peto, vt benignis oculis respicias me.

5. Illumina cor meum, accende affectum, roboram manus, vt eum virtutis gradum, ad quem sum destinatus, per tuam misericordiam adipiscar.

6. Præsta Domine, vt per mei perfectam abnegationem ad perfectum

AD DEVM, CAP. XII. 133

tui amorem perueniam. Tu iussisti
vt diligam te, da quod jubes, & ju-
be quod vis.

7. Seda, precor, tentationum pro-
cellis agitatam animam meam, tu
qui mari terminos ponis, & dicis:
Huc vsque venies, & hinc confringes
tumentes fluctus tuos.

8. Adorna Rex Sion thalamum
animæ meæ sponsæ tuæ, vt nihil ad-
mittat, quod non sit honestum & de-
corum, nihilque in ea appareat, quod
displiceat oculis tuis.

9. Vtinam, Domine Deus meus,
verè mitis essem, & humilis corde;
verè pauper, & nudus spiritu.

10. Ecce, Domine, constituo me
in infimo loco infra omnem creatu-
ram, quia peccator sum & omnium
indignissimus.

DECAS III.

1. **O**Mnem voluntatem meam in
tuam, Domine, transfundo:
fiat voluntas tua de me & per me in
tempore, & in æternitate.

2. Conformame, suauissime Iesus

34 VIA COMPENDII

sanctissimæ humanitati tuæ, & da mihi liberam ad te introuersionem.

3. Instrue, dirige, & adiuua me in omnibus, vt nihilagam, nihil loquar, nihil cogitem, nihil velim, nisi quod tibi sit acceptum.

4. Benedico & gratias ago omnipotenti clementiæ tuæ, Domine Deus meus; nam quicquid mihi impendi potuit à largitate tua recepi semper inæstimabiliter supra condignum.

5. Domine quid me vis facere? fac vt viuam in beneplacito tuo.

6. Da mihi, Domine, mentem tranquillam, & excita in me castæ dilectionis ardorem.

7. Illucesce mihi anhelanti ad te, ne tenebræ mortis me comprehendant.

8. Quam bonum est pati pro Christo, pro Christo affligi, contemni, & mori?

9. Ave dulcis Iesu, qui pro me mori dignatus es, ne permittas me damnari, quem tuo pretioso sanguine redemisti.

10. O dulcis societas semper esse

AD DEVM, CAP. XII. 135
cum Christo: o dulcis vita cum Christo
viuere, cum Christo pati, & mori!

DECAS IV.

1. **S**eruiat tibi, Domine Deus, quic-
quid ago, quicquid loquor,
quicquid cogito: omne opus meum
ate incipiat, in te finiatur.

2. Seruus tuus ego sum, da mihi
intellectum Domine, vt discam mā-
datatua: nolo mei ipsius esse, tuli-
bera me ab omni proprietate.

3. O quā suauē est sedere in so-
litudine, & tacere, cum solo Iesu lo-
qui, solum Iesum meditari, in quo
sunt omnia bona!

4. Planta in me, Domine, radices
solidarum virtutum, & fac excre-
scere cum viriditate boni operis, ne
velut arbor infructuosa otiosus sim
in domo tua.

5. O dulcis Iesu fons omnium bo-
norum, fons vitæ & gratiæ, dirige
gressus meos in semitis tuis, & doce
me facere voluntatem tuam.

6. Cor meum euacua ab omni
creatura, & ab omni impedimento:

fac ut simpurus & simplex, ac totus in te defixus, ut nihil respiciam, nihil amem in creaturis, nisi quod tuum est, & propter quod creatæ sunt.

7. Da mihi feruorem spiritus tui, Iesu amantissime, accende in me ignem, quem venisti mittere in terram, ut tibi soli placere studeam, & ab omnibus propter te despici exoptem.

8. O vnice dilecte Iesu, ne derelinquas me desolatum in hoc exilio; sed sicut promissisti, ita mecum age, ut vadas, & venias iterum ad me tempore opportuno, donec finito probationis certamine assumas me ad te ipsum.

9. Domine virtus mea sis in omnibus benedictus, in quibus me affligis; voluntatem tuam adimple in me, scio enim quod nihil potes agere injustè.

10. Oro te, Deus meus, eripe distractum & captiuum animum meum ab omnibus concupiscentiis, & corporalibus imaginibus, ut te ipsum in me illuminata ratione inueniam, qui

AD DEVM, CAP. XII. 137
me ad tuam pretiosam & incorru-
ptibilem imaginem fecisti.

DECAS V.

1. **D**Eus meus, omne bonum meū,
quando replebis me gratia, &
charitate tua, vt cognoscam quod tu
sis mihi omnia, quodque verè extra
te nihil sint omnia?
2. Orere mihi lux sempiterna, &
inclinentur vmbrae vanitatis meae, vt
ne atomus quidem me separet à te,
aut obumbret mihi.
3. O quàm suavis est, Domine, spi-
ritus tuus, & quàm dulcia faucibus
meis eloquia tua! vtinam semper eo-
rum memor sim ad faciendum ea.
4. Domine Deus, desidero lauda-
re te pro omnibus qui te ignorant,
vel blasphemant siue in terris, siue in
inferno.
5. Intuere me oculis misericordiae
tuae, & iustitiam tuam longè fac à
me, Deus meus, amor meus.
6. Tu scis, Domine, quia amo te:
repelle à me quicquid displicet tibi.
7. Nihil habeo, quod offeram tibi,

præter lacrymas contriti & amantis
cordis; suscipe eas, & misce sanguini
tuo, benignissime Iesu.

8. Tibi, Domine, hoc corpus nutrio,
tibi conseruo hanc vitam: vires
mihi largire, vt seruiam tibi.

9. Vtinam efficere possem, dulcissime
Deus, vt omnia gaudia, quæ
sunt & erunt in mundo, non sint nisi
de te. In te enim verum gaudium,
in te vera consolatio.

10. Posside, bone Iesu, cor meum,
& reple illud gratia tua.

DECAS VI.

1. **I**N te viuam, in te moriar, suauissime
Iesu, & tam in vita quàm
in morte cantabo tibi, quia bonus es,
& in æternum misericordia tua.

2. Absorbe, Domine, concupiscentiam
meam dulcedine tua, quam
abscondisti timentibus te, ne interior
gustus vanis illectus, & deceptus
ponat amarum dulce, & dulce
amarum.

3. Confugiat, Domine, mens mea
sub vmbra alarum tuarum ab æsti-

bus cogitationum huius seculi, vt in te abscondita cantet: In pace in idipsum dormiam & requiescam.

4. Da quæso, Domine, cordi meo te desiderare, desiderando quærere, quærendo inuenire, inueniendo amare.

5. Fac me funditus mori huic mūdo, & transeuntium rerum obliuisci præ magnitudine timoris & amoris tui, vt nihil temporale diligam aut metuam.

6. Deduc me, Domine, in iustitia tua propter inimicos meos, dirige in conspectu tuo viam meam.

7. Saluum me fac, Domine, quoniam defecit Sanctus, quoniam diminutæ sunt veritates à filiis hominum.

8. Perfice gressus meos in semitis tuis, vt non moueantur vestigia mea.

9. Tu qui dixisti, si quis sitit veniat ad me & bibat, da sitienti animæ meæ semper bibere ex te, vt secundum promissionem tuam fluant aquæ viuæ de ventre meo.

10. Expelle à me, omnipotens Deus, iactantiam mentis, & auge

cordis compunctionem : minue superbi-
am meam , & perfice in me ve-
ram humilitatem : libera me ab infi-
diis inimici , & conserua in tua vo-
luntate.

DECAS VII.

1. **C**Ognoscam te Domine virtus
mea , inueniam te desiderium
cordis mei , diligam te vita animæ
meæ.

2. Tibi laus , tibi gloria , tibi gra-
tiarum actio in secula sempiterna , ô
beata Trinitas , pro omnibus contu-
melis , quæ tibi ab impiis inferun-
tur.

3. Laudo te , Amor dulcissime , &
glorifico te pro omnibus , & in om-
nibus bonis , quæ tua gloriosissima
Diuinitas , & beatissima Humanitas
operata est in nobis per nobilissi-
mum instrumentum cordis tui , &
operabitur in secula seculorum.

4. In te projectus sum ex utero , de
ventre matris meæ Deus meus es tu ,
ne discesseris à me.

5. Dominus illuminatio mea , &
salus mea , quem timebo ? Dominus

AD DEVM, CAP. XII. 147
protector vitæ meæ, à quo trepida-
bo?

6. In manus tuas, Domine, com-
mendo spiritum meum; redemisti
me Domine Deus veritatis.

7. Complacet tibi, Domine, vt
eruas me; Domine ad adjuuandum
me respice.

8. Iudica, Domine, nocentes me,
expugna impugnantes me, appre-
hende arma & scutum, & exurge in
adjutorium mihi; dic animæ meæ
salus tua ego sum.

9. Miserere mei Deus, miserere
mei, quoniam in te confidit anima
mea.

10. Sitiuit in te, Deus, anima mea,
quam multipliciter tibi caro mea.

DECAS VIII.

1. **M**iserere mei Deus omnium,
& ostende mihi lucem mi-
serationum tuarum.

2. Benedicite omnia opera Domi-
ni Domino, laudate & superexalta-
te eum in secula.

3. Venite, audite, & narrabo, om-

142 VIA COMPENDII

nes qui timetis Deum, quanta fecit animæ meæ.

4. Deus in adiutorium meum intende, Domine ad adjuuandum me festina.

5. Repleatur os meum laude, ut cantem gloriam tuam, tota die magnitudinem tuam.

6. Domine Deus virtutum quis similis tibi? potens es Domine, & veritas tua in circuitu tuo.

7. Bonitatem, & disciplinam, & scientiam doce me; quia mandatis tuis credidi. Doce me justificationes tuas.

8. Quò ibo à spiritu tuo, & quo à facie tua fugiam? si ascendero in cœlum, tu illic es; si descendero in infernum, ades.

9. Ad te, Domine, leuaui animam meam, Deus meus in te confido, non erubescam.

10. Vidi præuaricantes, & tabescebam; quia eloquia tua non custodierunt.



DECAS IX.

1. **Q**uis similis tui in fortibus, Domine, quis similis tui? magnificus in sanctitate, terribilis, atque laudabilis, & faciens mirabilia.

2. Opto, Domine, patiens esse, & humilis, & resignatus: tu pro me supplere digneris quicquid mihi deest in his virtutibus.

3. O quàm desidero humilitatem habere! Da mihi thesaurum humilitatis tuæ, humillime Iesu Christe.

4. O quantum desidero pati pro te, amantissime Iesu! Tametsi induxeris omnes fluctus tuos super me, lætus omnia tolerabo per gratiam tuam ob amorem tui.

5. Recordare, Domine, quia Pater meus es: ecce anima mea nuda est; indue eam virtutibus tuis: ad patrem enim pertinet nudam & pauperculam filiam vestire.

6. Quid volo præter te, Domine, aut quid mihi prodesse omnia sine te? Tu solus sufficis animam meam.

7. Quàm vani sunt homines, qui te non quærunt; quàm miseri, & auari, quibustu non sufficis?

8. O si omnium hominum, quotquot fuerunt, sunt, & erunt, corda & voluntates solus haberein, vt iis te summè diligerem vnicum bonum meum!

9. In te, Domine speraui, non confundar in æternum. Et si Angelus de cœlo assereret mihi, me projectum esse à facie tua, non crederem illi. Et si tu ipse, summe Deus, diceres mihi, ego in æternum te damnaui, nolo audire preces tuas. (Ignosce, Domine) in hac re non crederem tibi; sed etiam si occidas me, & in inferno demergas me, semper in te sperabo.

10. Da mihi, Domine, vulnera tua: abhorreo enim videre cor meum, nisi vulneribus plenum, cùm te adeò crudeliter pro me videam crucifixum. Non possum viuere sine vulnere, cùm te vndique videam vulneratum.

CAPVT XIII.

*Suspiria amantis animæ pro
Perfectis.*

Perfectos appello, non ex omni parte: quis enim in hoc mundo? Imò, vt verissimè scribit Bernardus Drogoni Monacho, [Nemo perfectus est, qui perfectior esse non appetit: & in eo quisque perfectiorem se probat, quòd ad maiorem tendit perfectionem.] Perfectos igitur voco expurgatos à peccatis, ornatos virtutibus, qui in humilitate & charitate magnos iam progressus fecerunt, & ad intimam cum Deo vnionem feruenti affectu aspirant. Quia verò perfectio in amore Dei consistit, motus anagogici ad Perfectorum statum pertinentes, ex amore potissimùm desumuntur, vt ex subjectis formulis appareat.



DECAS I.

1. **O** Dulcedo cordis mei, ô vita animæ meæ, ô essentia essentia meæ, & jucunda requies spiritus mei, abstrahere me ab omnibus creaturis, vt solum requiescam in te.

2. O Domine Deus meus, spes mea & refugium meum, ô dilecte votorum meorum, quando omnem dissimilitudinem, & imperfectionem absumes in me?

3. O charorum omnium charissime: ô sponse floride, sponse mellifluae, quando me ornabis illis monilibus, quibus tibi placebo?

4. Trahe me post te, sponse dulcissime, vt alacriter, purè, perseveranter curram in odorem vnguentorum tuorum.

5. Effice me hominem secundum cor tuum, præpara tibi in me gratam habitationem, vt ad me venias, & mansionem apud me facias.

6. Inebria me vino charitatis tuæ, ô pulcher in me amator meus, vni me tibi intimè, & me totum transmuta in te.

7. O ignis increate, quando me totum concremabis flamma ardentissima amoris tui? quando perempta in me omni proprietate totus tuus ero?

8. O dilecte mi, quem solum quaero, quando mihi pulsanti, & gementi aperies? quando te ipsum mihi manifestabis, & dices, salus tua ego sum?

9. O immensa dulcedo mea, quando me totum in te rapies, & absorbebis, & abscondes? Quod enim est mari absorbere vnā guttam, hoc tibi est absorbere me.

10. O felicitas mea, ô totum & solum gaudium meum, quando sublati omnibus impedimentis introduces me in cubiculum gloriæ tuæ, & me tibi inseparabiliter agglutinabis?

DECAS II.

I. **Q**uæsiui vultum tuum, vultum tuum, Domine, requiram: frustra enim laboro, quamdiu te non quaero.

2. Nolo te sequi, Domine, per viam consolationum, & delectatio-

num; sed veri & puri amoris. Nolo id quod egreditur à te, sed te ipsum solum. Te solum volo, te solum desidero: nihil mihi extra te.

3. In te, Domine, est omne esse meum, omnis delectatio mea, omne bonum meum: Si quid meum dico, si meipsum nomino, te solum intelligo, qui solus meus es, & omnis essentia mea in te est.

4. Anima mea sicut terra sine aqua tibi: effunde ergo, clementissime Deus, largam super me benedictionem de rore cœli, & de pinguedine terræ viventium.

5. Vtinam dirumperes cœlos, & ad me descenderes, vt durities mea liquefacta deflueret, & amore tuo totus ignitus inenarrabilibus te gemitibus inuocarem.

6. Heu mihi, quia incolatus meus prolongatus est, & cogor ibi viuere, vnde mallem abesse: cogor abesse à te, cum quo tantopere cupio permanere.

7. O Amor quàm absconditus, quàm ignotus es? Te cupio, Domine, nihil aliud. Præbe mihi cor

tuum, & accipe meum.

8. O si possem velocissimè totam terram peragrarè, & clamore valido vbique vociferari, viuat amor Iesu Christi: Viuat amor Iesu Christi?

9. O superlucida & delitiosa Trinitas vnus Deus, pascè me tuis influxibus. O simplicissimum, & iucundissimum bonum, ô bonum incommutabile imple me te ipso: transfer in te originem meam: introduce me in fundum animæ meæ.

10. O charum principium meum, quando te feliciter inueniam? quando te ardentissimè diligam? quando me totum in te rapies? quando me totum absorbebis, & sine medio tibi vnies?

DECAS III.

1. **Q**Vando obdormiam, & requiescam in te, pax mea dulcissima? quando plenè aspirabit mihi Diuinitatis tuæ fragrantia? quando mihi exorietur dies sempiterna tuæ manifestæ visionis.

2. Per tuum cor transfuerberatum

transfige, amantissime Iesu, cor meum iaculo amoris tui, ita ut nihil terreni continere possit, sed à sola efficacia tuæ Divinitatis contineatur.

3. Ave Iesu sponse melliflue, saluto & veneror te omnium electorum tuorum affectu. Excita & rege spiritu tuo vivifico omnes motus cordis mei.

4. O amor meus & omne gaudium meum, quando inclinabitur umbra mortalitatis, & aspirabit dies æternitatis? quando depositâ sarcinâ corporis hujus cum Sanctis tuis perpetuè laudabo?

5. Recipe me, ô floride sponse, inter suavissimos amplexus amoris tui, quibus constrictus spiritus meus totus ardeat, & comburatur.

6. O bonum super omne bonum, ô finis sine fine, quando fruar te sine modo, & sine fine?

7. Pulcher es, dilecte mi, & amabilis valde, non carni & sensui; sed animæ credenti, mundum cor habenti, & ad invisibilia se transferenti.

8. Dominus meus, & Deus meus,

AD DEVM, CAP. XIII. 137

amem te solum propter te, & nihil
amem nisi in te.

9. O suauissime Cœli splendor adu-
re cor meum potentissimo charitatis
incendio : tibi viscera mea sacrifico,
vt ea aternis flammis comburas.

10. Cupio, Domine Iesu, vt quo-
ties aërem ad me attraho, te ipsam
cordiali affectu intra me attraham,
quatenus omnes cogitationes, verba,
& opera mea tuis cogitationibus,
verbis, & operibus vniantur, & sic
vnita Deo Patri ad maiorem eius
gloriam repræsententur.

DECAS IV.

1. **D**A mihi, Domine, vt te vi-
deam sine forma corporea, si-
ne specie imaginaria, sine luce crea-
ta. Trahe me post te extra me, &
extra omnes creaturas,

2. Malo, Domine, ex voluntate
tua acerbissimas inferni pœnas sine
fine tolerare, quam sine te gaudiis
perfrui sempiternis.

3. Demerge, dilectissime mi, par-
uulam guttam spiritus mei in im-

menso pelago bonitatis tuæ, demerge & absorbe me totum in abyſſo infinitæ miſericordiæ tuæ.

4. Veni ſuſpirata quies amantiſ animæ meæ, vt nulli mihi dies, nullæ noctes eant ſine te, nullus mihi ſomnus ſine te: tibi ſoli viuam, & moriar.

5. Quis ego ſum, & quis es tu amor meus? Numquid non multum eſſet, ſi te permitteres à me amari? ſed & inſuper te amari præcipis, & mihi mortem ſempiternam minaris, ſi te non amo.

6. Clementiſſime Pater, ſicut tu ab omni æternitate voluiſti, antequam ego eſſem, ita fiat: charior eſt enim mihi tua gratiſſima voluntas, quàm operandi libertas.

7. Quando me lætificabis in regno tuo, Domine Deus meus, clariſſimo vultu tuo? Quando omnia quæ credo, lego, & audio de te, & gloria tua clarè, & intuitiue videbo?

8. Sileat ante te omnis creatura, Deus meus: tu ſolus mihi loquaris, adſis, & illumines, qui es omnia in

omnibus, & super omnia amabilis,
& gloriosus.

9. Vulnera cor meum tam potenti
jaculo dilectionis tuæ, vt omnis
terrena consolatio amara mihi red-
datur, & omni solatio creaturarum
libenter caream.

10. Extingue, Domine, omnes ex-
traneas imagines in corde meo, vt
pacem nullibi, siue delectationem
vel quæram, vel inueniam, nisi in
te dulcissime Deus meus.

DECA S V.

1. **O** Charitas Deus meus, fac me
obsecro vnum tecum, sicut
tu, & Pater vnum estis, & sufficit
mihi.

2. Utinam, suauissime Iesu, ea flam-
ma amoris arderem, qua ardent Se-
raphim, qua ardet Mater tua, qua
ardes tu.

3. O si possem ab omnium cordi-
bus amorem, qui non est tuus, euel-
lere, & tuum inferere, vt amore tuo
omnes arderent, & languerent?

4. Amote Deus meus, quia Deus

es. Amo te æternitas mea, quia æternus es. Amo te immensitas mea, quia immensus es.

5. In amoris signum gratulor tibi, Deus meus, Diuinitatem tuam, simplicitatem tuam, æternitatem tuam, omnesque tuas perfectiones, quæ ita sunt in te, vt idem sint quod tu.

6. Vtinam omnia quæ cogitauī, quæ sum loquutus, & operatus ex puro tui amore semper fuissent? Vtinam te semper amassem?

7. O si possem, Deus meus, revertere annos meos, & peractæ ætatis spatia amoris tui actibus replere? ô si te semper dilexissem. cùm alia extra te dilexi.

8. Nihilum mei præcessit me à diebus æternitatis tuæ, Deus æterne; nunc verò exulto tibi factori meo, & cupio annihilari quicquid in me terrenum est, vt tu solus viuas in me.

9. O æternitas quàm clarè luces, quàm blandè, quàm præcisè, quàm in puncto? Ad te secedo à mundo isto sensibili: in te meum solatium, & recreatio est post negotia vitæ humanæ, post tædium vitæ labentis.

10. Tu desiderium collium eterno-
rum, dulcissime Iesu: tu desideratus
cunētis gentibus: tu sponsus, tu rex
cordium: tu amor meus, & omne
bonum meum.

DECAS VI.

1. **T**V scis Domine, quia si pos-
sem, omnem tibi laudem,
gloriam, & honorem tribuerem,
quibus te laudant, glorificant, &
honorant omnes Angeli, & Electi
tui; sed quia impotens ad hoc sum,
suscipe saltem desiderium meum, &
bonam voluntatem.

2. Exclude à me, Deus, omnia im-
pedimenta gloriæ tuæ, & in eo statu
me constitue, quem aptiorem fore
nosti, ut major tibi gloria ex me pro-
ueniat.

3. Possideam te in medio cordis
mei, beatitudo sempiterna, possi-
deam te, summa dulcedo animæ
meæ.

4. Me tibi resigno, Creator meus,
purè propter te ad omnia officia, lo-
ca, casus, euentus, statumque ani-

mæ, & corporis, qui tibi placuerit.

5. Nihil à te peto, Domine, nihil volo, nisi pro majori gloria tua. Quòd si per ignorantiam, vel errorem aliud peterem, nolo exaudiri.

6. Si tibi æquale præstatur obsequium; malo, Domine; desolationem, quàm consolationem, ut pro tui amore aliquid patiar internæ afflictionis.

7. Quia sine te nihil possum pati pro te, da mihi multam & magnam gratiam, ut multa & magna patiar pro amore tuo.

8. Major es omni laude, Deus meus; & ob id gaudeo, quia quicquid obsequij omnes puræ creaturæ præstare tibi quocumque modo conantur, longissimè impar est dignitati, & magnitudini tuæ.

9. Quicquid virtutum, piorum actuum, & affectuum in libris editis & edendis describitur, quicquid fieri potest tibi gratum & acceptum, id omne approbo, & volo, & cum gratia tua perficere cupio.

10. Utinam possem, Deus meus,

aliquid hoc momento efficere, quod summè tibi placeat. En hoc quod nunc aggredior purè ad hoc dirigo, vt maximam in eo habeas complacentiam.

DE CAS VII.

1. **Q**Væso te, Domine, ne partiaris quidquam in me, quod non sit vsquequaque tuum & diuinum; & si quid est, illud protinus euelle.

2. Si scirem, Deus meus, me fore annihilandum, adhuc tibi omni studio seruirem; non enim tibi seruió propter me, sed propter te.

3. Da, bone Iesu, vt oratio illa tua suam vim in me habeat, vt sicut tu in Patre, & Pater in te est; ita ego tecum vnus sim voluntate, amore, opere, moribus, & vitali.

4. Extingue me, Domine, in corde omnium hominum; & cunctos homines in corde meo occide, vt mihi mundus crucifixus sit, & ego mundo.

5. Mitte mihi Deus quamcum-

que volueris afflictionem & crucem
& in omni tribulatione præsta vt
reum me fatear & cognoscam, & vt
meipsum contemnam.

6. Hactenus quosdam amavi, qui
me non amabant; iam te amabo,
amator æterne, qui me amasti an-
tequam te nouissem; quem amare
virtus summa est, à quo amari felici-
tatis.

7. De profundis cordis mei clamo
ad te, suauissime Deus, vt auferas à
me vanissimum amorem corporeæ
pulchritudinis, & me totum trans-
feras ad purissimum amorem deco-
ris tui.

8. Illabere, precor te, in pene-
tralia cordis mei, & imprime mihi
seruo tuo dulcissimam & admirabi-
lem speciem tuam, vt quiescam in
suauitate præsentia tuæ.

9. Veni Domine, amor meus, gau-
dium meum, & corona mea: veni
& noli amplius tardare, ne ex nimio
desiderio sine sensu efficiar.

10. Scribe, dulcis Iesu, nomen
tuum in corde meo, & amorem
tuum effluum per jugem memo-

AD DEVM, CAP. XIII. 159
riam pectori meo inscribe.

DECAS VIII.

1. **V**incat nequitiam meam, Domine, immensa bonitas tua, & imaginem tuam in me recognosce, quamuis deturpatam.
2. Reuertor ad te felicissimum principium meum, dulcis origo & finis meus: esto deinceps totum ac solum cogitationum mearum objectum.
3. O vnum diuinum, te solum considerat cor meum, libera me ab omni multiplicitate.
4. Diligam te, Deus, pro dono tuo, & pro modo meo, exiguo quidem & minus justo; sed non possum ultra quam possum: potero autem plus, cum plus donare dignaberis, nunquam tamen pro ut dignus haberis.
5. O quam beati sunt illi, qui edunt & bibunt ad mensam tuam in regno tuo, quoniam te ardentem diligunt, & te fruuntur in laetitia & exultatione. Ego autem hic fame per-

co, & projectus in cinere & caligine lumen cœli non video.

6. Sitio te clarè cognoscere, esurio te perfectè diligere, nec desiderium meum adipiscî valeo. Obsecro, Domine, si inueni gratiam in oculis tuis, ostende mihi faciem tuam.

7. Fac mihi, Domine, quodcumque placitum fuerit in conspectu tuo: in manibus tuis ego sum, & corpus meum, & spiritus meus: quocumque peruenero laudabo te, & exultabo vehementer.

8. Satia animam meam ad te suspirantem, felicitas mea, & reple esurientem bonis tuis.

9. Deijciantur, quæso, omnia simulacra de throno gloriæ tuæ, vt tu sis solus regnans in corde meo, nec sim ego ampliùs miserabiliter instabilis, & fugitiuus à te.

10. Vniat me sibi verbum Dei, gignat seipsam in me sine intermissione æterna sapientia; & pro minimo mihi erit, si me despiciant cœlum, & terra, & omnia quæ in eis sunt. Quòd si me repuleris ab osculo tuo, non poterunt me omnia, quæ

AD DEVM, CAP. XIII. 161
infra te sunt, consolari.

DECAS IX.

1. **V**eni gaudium meum, lumen
oculorum meorum: veni
amor meus, lux incomprehensibilis,
imple omnes potentias animæ meæ
intus & foris, vt nihil nisi te videam,
cogitem, amem, & desirem.

2. Tu dixisti Domine: Ducam eam
in solitudinem, & ibi loquar ad cor
eius. Et quid aliud est solitudo, ni-
si te solum amare, in te solo quiesce-
re?

3. O diuina solitudo tam concu-
piscenti animo desiderata, quando
fiet istud, vt in te omnino quies-
cam?

4. Heu me, quia non diligo te, vira
animæ meæ, nam si verè te dilige-
rem, semper te in corde haberem;
scriptum est enim: Vbi est thesaurus
tuus, ibi est & cor tuum.

5. Congrega nos in vnum, poten-
tissime amator, data est enim tibi om-
nis potestas in cælo, & in terra.

6. Trahe me post te, suauissime

Redemptor, qui dixisti, si exaltatus fuero à terra, omnia traham ad me ipsum.

7. Accende cor meum igne tuo, Deus meus; tu enim ignis comburens es, & facis ministros tuos ignem viventem.

8. Deus meus es tu, qui infinita tua bonitate locupletissimus nec bonorum meorum, nec alterius cuiusque rei indigentiam habere potes. Et in hoc gaudeo & exulto, quod nulla tibi perfectio, nec quidem per imaginationem adungi possit.

9. Domine Iesu, quantum te diligunt, qui te nouerunt? Pater tuus te diligit, Spiritus sanctus te diligit; omnes Angeli, omnes Electi & amici tui amore tuo exardescunt; & ego solus frigidus ero?

10. Libera me Deus à multiloquio, quod patior intus in anima mea: non enim cogitationibus taceo, etiam si vocibus taceam. Multæ sunt cogitationes meæ, quales tu nosti cogitationes hominum, quoniam vanæ sunt. Da mihi eis non cōsentire, nec immorari, ne me impedian ab amore tuo.

DECAS X.

1. **O** Amor, quàm parum cognosceris, & amaris? Accede ad me, ô Amor, & si nullibi requiem inuenis, te totum transfunde in me, æterne & suauissime Amor.

2. Semper ardeat ignis amoris tui in altari cordis mei, & in tantum crescat incendium, vt non solum sacrificium, sed & ipsum altare comburat, & consumet.

3. Nihil me lætificet, Domine Iesu Christe, nisi tu: nihil me contristet, nisi culpa mea, & offensio tuæ Majestatis.

4. Tu es vnicum desiderium meum, æterna Sapientia, tu thesaurus quem quæro, tu beatitudo ad quam suspiro.

5. Quàm pulcher es, dilecte mi, quàm speciosus in deliciis tuis? Vtinam potentissimus amor tuus omnem extraneum amorem in me occidat. Quicquid videro, quicquid audiero, quicquid sensero; tu solus intres, & possideas cor meum.

6. O Amor potentissime, qui lutum transfiguras in Deum, transforma me totum in te. Nimis saxum est cor meum, nisi molliatur sanguine tuo: nimis distractum est, nisi colligatur in latere tuo.

7. O aeterna veritas, & vera charitas, & chara aeternitas! Tu es Deus meus, ad te suspiro die ac nocte. Te amo, te diligo, & magis amare desidero: percussisti enim cor meum verbo tuo, ut amarem te.

8. Quid amore dulcius? quid securius? quid suavius? Quare sagittis eius non est transfixum cor meum? Ergone amor tuus circumdat me undique, & nescio quid sit amor? cur sic maneo insensibilis? cur me magis attraxit creatura, quam Creator?

9. Venustissime Iesu, vita mea perennis, per quam vivo, & sine qua morior, vita dulcis & amabilis; concede ut tibi jungar, te complectar, & suavi charitate soporatus in te obdormiam.

10. Quando te videbo, dulcissime Deus? quando apparebo ante faciem tuam? quando transibo in admirabi-

Iam domum tuam? quando videbo te in terra viuentium? In ista enim terra jumentorum mortalibus oculis videri non potes, sed in regione Angelorum videbimus te, sicuti es.

CAPVT XIV.

Laudem virtutis in actione consistere. Actus diuersarum virtutum.

NOrunt omnes, qui vel primis Philosophiæ rudimentis imbuti sunt, omnem vim & laudem virtutis in actione sitam esse. Habitus enim virtutum, siue à Deo infundantur, siue acquirantur à nobis, data opportunitate in opus exire debent: & hoc est primarium eorum munus, bonæ actionis principium, & fontem esse; & potentiam, quam imbuunt, disponere ad hoc vt certius, & facilius operetur. Causa exigui profectus in vita spirituali non defectus cognitionis aut desiderij, sed defectus executionis esse solet. Aliud

est scire multas diuitias, aliud possidere: nec notitia diuitem facit, sed possessio. Actiones autem, quibus vnaquæque virtus aut generatur aut crescit, duplices sunt, internæ & externæ. De externis non est hîc disserendi locus, nec earum vsus semper occurrit. Internæ perfectiores sunt, solaque mente & voluntate perficiuntur, & idèd his incumbere possumus omni loco, omni tempore, & in qualibet occasione. Sunt qui vnâ virtutem singulis mensibus seligunt, cui ex professo incumbant, instituto ea de re examine particulari, quæ res necessaria omnino est proficere in studio perfectionis desiderantibus, vt fusiùs explicauî in meo Horologio christianæ diei. Scripsit etiam de virtutis actionibus luculentissimum tractatum ex Scripturis & Patribus Bernardinus Rossignolius, quem Lectori meo enixè commendo. Ego interrim in exemplum actus subijcio præcipuarum virtutum per breues Aspirationes feruentissimè eliciendos: qui modus seruari quoque potest in reliquarum actibus ad vñum & præ-

Sect. 2.

§. 27. &

Sect. 3.

§. 2.

ACTVS FIDEI.

1. **A**uctor fidei, Iesu Christe, firmissimè credo vera esse omnia, quæ te reuelante credit & docet sancta mater Ecclesia, & pro hac assertionem & veritate millies mori paratus sum.

2. Auge in me fidem à te semel infusam, vitamque fidei consonam concede, ut quod mente credo moribus exprimam.

3. Testimonia tua, Domine, credibilia facta sunt nimis, utinam secundum ea semper vixissem.

4. Verissima sunt omnia, quæ in sacris libris, & Apostolicis traditionibus, ac decretis Ecclesiæ continentur: pro qua veritate tuenda vitam meam libentissimè offero.

5. Omnino verum est te Deum meum vnum esse in substantia, & Trinitatem in personis: quod ego per medios gladios & ignes profitebor.

6. Utinam fides tua integra semper, & sincera conseruetur, qualem

tu, Domine, tradidisti, qualem Apostoli prædicauerunt.

7. Credo tibi, ô summa veritas, & quia fides sine operibus mortua est, da mihi, vt fidem meam patientia & charitate, aliisque virtutibus viuam esse demonstrem.

8. Gratias ago tibi, Domine, quod mihi fidem dederis, qua te agnoscerem, quòd me Christianum feceris, & Catholicæ Ecclesiæ membrum. In hac fide vixi, in eadem mori volo, atque vtinam pro eadem.

9. Credo te Deum ingenitum, Filium vnigenitum, Spiritum Sanctum ab vtroque procedentem. O credam, & fruar semper, quia tu Deus meus es, principium meum, & finis vltimus, & mea æterna beatitudo.

10. Credo te Dei filium pro mea salute carnem humanam induisse. Credo te passum pro me, & mortuū in cruce. Credo te Deum & hominem in sacramento mirabiliter existere. Credo hæc omnia, & alia, quæ de te docet Ecclesia, & credens adoro, & amo te.

11. Reuela, Domine, oculos meos, &

& considerabo mirabilia de lege tua.
Quàm dulcia faucibus meis eloquia
tua super melori meo!

12. O si fidem possem annunciare
in vniuerso mundo, & omnes infide-
les ad Deum conuertere: quàm
libenter id facerem, & si propterea
omnia tormenta sustinere deberem?

13. Utinam possem, Deus meus,
omnium infidelium intellectibus in-
te credere, omnium affectu te ama-
re, omnium viribus tibi seruire!

14. Discedite à me omnes pessimi
hæretici, filij diaboli, & pestes ani-
marum: vos detestor, & abominor,
& cum Ecclesia Dei anathematizo.

15. Quæcumque docet fides adeò
firmiter credo, ac si oculis ea viderem.
Adauge, Domine, & confir-
ma fidem meam: hac enim duce se-
curus ibo ad tribunal tuum, quacun-
que hora me vocaueris, quia credo
& spero videre bona tua in terra vi-
uentium.

ACTVS SPEI.

1. **C**lementissime Deus, tametsi multa & grauissima peccata commiserim, spero tamen ex tua misericordia, & ex bonis operibus gratiæ tuæ adiutorio præstitis me gloria sempiterna fruiturum.

2. Et si reus essem omnium peccatorum mundi, tamen in te sperabo, major est enim misericordia tua, quā iniquitas mea.

3. Gaudeo, Domine, nihil in me esse, in quo confidere possim: lator quodd nullibi spes mea consistere queat, nisi in te, qui solus es refugium meum, & firmamentū meum.

4. Dixisti, Domine, & ita est: Sine me nihil potestis facere: quid ergo residui habeo, nisi vt oculos ad te dirigam, & tu, ô bonitas, adiuues me?

5. Adjutor meus esto, ne derelinquas me, neque despicias me Deus salutaris meus. Tanquam prodigium factus sum multis, & tu adjutor fortis.

AD DEVM, CAP. XIV. 171

6. Ad te confugio, Domine, vt per patientiam, & consolationem scripturarum spem habeam, & in te sperans non confundar.

7. Omnis spes mea, optime Iesu, & totius fiducia certitudo in pretioso sanguine tuo mihi est. In ipso respiro, & in ipso confisus ad te peruenire desidero, non habens meam iustitiam, sed eam quæ est ex te.

8. Quicquid asperum & molestum mihi euenire permiserit diuina providentia tua, benignissime pater, semper in te sperabo: certus enim sum, quia si in inferno demersus fuero, inde me liberabis.

9. Magna valde est misericordia tua, Domine, & in ea sola posita est tota spes, & consolatio mea.

10. Mirifica misericordias tuas, qui saluos facis sperantes in te: custodi me vt pupillam oculi, sub vmbra alarum tuarum protege me.

11. Bonum est confidere in Domino, quàm confidere in homine: bonum est sperare in Domino, quàm sperare in Principibus.

12. Domine virtutum, beatus ho-

mo qui sperat in te. In te eripiar à tentatione, & in Deo meo transgrediar murum.

13. Toto corde firmissimè spero, omnipotens Deus, me posse à te omnia obtinere, quæ mihi necessaria sunt ad salutem: & quia Filius tuus, Redemptor meus omnia bona mihi promeruit, tantam in eius meritis fiduciam habeo, ac si bonum, quod desidero, iam tenerem & possiderem.

14. Ego autem in te speravi, Domine, dixi, Deus meus es tu, in manibus tuis sortes meæ.

15. O si citò adueniret regnum tuum, summum bonum meum, regnum quod spero, quod expecto, quod toto corde concupisco! Vtinam citò adueniat, quia regnum omnium seculorum est, plena possessio totius felicitatis.

ACTVS CHARITATIS

erga Deum.

1. **O** Ro te, dulcissime Deus, vt cordis mei principatum ge-

ras. Absit à me, optatissimum bonum meum, vt aliquid amem præter te.

2. Vre me incendio decoris tui, speciosissime princeps cordis mei, sacrifico tibi omnia viscera mea, & præcordia mea.

3. Viue potentissime imperator cordis mei, & dominare, sicut decet te. O quam mihi placet, vt regnes in æternum, & vltra.

4. Utinam tot millia cordiũ, quot tibi placuerunt, vel placere possunt, ipse possiderem, vt te perfectissime amarem.

5. Utinam subdere tibi possem, amabilissime Domine, omnia colla filiorum Adæ, vt te solum requirerent, & amarent.

6. O vnice amor meus, & serena lux oculorum meorum, omnia mihi fordeant, & vilescant præter te.

7. O amabile principium meum, & tota sufficientia mea, nihil volo, nihil cupio præter te.

8. O quantum gaudeo quòd Deus sis, summè bonus, & perfectus, immensus, infinitus, iustissimus, sapien-

tissimus, omnipotens, & incomprehensibilis! amo te purè propter te ipsum, & gaudeo de bonis tuis ob hanc solam causam, quia bona tua sunt.

9. Ad te summum bonum toto cordis affectu feror, in immensa bonitate tua exulto: gaudeo quòd omnes Angeli, & Sancti adorent, & laudent te.

10. Utinam possem amare te, quantum amabilis es! sed quia hoc excedit vires omnium creaturarum, utinam saltem amem te quantum possum, quantum debeo.

11. Reple, Deus meus, animam meam amore tuo, ut amore totus ardeam, & amore æstuans amore moriar.

12. Quàm poenitet me quòd alia extra te dilexi. Utinam possem transactos annos reuocare, & amoris tui actibus replere!

13. O dulcissima vita animæ meæ, utinam, deficiat in te cor meum! Quid enim mihi est in Cælo, & à te quid volui super terram?

14. Vnam petij à te, Domine, hanc requiram, ut habitem in domo tua

AD DEVM, CAP. XIV. 175
omnibus diebus vitæ meæ.

15. Utinam ultimus halitus, quo animam efflabo, halitus amoris sit. Moriar amore tuo, Deus meus, & quia vitam ab amore non inchoavi, da mihi vitam amando finire. Ultimus vitæ actus sit amare.

ACTVS CHARITATIS
erga Proximum.

1. **I**nsere, Domine pectoribus nostris tuæ dilectionis affectum, ut diligamus nos inuicem, sicut tu diligis nos, & alter alterius onera portemus.

2. Da mihi, Domine, non diligere verbo, neque lingua, sed opere & veritate, ut quæcumque volo ut faciant mihi homines, id faciam illis.

3. Doleo, Deus meus, quòd ea hactenus non præstiti in obsequium proximi mei, quæ tuo auxilio adiutus poteram.

4. Detestor quicquid injuriæ, & offensæ olim patraui verbo, opere, & cogitatione in proximum meum,

paratus singulis satisfacere, si quid alicui debeo. Inspira tu Deus, vt sciam; & da, vt faciam.

5. Amator hominum Deus, oro te pro omnibus, qui persequuntur, & calumniantur me; & qui me quouis modo offenderunt. Da illis salutem mentis, & corporis.

6. Utinam, Clementissime Deus, omnes peccatores resipiscant, & conuertantur ad te.

7. Obsecro, Domine, vt omnes, qui oppugnant Ecclesiam tuam dexteræ tuæ potentiâ conterantur, & agnoscant veritatem.

8. Propono, Domine, omnes injurias & offensas, te adjuuante, æquo animo tolerare: nec vllum vnquam hominem, quantumvis mihi infestum, odio habebo.

9. O si possem pro fratribus meis, iis præsertim, qui me aliqua injuria, aut molestia affecerunt, sanguinem fundere, quàm libenter id facerem. Confirma, Domine, in me hanc voluntatem.

10. Fac obsecro, Deus meus, per viscera misericordiæ tuæ, vt omnes

ad te conuertantur, qui rebus terrenis adhærent, & quos voluptas carnis illexit.

11. O si ego possem omnes peccatores ab erroribus viæ suæ conuvertere, etiam cum vitæ dispendio id præstarem.

12. Utinam totus mundus in te crederet, & te cognosceret. Confiteantur tibi populi omnes. Omnis terra adoret te, & psallat tibi.

13. Diligo te, Domine, toto corde, proximum in te, & propter te.

14. De bonis omnium fratrum meorum gaudeo, & de malis doleo, ac si mea forent: & mala quidem ab omnibus auertere efficaciter vellem, si possem; bona verò multiplicare.

15. Libenter, si possem, omnium indigentium necessitatibus subuenirem, esurientibus cibum, sitientibus potum darem; reliqua item opera misericordiæ spiritualia, & corporalia exercerem.

ACTVS PATIENTIÆ.

1. **S**I oportuit te, Christe, pati, & ita intrare in gloriam tuam, quo pacto ego in illam intrabo, nisi viâ regiâ sanctæ Crucis.
2. Cognoui, Domine, quia æquitas iudicia tua, & in veritate tua humiliasti me.
3. Opto potiùs cunctos inferni cruciatus tolerare, quàm tuam iustitiam violare.
4. Iram tuam, Domine, portabo, quoniam peccaui tibi. Quòd si bona suscepi de manu tua, quare mala non sustinebo?
5. In omni aduersitate te, bone Iesu, recogitabo, qui talem pro me sustinuisti aduersus te ipsum contradictionem.
6. Utinam dignus sim gaudenter cum Apostolis tuis contumeliam, pauperiem, & quicquid volueris pati pro nomine tuo.
7. Quicquid laboris mihi vnquam acciderit, id propter te, Domine, patienter feram. Si tentationibus

exercear; si mœror importunus ingruat, si morbi, si dolores, si quæuis tormenta contingant, omnia te iuuante fortiter tolerabo.

8. Absit à me, Domine, vt animum despondeam à christiana perfectione comparanda: omnes enim difficultates, te duce, superabo, & in Deo meo transgrediar murum.

9. Absit à me, vt amore vitæ, vel timore mortis à virtutis proposito desistam. Et si me oporteret vniuersis mundi miseriis, & calamitatibus obrui, numquam à te recedam.

10. Imprime, fortissime Deus, robur magnum cordi meo: cupio enim te sequi per omnem afflictionem, & desolationem internam, & externam.

11. Vt jumentum factus sum apud te, Domine Deus meus: Tu nosti onus meum quale sit, da mihi illud patienter ferre, vt per viam crucis extollar ad te.

12. Offero me tibi, Domine, paratum ad omnia mala æquanimiter, hilariter, ac sine vlla prorsus que-

180. VIA COMPENDII
rimonia sustinenda.

13. O si patientiam Sancti Iob assequi possem, & constantiam Sanctorum Martyrum!

14. Vtinam dignus essem martirium pro te subire, Domine virtus mea, & firmamentum meum. Vtinam pro te viuus comburerer: vtinam affari cum Laurentio mererer.

15. Da mihi, Domine, disciplinam, vt non auferas misericordiam: cæde contumacem, vt reddas mihi promissam hereditatem. Auge tormenta, sed auge patientiam.

ACTVS HUMILITATIS.

1. **O** Gemma pretiosissima humilitas, quando te possidebo! quando tranquillitatem animorum tibi obsequentium habebō! quando tuo splendore, & pulchritudine ornatus ero!

2. Nouerim te, nouerim me, Deus meus: quoniam in te sunt omnia bona mea, & ex me nihil sum.

3. Hoc ex corde desidero, bone Iesu, hoc eligo, abiectus esse, & pu-

filius in domo tua, magis quàm habitare in tabernaculis peccatorum.

4. Nolo, Domine, vt me homines laudent & honorent, quia omni laude & honore indignissimus sum: volo autem ad gloriam tuam despici, conculcari, & tanquam canis mortuus vilissimus reputari.

5. Latrones ipsi & sacrilegi, ô misericordissime Domine, perfectiùs tibi famularentur, si tot beneficiis, ac donis eos cumulasses, quibus me benignissimè affecisti.

6. Peccaui, Domine, & non sum dignus aspicere altitudinem Cœli præ multitudinem iniquitatum mearum.

7. Omnia animalia pro capto suo tibi, Domine, appropinquant, solus ego infinita vitæ meæ turpitudine à te recedo.

8. Vnde mihi hæc insania, Deus meus, vt audeam gloriari tot peccatorum reus, ob quæ potes hoc momento mittere me in gehennam?

9. Abijcio, me, Domine propter te infra homines vniuersos, quia vilior, & contemptibilior omnibus

sum, & pro tali haberi, ac tractari desidero.

10. Nihil aliud volo, nihil opto, altissime Deus, nisi pati & contemni pro te, da mihi claram & veram mei notitiam.

11. Indignus sum, Domine, omnibus donis tuis ob vilitatem, & ingritudinem meam: indignus confortio hominum propter sordes culparum mearum, quarum pessima tabe vel aërem ipsum inficio.

12. Vtinam vniuersi homines, equissime Deus, miseriam meam agnoscerent, & despicerent me, ac meam mihi indignitatem exprobrarent, vt spernerer propter te.

13. Domine non sum dignus calcare hoc pauimentum, per quod transeunt tot serui tui, quibus comparatus vermis sum & non homo, opprobrium hominum, & abjectio plebis.

14. Absit à me, Domine, vt velim ambulare in magnis, & in mirabilibus super me. Magna enim est abyssus fragilitatis, & nihili mei: nihil sum, nil possum sine te.

AD DEVM, CAP. XV. 185

15. Fac me, Deus, tamquam pa-
uimentum mundi, vt ab omnibus
conculcer, & indignissimè tracter,
quia sic exigunt peccata mea.

CAPVT XV.

*Fasciculus aspirationum ad Iesum,
ad B. Virginem, ad Caelites
vniuersos.*

TAmetsi oratio, vt est actus Re-
ligionis cultum patriæ continēs,
ad solum Deum fundenda sit, tan-
quam ad primarium auctorem boni,
qui illud per seipsum nobis conferre
potest; certum est tamen ex fide ca-
tholica posse nos, & debere Ange-
los etiam, & sanctos homines cum
Deo regnantes humiliter exorare,
opemque illorum deuotis aspiratio-
nibus implorate: Licet enim Chri-
stus sit principium vniuersale totius
meriti, mediator Dei & hominum,
qui semper interpellat pro nobis; aliis
tamen mediatoribus indigemus, qui

pro nostris necessitatibus efficaciter intercedant. Notissima est sententia Eliphaz Themanitis ad patientissimum Iob: [Voca si est qui tibi respondeat, & ad aliquem Sanctorum conuerrere.] Ideo operæ pretium me facturum existimaui, si huic lucubrationi caput istud attexerem, quo varias aspirationes breuiter digessi ad Iesum Redemptorem, à quo primitus omnia bona speranda, tum ad Virginem Beatissimam eius genitricem, deinde ad Angelos, & reliquos Ciuēs cœlestis patriæ, vt ipsi nobis quicquid ad salutem, & perfectionem necessarium est suis precibus obtineant, pro sua in nos pietate, & apud Deum auctoritate.

AD IESVM REDEMPTOREM.

1. **I**esu sapientia Patris, da mihi quærere & sapere, quæ sursum sunt, vt gustem quam suavis es.

2. Iesu verbum Patris vtinam audiam quid loquaris in me.

3. Iesu Redemptor, esto mihi in Deum protectorem, & in domum

AD DEVM, CAP. XV. 185
refugij, vt saluum me facias.

4. Iesu frater primogenite, fac me tibi coheredem in domo Patris nostri.

5. Iesu Fili Dei, qui pro me factus es homo, non sit mihi graue humiliari pro te.

6. Iesu creator meus, cor mundum in me crea, & spiritum rectum innotua in visceribus meis.

7. Iesu vita mea tibi soli viuatur anima mea, nam mihi viuere tu es, & mori lucrum.

8. Iesu Domine mi, posside me seruum tuum, & nemo præter te.

9. Iesu præceptor, doce me facere voluntatem tuam, vt discam à te quia mitis es, & humilis corde.

10. Iesu lux mundi, illumina oculos meos, & deduc me in semitam mandatorum tuorum.

11. Iesu fons vitæ, sitiuit in te anima mea: fac me haurire aquas in gaudio de fontibus tuis.

12. Iesu pastor bone, propter nomen tuum deduces me, & enutries me.

13. Iesu saluator, salua me, qui

venisti quærere, & saluum facere quod perierat.

14. Iesu sponse sanguinum, desponsa te mihi in misericordia, & miserationibus.

15. Iesu amator speciosissime, trahè me post te in funiculis charitatis.

16. Iesu zelator animarum, cujus delitiæ esse cum filiis hominû, amem te ardentissimo amore, & cætera omnia propter te.

17. Iesu panis vitæ, anima mea sustinet te, ne dimitte eam jejunam, vt non deficiat in via.

18. Iesu Iudex misericors, qui non venisti perdere quemquam, parce mihi, & responde pro me.

19. Iesu corona, & merces nostra magna nimis, jube me numerari inter electos tuos.

20. Iesu gloria mea, cupio dissolui, & esse tecum: da mihi viuere in te, & in te mori.



AD BEATAM VIRGINEM
MARIAM.

1. **P**Rotege me, dulcissima Virgo Maria, sub vmbra alarum tuarum, & non recedat in æternum mellifluum nomen tuum ab ore, & corde meo.
2. Ne vnquam elongeris à me, potentissima Mater Dei, quia circumdederunt me vndique inimici mei.
3. Quid possum sine te, Virgo beata, aut quid fiet de me, si auerteris faciem tuam à me?
4. Quando venies, dulcissima Virgo, quando apparebis indignissimo seruulo tuo!
5. Spiritus tuus, ô Maria, super mel dulcis, & possessio amoris tui super aurum, & topazion.
6. Sentiât anima mea suauitatem amoris tui, & in tuis semper versetur laudibus, quia vnica post Deum consolatio mea tu es.
7. Comparere, Domina, animæ meæ ad te suspiranti, respice in me, & festina in adiutorium meum.

8. Da mihi gratiam tuam, vt semper de te gaudeam, & post istud exilium te contempler in gloria.

9. Sicut filius ad sinum matris, ita suspirat ad te anima mea, ne despicias me Mater misericordiæ.

10. Quantum desidero videre vultum tuum, speciosissima Virgo, assume me velociter ad te, & comple desiderium meum.

11. Quis non diligit te, Regina cordium, & Mater sancti amoris, quis non diligit te? Vtinam omnes creaturæ tibi seruiant, & in amore tuo viuant, ac moriantur.

12. Suscipe cor meum, dilectissima Mater mea, & offer illud purissimis manibus tuis purissimo Filio tuo.

13. Gaudeo, & exulto, B. Virgo, quòd Deus te amet super omnia opera sua, & de hac re super omnia delector: magisque optarem inferni pœnas, quàm vt momenti spatio quicquam de gloria, & dignitate tua minuatur.

14. Sperent in te qui nouerunt nomen tuum, gloriosa Virgo, quo-

AD DEVM, CAP. XV. 189
niam non derelinquis sperantes in
te.

15. Gloriosus vultus tuus mihi appa-
pareat in extremis, & consolatio tua
latificet egredientem spiritum meum,
clementissima Mater.

AD SANCTOS ANGELOS.

1. **A**Ngele sancte, vitæ meæ gu-
bernator, & custos apprehen-
dende arma & scutum, & exurge in
adjutorium mihi.

2. Custodi me sub vmbra alarum
tuarum ab insidiis inimici, & ab om-
ni periculo, & tentatione.

3. Adesto mihi, Beatissime Spiritus,
doce, dirige, & protege me:
cumque finis vitæ meæ aduenerit,
in extrema lucta versanti benignè
succurre.

4. Septem Spiritus, qui astatim an-
te Dominum, purgate, illuminate,
& perficite me: & dirigite omnia stu-
dia, & actiones meas ad gloriam
Dei, & animæ meæ salutem.

5. Estote mihi singulare solatium
in morte, Angeli Dei, potentes vir-

tute, qui estis in vita salutare præsidium.

6. Infundite menti meæ deificum lumen, vt absumpta omni materia totus ardeam diuino amore.

7. Venite in adiutorium meum cœlestis militiæ exercitus innumerabiles, & defendite me ab incurfu malignorum spirituum.

8. O supremi amatores Dei, succendite me illo igne, quem Dominus Iesus misit in terram, & voluit vehementer accendi.

9. Fontes sapientiæ pascite me cœlesti doctrina, & docete me scientiam Sanctorum.

10. Facite me, mentes purissimæ, docilem Dei, vt discam justificationes eius; & discussis tenebris diuinum lumen inserite menti meæ.

AD OMNES SANCTOS.

I. **F**elices Sancti, qui iam nostræ mortalitatis pelagus pertransistis, securi de vestra immarcescibiligloria, solliciti estote de mea multiplici miseria.

2. Date manus infirmo, cœlestis patriæ Ciues, & erigite jacentem, vt conualefcens de infirmitate fortis efficiar in bello.

3. Eripite me de aquis multis, & de limo profundi fufis precibus ad eū, qui dominatur proteftati maris.

4. Impetrate mihi fidem & perfeuerantiam, feruire Domino in timore, & feruare mandata eius.

5. Clamo ad vos, potentiffimi protectores falutis meæ, mittite è patria felicitatis pauculas guttas pretiofiffimi vini charitatis vestræ, quia aruit ficut tefta virtus mea, & deficit præ fiti anima mea.

6. Subuenite mihi misero peccatori fedenti in tenebris, & vmbra mortis, & foluite vincula captiuitatis meæ.

7. Liberate me à tumultuantium affectionum turba, vt fedeam folitariuſ, & taceam, & audiam vocem Domini loquentis in ſilentio ad cor meum.

8. Eleuate me ab hac ſordida terra, vt mihi mundus crucifixus ſit, & ego mundo.

9. Ad me respicite, gens illustrissima & hereditas summi Dei, adhuc peregrinantem in hoc exilio, & mittere de Cælo opem, & consolationem.

10. Circumdate me gaudentem, & exultantem de vestra beatitudine, & gratiam impetrate virtutes vestras imitandi, ut vestris adiutus suffragiis particeps fiam vestri gaudij, & coronæ.

Hæc in exemplum. Plura suggerent usus, & affectus. Sunt autem quatuor capita, ac veluti fontes verissimi è quibus aspirationes ad omnes, & singulos æterni regni proceres peti possunt. Primò quidem ex titulis honoris, dignitatis, perfectionis, & diuersarum virtutum, quæ in illis elucent. Secundò ex perceptis beneficiis, pro illis gratias agendo. Tertio, inuocando illos, ut propitientur peccatis nostris, eorumque remissionem nobis obtineant. Quarto, multiplicem miseriam nostram, & innumerabiles necessitates proponendo, ut à malis omnibus erui, cunctisque bonis imbuatur
ipsorum

A D D E V M, C A P. XVI. 193
ipsorum meritis, & precibus, mereamur.

C A P V T XVI.

*Aspirationes ex nominibus Dei,
eiusque attributis, & perfectionibus.*

Qui magna mentis adepta puritate ad vnionem cum Deo aspirare iam digni sunt, præter affectus, quos pro perfectis supra descripsimus, alios elicere possunt ex diuinorum attributorum contemplatione. Ad hos enim pertinent Dei verba per os Prophetæ dicentis. [Vacate & videte quoniam ego sum Deus.] Vacate, inquit, ab inutilibus cogitationibus, ab affectibus, & desiderijs terrenis, & videte oculo fidei ac contemplationis, quoniam ego sum Deus omnipotens, immensus, infinitus. Rectè Sapiens: [Noscere Deum consummata iustitia est, & scire virtutem eius radix est immortalitatis.] Si tamen ad cognitionem

accedat amor: parum enim prodes-
set nuda Dei speculatio, nisi simul
voluntas ad eum assurgeret pijs af-
fectibus & motibus anagogicis. Id
qualiter fieri debeat, sequentibus
aspirationibus breuiter indicabo, vt
qui Theologica Dei notitia imbuti
sunt, dicant cum Apostolo: [Con-
uersatio nostra in Cœlis est.]

D E C A S I.

1. **A** Peri, Domine, oculos ani-
mæ meæ, vt non contenti
aspectu rerum temporalium, quas
percipiunt sensus; ascendant ad æ-
terna contemplanda, quæ non vi-
dentur, teque aspiciant Deum inui-
sibilem, qui es tu omnibus, & super
omnia.

2. Deus immensæ maiestatis, ve-
rè mirabilis facta est scientia tua ex
me, omnia tamen ossa mea, omnia
membra, sensus, & potentie dicunt,
quia tu es Deus, & non est alius simi-
lis tibi. Tu es meum esse & meavi-
ta, & gaudeo, quia te plusquam me
diligere debeo.

3. O si omnia membra mea, omnes sensus, & fibra verterentur in linguas, vt hoc prædicarent toti mundo, quia tu solus es qui es, ac propterea omnes gentes te laudarent, & glorificarent! O si te omnes agnoscerent, & diligerent plusquam vitam suam, quia in te omnes viuunt, mouentur, & sunt!

4. O pelagus omnis essentiaë, & existentiaë, tu es ipsummet esse omne esse cõtinentis: à te omnia pendent & effluunt, & in te refluunt, & eatenus sunt, quatenus aliquid tui esse participant. Me igitur despiciam, & omnia quæ non sunt: te autem amabo, & tibi adhærebo, qui solus es.

5. Deus perfectissime, & causa omnium entium, perfice gratia tua esse, quod mihi dedisti, vt perfectum sit, sicut & tuum perfectum est, quia ex me ipso nihil sum.

6. O substantia simplicissima, quæ omnia es, quam intimè te diligere, & super omnia aestimare debeo! Tu nihil de temporibus, nihil de locis, nihil de rebus trahis. Non partibus conistas, vt corpus: non af-

fectibus distas, vt anima non formis
substas, vt omne quod factum est.
Fac me æmulari simplicitatem tuam,
vt in omnibus simplex & purus sim,
te solum quærens & desiderans.

7. Tu solus impeccabilis es, tu
solus habes immortalitatem. Per
hanc te oro, vt moriar morte iusto-
rum, & à morte peccati semper eri-
piar.

8. Clarifica, Domine, mentem
meam, vt cognoscam illud esse, quod
tu habes per tuam essentiam, & il-
lud non esse, quod ego habeo ex me
ipso; vt supra duplicem hanc co-
gnitionem, tanquam supra duplicem
polum moueatur rota vitæ meæ,
donec ad te perueniam.

9. Quàm immensa, & incompre-
hensibilis est perfectio tua, Domine,
cui nihil deest, & à quo omnia per-
fectionem accipiunt! Sim & ego
perfectus, sicut & tu perfectus es.
Operare in me quod iussisti, & fac
me ita perfectum, vt nihil mihi desit.

10. Deus meus & omnia, princi-
pium meum & finis vltimus, tu es
mihi omnia quæ concupiscere pos-

AD DEVM, CAP. XVI. 197
fum: tu meæ diuitiæ, meæ delitiæ,
mei honores, & dignitates, ac the-
sauri infiniti: in te solo omnia ha-
beo, omnia autem sine te nihil sunt
mihi. Quando veniam ad te, vt in
te omnia habeam?

DECAS II.

1. **I**llumina intellectum meum,
perfectissime Dus, vt in creatu-
ris omnibus te respiciam earum
creatorem, à quo illæ suam perfe-
ctionem accipiunt. Purifica affe-
ctum, vt in omnibus te amem, &
quæram, qui es bonum & finis om-
nium.

2. O dilecte cordis mei, si ita me
oblectat pulchritudo, & perfectio
creaturarum, cur non potius pul-
chritudo, & perfectio tua, à qua illæ
processerunt? Diligam te præ om-
nibus, qui omnium pulchritudinem
& perfectionem excedis in infini-
tum, nec illas diligam, nisi in te, &
propter te.

3. Tu solus, Domine, nullum
terminum habes: omnes gentes.

quasi non sint, sic sunt coram te. Tuam igitur infinitatem adoro, & absque vlllo termino te amare desidero.

4. Deus immense, qui excelsior Cælo es, profundior inferno, longior terra, latior mari; qui omnia repleas, omnia, contines, omnia penetras, clarifica internos oculos meos, vt certiùs te videam, quàm si te viderem oculo externo & corporeo.

5. Rex superne, qui in toto tuo regno ita es per essentiam, vt totus assistas cuilibet parti; concede mihi, vt totus coram te sim, tibi que seruiam ex toto corde, ex tota mente, ex tota virtute.

6. Domine Deus, qui in omni loco contemplaris bonos & malos, acue fidem meam, vt cùm solus sum, me solum, non esse considerem, teque præsentem attendens, nihil faciam tua præsentia indignum.

7. Deus meus, qui realiter intra me es, magis intimus mihi, quam sim ego mihi ipsi, perfice in me hanc coniunctionem, quam mecum

habes, addens perfectissimam vnionem gratiæ, & charitatis tuæ, vt vnus tecum spiritus efficiar in æternum.

8. Deus immutabilis, apud quem non est transmutatio, nec vicissitudinis obumbratio, fac me immutabiliter tibi adherere, vt sicut tu idem ipse es, & anni tui non deficient, ita ego à via rectitudinis nunquam deficiam, & in amore tuo semper idem perseuerem.

9. Æterne Deus, principio carens & fine, fac me despicere temporalia, quæ caduca sunt & transitoria, & diligere æterna, quæ semper tecum perdurabunt.

10. Omnes dij gentium damonia, tu autem, Domine, solus es Deus, & non est alius præter te; Propugna causam tuam, & destrue multitudinem idolorum, vt omnes homines in te vnum sint, teque vno ore laudent & glorificent. Da etiam mihi illud vnum, quod solum est necessarium.

DECAS III.

1. **D**eus inuisibilis, quando te vīdebo, non per speculum, & in enigmate, sed facie ad faciem! O si te cognoscerem, sicut à te cognitus sum, ut sicut tu me amas, ita te amarem! sed quia cognitio obscura & brevis est, te amabo quantum possum, donec te videam sicut desidero.

2. Incomprehensibilis & ineffabilis Deus, gaudeo quòd ipsi supremi Spiritus in tuo conspectu quasi cœci sint: vincis enim omnem scientiam illorum, nec vlla creatura te nominare, sicuti es, aut comprehendere potest. Utinam saltem vires omnes intendam, & applicem ad te diligendum, quandoquidem ad comprehendendum non sufficio.

3. Deus viuens & verus, prima & summa veritas, verax in sermonibus tuis, & fidelis in promissionibus: da mihi, obsecro, veritatem amare, in veritate ambulare, in te sperare & credere, & omnem hypocrisim ac duplicitatem detestari.

4. Sancte Sanctorum Deus, exemplar & finis totius sanctitatis, fateor me nullam sanctitatem habere posse, nisi tu dederis; nec in ea persistere, nisi tu conseruaueris. Funda me in hac profunda humilitate, vt dignus sim ascendere ad altissimam sanctitatem.

5. O summa, suprema, & essentialis bonitas, Deus meus, quam pœnitent me, quòd te derelicto fonte omnium bonorum, ad bona fucata & apparentia me conuerterim! Mirifica voluntatem meam, vt te vnicum & summum bonum quæram & diligam.

6. Da mihi, ô summa bonitas, summum amorem mihi possibilem, vt toto illo te summè amabilem amem. Deberem sanè infinito amore te prosequi, quia infiniter bonus es, sed quia incapax infiniti amoris sum, opto saltem te amare summo conatu mihi possibili.

7. Totus mihi es amabilis, Dilecte mi, quia totum est bonum quicquid est in te. Vtinam sic tibi amabile esset quicquid est in me. Aufer ab

anima mea omne genus culpæ & maculæ, vt tota sit pulchra in oculis tuis, & amabilis cordi tuo.

8. Ne permittas, bonitas infinita, vllum esse hominem, qui te non amet: aperi oculos odientium te; si enim viua fide te cognoscerent; nunquam odissent.

9. Mirabilis es, Domine, in te ipso, mirabilis in operibus tuis, mirabilis in Sanctis tuis: Tu facis mirabilia magna solus. Te igitur intellectus meus rerum nouarum & mirabilium indagator semper consideret, reliqua omnia tanquam vilia & communia reijciat.

10. Cor meum & caro mea exultauerunt in Deum viuum: licet enim horrendum sit incidere in manus Dei viuentis ad vindictam, valde tamen amabile est incidere in manus tuas, Deus viuens & vita, ad misericordiam.

DECAS. IV.

Deus scientiarum, & totius sapientiæ fons, qui omnia

noſti, & nihil eſt, abſconditum ab oculis tuis: ecce colloco me in infimo loco mei nihili, & meæ omnimodæ ignorantia; precorque humiliter, vt tribuas mihi noſſe te ipſum, & voluntatem tuam, & hæc cognitio ſufficit mihi, adiuuante me gratia tua, vt te cognitum diligam, & faciam quod à me requiris.

2. Domine discretor cogitationum, & intentionum cordis, in cuius conſpectu nulla eſt creatura inuiſibilis, vtinam noſcas me ex nomine, vt me cognitum & tuæ prouidentia; ſubiectum ſciens, omnem mei curam & ſolicitudinem in te proijciam.

3. O altitudo diuitiarum ſapientia; & ſcientia; Dei, quàm incomprehenſibilia ſunt iudicia tua, & inueſtigabiles viæ tuæ! Incerta & occulta huius admirabilis ſapientia; veneror & adoro, cuiusque iuſtiſſimæ diſpoſitioni me prorsus committo.

4. Emitte, Domine, ſapientiam tuam à ſede magnitudinis tuæ, vt mecum ſit, & mecum labore, vt ſciam quid acceptum ſit coram te.

omni tempore: præcedat illa omnia opera mea, comitetur me in omnibus quæ fecero, ac eò deducat, ubi clarè te videam.

5. Rerum omnium summe Artifex Deus, qui omnia disposuisti in numero, pondere, & mensura, iuxta exemplar in mente tua præexistens; fac me ita perfectum, ut ideam veræ perfectionis in te existentem, quantum fieri potest, imiter, & exprimam in me ipso.

6. Lux beatissima Deus, & lumen cordium, qui lucem habitas inaccessibilem, & illuminas omnem hominem venientem in hunc mundum, emitte lucem tuam à montibus æternis, & splendoribus Sanctorum illumina cor meum, ut verbo & exemplo cunctis præluceam.

7. Deus, qui reuelas abscondita, & vides in tenebris constituta, da mihi abyssum iudiciorum tuorum timere, & venerari, tuamque voluntatem in præceptis & consilijs tuis reuelatam semper agnoscere, & strenuè perficere: cætera verò, quæ ad me non pertinent, nequaquam perscrutari.

8. Ostende mihi, Deus, magnitudinem amoris tui, vt eo cognito vehementer admirer, & secundum paruitatem meam tantæ dignationi vicem rependam.

9. Gratias tibi ago, Amantissime Deus, quia ab æterno dilexisti me, & ex mera gratia tua voluisti, vt essem, & talis essem. Fateor impossibile esse, vt eo modo te diligam, quo tu me: possum enim bene tibi velle, sed non aliquid dare tibi, quo tu careas. Do nihilominus tibi quod ipse mihi largitus es, seruiens tibi, & pro omnibus gratias agens: quod verò tibi dare nequeo, debeo proximis meis, amore tu.

10. Quàm admirabilis est amor tuus erga hominem, Deus meus, propter quem tot creaturas in sua natura perfectas condidisti! O si tot haberem corda, quot illæ sunt, vt illis omnibus earum nomine te diligere & glorificarem, reddens tibi debitum quod illæ nequeunt, & cuius ego illarum causa debitor sum!

¶ Vnde semper te diligam.

DECAS V.

1. **A** Mator sempiternæ, qui nunquam cessas amare, & cum amore operari; nam si cessares, omnia desinerent esse; concede mihi, ut nunquam cessem te amare, aut propter amorem tuum operari; si enim charitatem non habuero, nihil sum.

2. Diligam te toto corde, Deus meus, & omnem amorem meum in te vno collocabo, quia tu Pater meus es, tu frater, tu sponsus, tu amicus, & benefactor in æternum.

3. Dulcissime Deus, amabilis super omnia quæ cogitari possunt: magnum fuit beneficium, quod me ad imaginem & similitudinem tuam condideris, sed infinita charitas tua adhuc me voluit ad altiore similitudinem eleuare per gratiam & charitatem, ut non solum seruus, sed amicus tuus essem. Utinam hæc amicitia ex parte mea perfecta sit, sicut ex tua est perfectissima.

4. Utinam semper te dilexissem?

superoptime Deus, ex quo sum homo, quia tu me dilexisti ex quo es Deus. Ne differas, anima mea, Deum diligere, ama Amorem ab aeterno te amantem.

5. Quàm immensa est charitas tua, æterne Deus, qui solem tuum oriri facis super bonos & malos! Occlude, si fieri potest, ianuas inferni, ut nemo eò descendat, vbi omnes te oderunt: aperi portas Cœli, ut omnes eò conscendant, vbi omnes te diligunt.

6. O altitudo bonitatis Dei, ô amor ineffabilis, qui ut perfectam cum homine amicitiam contraheres, illum ad Dei æqualitatem sublimasti. Quas tibi referam gratias pro tam eximio beneficio? laudet te ipsamet charitas tua, & benedicant opera, quæ ab illa proueniunt.

7. Exulto, Domine, cùm lego in scripturis tuis, quia tu charitas es. Quid enim dulcius, quid lætius audiri potest? Da igitur mihi te ipsum, da charitatem tuam. Diligam te, sicut vis diligere, & da quod iubes, ut implere possim quod desideras.

8. Deus fortis, & Zelotes, Deus æmulator, qui ob nimium erga me amorem zelo zelaris, ne amorem tibi debitum alteri tribuam: accendatur velut ignis zelus tuus, nec me vnquam permittas ab amore tuo declinare.

9. Amator ardentissime, cuius amor transiit in zelum, comedat me zelus gloriæ tuæ, & ad eam propagandam semper impellat.

10. Deus author pacis & amator, aufer à zelo meo omnem perturbationem, vt similis sit zelo tuo; pacificus, discretus, secundum scientiam. Tu es enim princeps pacis, & Ecclesiam tuam fundasti in pulchritudine pacis: omnia in pace & tranquillitate disponis, & factus est in pace locus tuus.

DECAS VI.

1. **M**iserator, & misericors Domine, longanimis & multum misericors, cui proprium est misereri semper & parcere; mirifica super me misericordia m tuam, & se

eundem multitudinem miserationum tuarum dele omnes iniquitates meas.

2. Præueniat me misericordia tua, Domine, & subsequatur omnibus diebus vitæ meæ, vt liber sim ab omni miseria animæ, & corporis. Veniant mihi miserationes tuæ, & viuam, & cantabo in æternum, quia tu es Deus vita mea, & misericordia mea.

3. Iustus es, Domine, & rectum iudicium tuum, iustitia plena est dextera tua. Millies pro hac te laudo, precorque, vt non intres in iudicium cum seruo tuo, quia non iustificabitur in conspectu tuo omnis viuens.

4. Iustissime Iudex, qui scrutaris Hierusalem in lucernis, & iudicas æquitatem, vide si via iniquitatis in me est, & deduc me in via æterna. Vl-ciscere hic in omnes adinventiones meas, vt parcas in æternitate. Libera me nunc ab omni peccato, vt in iudicio tuo ab vltione liber euadam.

5. Fortissime Deus, in quo omnia, & sine quo nihil possum, vide infir-

mitatem meam, & laborem meum,
& roboram me virtute tua, vt me ipsum
vincam, & omnia quæ virtuti ad-
uerfantur.

6. Scio, Domine, quia tu es Deus
clemens, & benignus, & infinita
patientia, qui dissimulas peccata
hominum propter penitentiam: su-
scipe me itaque reuertentem ad te,
& præsta, vt patientia tua non abu-
tar.

7. Verè tu, Domine, suavis & mi-
tis es, & multæ misericordiæ omni-
bus inuocantibus te; quare, precor,
vt corripas me in mansuetudine, &
suauitate tua, non autem in furore
tuo; ne fortè ad nihilum redigas
me.

8. Magnus es Domine, & lauda-
bilis nimis, terribilis super omnes
Deos: benedicant te omnia opera
tua, cælum & terra, & quicquid in
eis continetur.

9. Quicquid eueniat mihi, Do-
mine, semper laus tua erit in ore
meo. Lingua autem deficiente, om-
nis respiratio mea sit laudis tuæ si-
gnificatio, corpore verò extincto, &

in puluerem redacto, laudes tibi infinitas dicant minutissima quæque pulueris grana vsque ad extremum iudicij diem.

10. Vniuersa propter temetipsum operatus es, Domine, tu finis omnium rerum, & non est alius vltimus finis præter te. Verè fecisti nos ad te, & inquietum est cor nostrum, donec requiescat in te. Tu es ciuitas, ad quam tendimus; tu portus, ad quem nauigamus; tu magnes cordis nostri. Trahe nos igitur ad te ab hoc durissimo exilio, ab hoc mari procelloso.

DECAS VII.

1. **T**erribilis es Domine, & magnus vehementer, & mirabilis potentia tua; fecisti enim omnia quæ voluisti in cælo & in terra, quia subest tibi cum volueris posse: imò plura infinities facere potes, quàm vel cogitatione ego assequi valeam. Robora impotentiam meam omnipotentia tua, quia sine te nihil facere possum, & tu omnia operaris in me.

2. Deus liberalissime, gratias ago tibi ob tot insignia opera tuæ infinitæ liberalitatis: concede vt sim liberalis in reddendo tibi, quod à te accipio.

3. Offero tibi cor meum, suscipe illud, Domine, quia melius & securius apud te erit, quàm apud me.

4. O Deus omnipotens, qui totam terræ molem appendis, nulli rei extra innixus, oro vt mihi nihilum meum verè agnoscenti, tu solus mea sis firmitas, & in te segura sit virtus mea.

5. Benignissime Pater, cuius providentia in sui dispositione non fallitur, dirige omnes actiones meas in finem à te destinatum, quia in manibus tuis sortes meæ, & ijs me totaliter committo.

6. Amantissime creator, qui admiranda providentia singulis prospicis creaturis, & mihi ab æterno bona preparasti; quibus nunc fruor; fac me ita transire per bona temporalia, vt non amittam æterna.

7. Respexisti me, Deus, ante mundi constitutionem, & dilexisti me.

antequam quicquam boni vel mali facerem, & ex mera tua bonitate elegisti me in Christo, vt essem sanctus & immaculatus. Et nunc, Domine, gratias ago pro tam insigni beneficio, precorque, vt des mihi per bona opera certam facere vocationem meam.

8. Manus tuæ, Domine, fecerunt me, & plasmauerunt me: da mihi intellectum, vt discam mandata tua. Et sicut esse quod habeo dedisti mihi, ita etiam da perfectionem, qua careo, vt opus tuum sit omni ex parte perfectum.

9. O Sapiencia Diuina, quæ ex ore Altissimi prodiisti, primogenita ante omnem creaturam, quæ effecisti in cœlis, vt oriretur lumen indeficiens, largire mihi partem aliquam tuæ lucis quæ indeficiens in me permaneat.

10. Aeterna Sapiencia, cuius delicta creare filios hominum, & esse cum illis, quando quidem me creasti, conuersationis tuæ & boni infiniti capacem, ne vacuam esse permittas hanc in me capacitatem, sed age

me cum familiariter, & imple me te-
ipſa, quia tu ſola ſufficis mihi.

DECAS VIII.

1. **P**Ater miſericordiarum, qui
Electos tuos prædeſtinasti
conformes fieri Imagini Filij tui, ita
me illi conforma in ſanctitate, vt
cum apparuerit, ei ſimilis ſim in
gloria.

2. Benefactor immenſe, dator &
conſeruator omnium bonorum, qui
omnia quæ feciſti continuata qua-
dam creatione conſeruas, & ad om-
nes actiones noſtras ſemper concur-
ris; conſerua me, quoniam in te
ſperaui, & fac me ſemper operari
quod tibi placet, vt concursus tuus
in meum commodum ſemper cedat,
& ad maiorem tui gloriam.

3. Rege me, Domine, & guber-
na me: ne, quæſo, ego meipſum re-
gam, nec me gubernet mundus, aut
caro: tu enim ſolicitus es de me,
meique curam ſapientiſſimè geris, ac
ſi ego ſolus eſſem in mundo, qui ta-
men omnium ſum miſerrimus.

4. Submitto me, Domine, prouidentia & dispositioni tuae in tempore & in aeternitate: in te projicio omnem sollicitudinem meam; quia non derelinquis diligentes te: & si quaesiero regnum Dei, & iustitiam eius; caetera omnia adijcientur mihi.

5. Gratias tibi ago, bonum infinitum, quia ex malis nostris bona deducis, & permittis nostram miseriam, ut magis emineat misericordia tua: Ostende quaeso in me huiusmodi prouidentiam, ut omnia mihi cooperentur in bonum.

6. O suauissima Dei prouidentia, quid amplius facere potuisti? Sic nimis mirum dilexisti mundum, ut Filium tuum Unigenitum dares: Filium, inquam, tuum, ut seruum redimeres, tradidisti. Applica nunc mihi tam copiosae redemptionis fructus, ut per gratiam tuam redemptus, te fruatur semper in gloria.

7. Esto mihi, dulcissime Iesu, sapientia, iustitia, sanctificatio, & redemptio, applicans mihi efficaciter pretium sanguinis tui, quem pro omnibus effudisti.

8. Tibi gratias ago, Amantissime, Pater, quia me vocasti vocatione tua sancta ad fidem tuam, & statim natum per baptismum regenerasti; atque autem auersum miris modis ad te pertraxisti, & gratiâ tuâ iustificasti. Nisi enim tua inspiratio me præuenisset immeritum, iam meritis pro sceleribus pœnis afficerer.

9. Domine Dominus noster, quam admirabile est nomen tuum in vniuersa terra! Mirabilis enim fuisti in creatione, mirabilis in redemptione, sed multò mirabilior in conuiuio quod parasti nobis in dulcedine tua, in quo anima nostra, Redemptoris nostri carnem manducat, & sanguinem bibit. Utinam mihi liceat hac salutari mensa refecto dicere cum Apostolo: Viuo ego, iam non ego, viuit verò in me Christus.

10. Pastor supreme, salua me ex ore leonum, & luporum infernalium, quia parasti in conspectu meo hanc mensam cœlestem, aduersus eos qui tribulant me.

DECAS IX.

1. **O** Fons bonitatis, Deus animæ meæ, quis sum ego, & quæ domus mea, vt me vocare dignatus sis ad hunc sublimem statum Religionis; Nam cū essem in seculo sicut vnus ex multis, claudicans in duas partes, innotuisti de cælo, & dedisti vocem tuam, vocem magnam & efficacem, qua de mundi deserto eduxisti me, & in paradysum transtulisti.

2. Gratias tibi, Magister supreme, quod me in discipulum tuum elegeris in hac schola perfectionis, multis aliis relictis, qui me digniores erant. Da mihi sequi vestigia tua, & quod docuisti semper implere.

3. Adueniat regnum tuum, Rex sempiternæ, regnum æternum, quod præparasti diligentibus te: Ostende mihi bona, quæ promisisti, & ita me excita ad illa procuranda, vt ea tandem obtineam.

4. Quàm dilecta tabernacula tua, Domine virtutum! Concupiscit, &

præ magnitudine desiderij deficit anima mea, dum cogitat de atriis tuis. O quando veniam, vt in eis habitem, & tanta fruar pulchritudine?

5. Multa scio de te, Domine, sed nescio quid dicam. Quicquid enim dixero, quicquid cogitauero finitum est, tu autem immensus es, & incomprehensibilis, & magnitudinis tuæ non est finis.

6. Deus infinite, qui es Trinus in personis, sed vnus in essentia; & ita diuinitatem communicas, vt Vnitas non lædatur; communica mihi copiosam gratiam, vt sim tecum vnus charitate perfecta.

7. Sancte Sanctorum, Deus spirituum, & cunctæ carnis, à cuius conspectu tremit cælum & terra, omni qua valeo virtute te benedico, quia per Ecclesiæ tuæ sanctæ documenta in fide tua confirmasti me.

8. Te inuoco, Beata Trinitas, vt venias in me, & templum dignum gloriæ tuæ efficias me. Perfice me Deus, qui plasmasti me, vsque

ad plenam formam imaginis, & similitudinis tuæ, ad quam fecisti me.

9. Deus immense, à quo omnia per quem omnia, in quo omnia facta sunt, custodi me opus manuum tuarum in te sperantem, & in tua solummodò misericordia confidentem.

10. Domine, qui dixisti: Non videbit me homo, & viuet, Moriar, vt te videam. Hæc est enim vita æterna, vt te Patrem, Filium, & Spiritum Sanctum, vnum, verum, & solum Deum cognoscam, & amem in secula seculorum.

DECAS X.

1. **P**ater immensæ maiestatis, principium absque principio, qui à nullo procedis, gaudeo quod intra te ipsum Verbum tuum æternum concipias, Filiumque generes adedò tibi similem, vt sit vnum & idem tecum.

2. Pater cœlestis, à quo omnis Paternitas in cœlo & in terra no-

minatur, obsecro te per Filium tuum Vnigenitum, in quo tantopere delectaris, vt multos alios gignas filios per gratiam adoptionis, vt Paternitas tua ybique dilatetur, & resplendeat.

3. Pater ingenite, innascibilis, improducibilis, fons Deitatis, ac totius entitatis origo, sanctifica me in veritate, vt qui à te processi, in te perpetuò maneam, nec vnquam mens mea à te auertatur.

4. Fili Dei Vnigenite, qui æterna generatione à Patre procedis, ipsi coræqualis, & consubstantialis, fac me pro modulo meo huius similitudinis, & æqualitatis aliqua ex parte participem.

5. Fili Dei, Deus de Deo, lumen de lumine, sapientia increata, candor lucis æternæ, fac me filium lucis in hac vita, vt in æterna lumine gloriæ illustratus videam te gloriosum & benedictum in secula.

6. Splendor paternæ gloriæ, & figura substantiæ eius, qui summè dilectus à Patre, ipsumque Patrè summè diligens, simul cum ipso vnica

spiratione producis Spiritum Sanctum: emitte lucem tuam, & veritatem tuam, vt splendoribus tuis illustratus cognoscam te, & diligam, sicut tu diligis Patrem, & eum perfectè cognoscis.

7. Sancte Spiritus, consolator dulcissime, donum Altissimi, & vnctio Electorum, da mihi teipsum donum infinitum, vt & ego spiritus sim sicut es tu, omnis terrenæ contagionis expers; & sanctus sicut tu, currens inoffenso pede viam mandatorum tuorum.

8. Spiritus Patris, à quo accipis diuinitatem, & omnipotentiam: Spiritus Filij, à quo accipis eiusdè sapientiam: Spiritus vtriusque, à quibus accipis infinitum amorem, quo se mutuo amant; illabere menti meæ, & fac concordiam in affectibus meis, vt coniungar tibi in vno spiritu, & totus conuertar in spiritum amoris.

9. Sanctissime Spiritus, & amor suauissime, charitas essentialis, & totius charitatis principium, bonitas æterna, à qua omnia bona in nos def-

ceundunt: inflamma voluntatem meam
feruentissimo tui amore, & adstringe
me tibi, ac Patri, & Filio; vt nec
intellectu, nec affectu à vobis diuel-
lar.

10. Sancta & adoranda Trinitas,
Deus meus, & omne bonum meum,
da teipsum mihi, & sufficit mihi.
Quid enim ei sufficiet, cui tu non
sufficis?

CAPVT XVII.

*Vitam Christi esse fontem om-
nium bonorum. Quomodo ex
ea pij affectus eliciantur.*

Prolixi voluminis opus foret bo-
na omnia commemorare, quæ
ex vita Christi velut ex fonte vber-
rimo, & nunquam deficiente scatu-
riunt, & perenniter fluunt. Ipse
enim Saluator noster factus est no-
bis à Deo sapientia, iustitia, redem-
ptio, & sanctificatio. In ipso habemus
diuitias salutis, thesaurum me-

ritorum, cumulum perfectionis. Si-
 cut Sol aspectu suo latificat, influit,
 illuminat, nec vnquam cessat ope-
 rari: ita verus Sol animarum Iesus
 Christus iugi influxu infundit in nos,
 & imprimit mores suos, virtutes
 suas, suam Diuinitatem. Vitæ eius
 consideratio erigit in aduersis, in
 prosperis reprimat, tollit peccata,
 conciliat gratiam, excitat ad amo-
 rem, iuuat incipientes, dirigit pro-
 ficientes, edocet perfectos. Quem-
 admodum vnguentarij semper olent
 id quod attrahant; sic Christianus,
 qui assidue cum Christo versatur,
 eius redolet patientiam, charitatem,
 humilitatem, cæterasque virtutes,
 quas vitæ suæ studioso sensim instil-
 lat idem Dominus virtutum, cuius
 doctrina seminarium iustitiæ, vita
 speculum prudentiæ & temperan-
 tiæ, mors exemplum est fortitudi-
 nis. Sed quia non sufficit Christi vi-
 tam meditari, nisi etiam ex ea pij &
 deuoti affectus eliciantur, huius rei
 praxim in hoc capitulo breuiter in-
 dicabo, vt auctorem fidei respicien-
 tes, eundem salutis nostræ atque

DECAS I.

1. **D**omine Iesu Christe, conce-
de mihi misero peccatori vi-
tam & mores tuos præ oculis men-
tis semper habere, & pro viribus
imitari.

2. O charitas infinita, ô admiran-
da dignatio tua, Domine, vt ser-
uum redimeres Filium tradidisti.

3. Vidisti, suauissime Iesu, afflictio-
nem populi tui, & graue onus filio-
rum Adam, & tactus stimulis cha-
ritatis intrinsecus cogitasti super nos
cogitationes pacis, & redemptionis.
Nam vbi aduenit plenitudo
temporis, visitasti nos oriens ex al-
to.

4. Deus immensæ maiestatis, quid
est homo, quod memor es eius, aut
filius hominis, quoniam visitas eum?
Laudent te Angeli tui ob tantum a-
more, quo nos miseros prosequeris.

5. Salue dies tot ætatibus optata,
qua Deus pro nobis factus est homo.

AD DEVM, CAP. XVII. 225
Salve Gabriel Archangele tanti gaudi-
ij annunciator. Salve Virgo glo-
riosa, in cuius castissimo utero car-
nem assumpsit Deus.

6. O quàm potens es Amor, qui
ad tam infima abijcis Deum ! O
quàm diuino dissimilis est amor
meus !

7. Princeps supreme, qui de Cœ-
lo in terram pro mea salute descen-
disti, tanto mihi charior es, quan-
to pro me factus es vilior.

8. Verbum incarnatum plenum
gratiæ & veritatis, eadem gratia im-
ple animam meam, vt tibi placeat.

9. Verbum diuinum partem ali-
quam largire mihi lucis, & gratia-
rum, quas tribuisti assumptæ huma-
nitati. Deprime cor meum humili-
tate vsque ad infimum locum : erige
gratitudine & amore ad altissimum
gradum.

10. Christe Saluator, qui adhuc
clausus maternis visceribus ad Præ-
cursores sanctificandum propera-
sti ; da mihi peccatorum veniam, &
spiritualem in tuo obsequio læti-
tiam.

DECAS II.

1. **I**esu amabilissime, qui pro me nasci in sordenti stabulo voluisti, illumina mentem meam, & voluntatem, quo tuam Natiuitatem contemplari valeam, & elucentes in ea virtutes imitari.

2. Cur non ardet cor meum tenerissimo tui amore, Infans formosissime, qui salutem meam in ipso tui ortu operari cœpisti?

3. Utinam Natiuitati tuæ præsens fuisset, dignusque habitus, qui te amplecterer, & mea tibi obsequia deferrem. Accepta, Domine, hanc voluntatem & præsta, ut quicquid possum, quicquid sum tuo semper famulatui impendam.

4. O inaudita amoris prodigia! Dilecti mei cubile, stabulum est, desponsationis meæ thalamus. præsepe, lectus sponsi mei fœnum, puluillus stramen, aula vilis spelunca.

5. O sanctam Filij Dei paupertatem, omnibus mundi diuitijs præ-

rosiorem ! hanc mihi commendabilem tuo exemplo reddidisti, bone Iesu, natus in stabulo, pannis inuolutus; qui Cælum stellis, terram floribus adornasti. Infunde cordi meo eius amorem, & da patienti animo eius molestias perferre.

6. O quantum lugere debeo pro peccatis meis, pijssime Iesu, quandoquidem tu pro eis ploras ! Me enim abluunt vagientis tuæ infantiae fletus, mea delicta tuæ deplorant lacrymæ.

7. Iesu sapientissime, qui tacendo doces & vagiendo prædicas; doce me in silentio humilitatem tuam sequi, tibi que conformem fieri infantili simplicitate, & innocentia.

8. Fortunati Pastores, quibus ante omnes lapsus è Cælo Deus, stabuloque reconditus angelica voce nuntiatur.

9. Verè gloria in excelsis Deo: nam cui gloria, nisi tibi Rex gloriæ ? Trahe cor meum in excelsa, ut nunquam degenerem ab excelsis cogitationibus filiorum tuorum.

10. Da mihi, Saluator dulcissime,

quam omnibus offers bonam voluntatem, pacemque diuinam, vt abiecta mundi inconstantia, & discordia in beneplacito tuo stabilis perseuerem.

DECAS III.

1. **L**audote te, redemptor mundi, pro prima sanguinis tui in terrima ætate effusione, cum tua caro immaculata pœnam circumcisionis, quam non meruit, sustinuit.

2. O lapsus Adæ, quàm es amarus Domino meo! ego peccaui, & tu Domine, pœnam exoluis, ego in concupiscentia conceptus & natus sum, & tu suscipis in te vltionem.

3. Sponsus sanguinis tu mihi es, qui cùm voce nondum possis, ipso cruore tuo clamas pro me ad Patrẽ; mihi que tribuis arrham desponsationis sanguinem tuum, preciosum super aurum & topazion.

4. Circumcide, Domine, omnia membra & sensus meos spirituali petra, quæ tu ipse es, & quicquid in me repereris carnale, & superfluum abscinde, & extirpa; vitamque meam

disciplinæ tuæ rigore coërcere.

5. O dulcissimum nomen Iesu, super omne nomen in Cælo & in terra benedictum, esto mihi salus & redemptio: non enim est aliud nomen hominibus datum, in quo oporteat nos saluos fieri.

6. Esto mihi, Iesu, id quod diceris. Esto mihi turris fortitudinis à facie inimici. Scribe nomen tuum salutiferum in corde meo, vt ibi maneat semper impressum, donec perducatur ad æternam salutem.

7. Glorifico te Deus, pro primitiis gentium, & earum admirabili illuminatione, cum eas ob oriente in persona trium Magorum ad fidem tuam secreta inspiratione traxisti.

8. Adoro te, Rex Regum, cum sanctis Magis, & pro illorum muneribus offero tibi aurum paupertatis, thus obedientiæ, myrrham castitatis.

9. Vtinam omnes gentes te fide viuam cognoscerent, & adorarent, & tibi fideliter seruirent!

10. Da mihi, Domine, horum virorum fidem, & constantiam, vt

eadem, qua illi, perseverantiâ te
quæram, donec inueniam.

DECAS IV.

1. **V**Oluiſti, Domine, præſentari
in templo, & more ſeruo-
rum quinque ſiclis redimi: ſit bene-
dicta immenſa charitas tua: & quia
Pater tuus te mihi tradidit quinque
ſiclorum pretio, ego viciffim trado
me tibi in ſeruum perpetuum. Fiat
per gratiam tuam, vt nec tu me vn-
quam deſeras, nec ego te.

2. Benedico te, ſanctiſſime Re-
demptor, quia vt nobis veræ obe-
dientiæ exemplum relinqueres, te
legalibus inſtitutis, tanquam vnus
de populo ſubdidifti. Da mihi in
omnibus perfectiſſimam obedi-
tiam.

3. Offero tibi, Domine, par tur-
rurum, geminam ſcilicet compun-
ctionem; primò quidem pro pecca-
tis, & negligentis meis, deinde ve-
rò pro æterna felicitate, ad quam
iugiter ſuſpiro.

4. Da mihi, bone Ieſu, radium

aliquem illius lucis, quam Sancto
seni Simeoni tribuisti, cum te infan-
tem in vlnas suas suscepit, vt te a-
gnoscam, & amem, sicut ille te no-
uit & amauit.

5. Sapientissime Iesu qui Sanctæ
Genitrici tuæ doloris gladium, quo
transfigenda erat, reuelari voluisti,
transfige animam meam gladio
compunctionis, ne me dissoluant
vanæ mundi consolationes.

6. Vix natus eras, Rex amantissi-
me, cum subito mundus te perse-
quitur, & Rex Herodes statim te
quærit, vt perdat te, sicut autem te
caput bonorum persecuti sunt im-
pij, ita & membra tua. Da mihi igi-
tur hanc veritatem agnoscere, &
malorum persecutiones patienter
ferre.

7. Tecum fugere, Iesu dulcissime,
& omnia quæ mundi huius sunt re-
linquere, graue mihi non erit: nam
si tu mecum fueris, quid poterit mi-
hi deesse?

8. Comitare fugientem Deum,
anima mea, nec erubescere ad hanc
fugam. Gloriosum est & dulce pro

Deo abijci, & contemni.

9. Adesto mihi, Deus, gratia tua, vt in huius vitæ exilio, voluntati tuæ subiectus vitam, semper bonum exemplum illis præbens, cum quibus vixero.

10. Dulcis Iesu, qui reuocatus ab Ægypto, vbi exul diu fuisti, in Nazareth secessisti, & Nazaræus vocatus es: da mihi leges Nazaræorum spiritualiter obseruare, abstinere nimirum ab omni amore inordinato, & nihil tangere quod possit maculare animam meam.

DECAS V.

1. **N**ihil scimus de te, ô Sapientia incarnata, vsque ad annum duodecim ætatis tuæ, & multa scimus. Ipsa enim taciturnitas tua clamat in cordibus nostris; vt silentium tuum, & humilitatem admiremur, & imitemur.

2. Sedisti in medio Doctorum, sapientissime puer, interrogans prudenter, & respondens modeste, ita vt omnes mirarentur. Vtinam illic

AD DEVM, CAP. XVII. 233
ad fuiffem, & sermones tuos audire
licuiffet. Repete eos, Domine, in
corde meo, vt fructu eorum per-
fruar in æternum.

3. O quàm dolenter quæfuit te
amiffum mater tua, quàm lætanter
te inuenit! Da mihi exemplo tuo in
his femper effe, quæ Dei funt, nulla
habita ratione cognationis, & fan-
guinis: & fac, vt te abfentem folici-
tè femper quæram, donec inueniam.

4. Congratulor tibi, Beatiffima
Virgo, quòd dilectiffimum tuum in-
ueneris: ora pro me, ne vnquam il-
lum amittam, aut ab eo difcedam.

5. Proficiebas, dulciffime puer, fa-
pientia, ætate, & gratia apud Deum,
& homines; quia maiora quotidie
cedebas, virtutis indicia, ego autem
proficere opto à remiffiori vita ad
feruentem & perfectam. Da tu mihi
benedictionem tuam, vt iuxta defi-
derium meum crefcam de virtute in
virtutem, donec ad gradum fupre-
mum perueniam.

6. O humilitas Chrifti quantum
confundis superbiam & vanitatem
meam? Tulatuiffi, Domine, & tacui-

sti vsque ad trigesimum annum, cum
esses sapientia æterna: ego verò stul-
tissimus cum sim, inaniter loqui præ-
sumo, & apparere. Doce me viam
solidioris humilitatis, & tuis sem-
per inharere vestigijs.

7. Domine Iesu, fons bonitatis &
origo virtutum, qui à baptismo
Ioannis prædicationem tuam auspi-
catus es, quid tibi & baptismo isti,
cum sis innocentissimus? Utinam
superbia mea hoc tam mirabili hu-
militatis exemplo exterminetur!

8. Rex altissime, qui omnem iu-
stitiam sic implere voluisti, baptiza
me in igne & spiritu, & ablue ani-
mam meam ab omni sorde iniqui-
tatum.

9. Imple me, Domine, Spiritu
Sancto, ut eo inspirante sequar te in
desertum, & secedam ab homini-
bus, orationi, ieiunio, & pœnitentia
incumbens.

10. Fortissime athleta, Iesu Chri-
ste, qui strenuè contra Diabolum
dimicasti, & eum gloriosè supera-
sti; da mihi viriliter contra ipsum
decertare, & mitte sanctos Angelos

tuos, qui me fideliter custodiant, potenter adiuuent, & benignè consolentur.

DECAS VI.

1. **C**onfiteor tibi Pater, Domine cæli & terræ, quia Redemptionis nostræ mysteria abscondisti à sapientibus, & prudentibus huius seculi, & paruulis piscatoribus reuelasti, vt mundi sapientiam destrueres. Fac me paruulum in oculis meis, vt magnus fiam in tuis.

2. Dux supreme, qui omnes ad te vocas per viam crucis & abnegationis, gratiam tuam largire mihi, vt crucem meam indefessus portem vsque ad mortem.

3. Aliam viam, Domine, tenere nolo, quàm tuam: nec aliam, quàm tuam veritatem amplecti: nec aliam vitam ducere, præter eam, quam tu docuisti. Tu es enim via, veritas, & vita.

4. Gratias ago tibi, æterne Pater, quòd talem mihi magistrum, legislatorem, & consiliarium dederis, cu-

ius præcepta & monita via tutissima salutis sunt.

5. Aperi os tuum, Saluator mundi, & loquere ad cor meum, quia audit seruus tuus, desiderans id exequi quod audierit.

6. Illumina me splendoribus tuis superne Magister, vt perfectionem agnoscam, quam mihi commendas: igne tuo accende, vt eam amem: potentiâ corrobora, vt eam quæram & assequar.

7. Saluator potentissime, qui tot miracula verbo virtutis tuæ patrare dignatus es; innoua signa, immuta mirabilia, & animæ meæ languores sana, eamque resuscita à morte vitiorum.

8. Inclyte Iesu, lux mundi, salus populi, & gloria nostra, respice propitius infirmitatem meam: nemo enim potest spiritualia vulnera curare, nisi tu qui solus es Deus.

9. Circuisti vicôs & plateas, dulcissime Iesu, vt peccatores conuerteres, & pœnitentibus indulgentiam conferres: fac me huius charitatis tuæ participem, & miserere mei.

quoniam iniquitatem meam ego cognosco.

10. Millies te laudo, & benedico, Iesu sanctissime, exemplar omnium virtutum pro vita tua pauperrima, humillima, purissima, patientissima: tribue mihi miserrimo seruo tuo mores tuos sedulò meditari, & ad eorum normam omnes actus, sermones, & gestus meos efformare.

DECAS VII.

1. **Q**uàm immensa fuit charitas tua, benignissime Redemptor, quia non solum pro salute mea vitam ærumnosam ducere, sed eam insuper acerbissima passione & morte claudere voluisti. O quàm grauiasunt peccata mea, quæ talem poscebant satisfactionem!

2. Clementissime Pater, per passionem & mortem Unigeniti tui ignosce peccatis famuli tui. Suscipe sacrificium filij tui, & obliuiscere iniuriarum nequissimi serui tui. Multò enim plura ille soluit, quàm sit debitum meum.

3. O passio Christi desiderabilis, o

amabilis mors, sana vulnera mea, & viuifica me: inflamina pectus meum, vt præ amore liquefcat,

4. Non peto mundi diuitias, sed tuas angustias, Domine Iesu: non carnis delitias, sed tua flagella.

5. Rogo te, dulcis Iesu, ne sinas vnquam me obliuisci mortis & passionis tuæ; sed præsta, vt in ea mihi sit requies & accessus ad Diuinitatem.

6. Omnia vulnera tua, Domine, inscribe cordi meo, vt tu solus, tuæque passio in eo legantur. Intra vulnera tua absconde me.

7. Domine Iesu, qui nos sic amasti, vt tibi non parceres, veni; & ne differas vulnerare cor meum, vt solum tua vulnera sentiam, & in ijs iugiter maneam, & requiescam.

8. Tui dolores semper occupent pectus meum, vt eorum memor dicam cum sponsa: Fasciculus myrrhæ dilectus meus mihi inter vbera mea commorabitur.

9. Dulcis Iesu, qui tanto feruore & festinatione in Hierusalem ascendisti, vt durissimam mortem pro me

AD DEVM, CAP. XVII. 239
patereris, fac me alacrem & freuentem ad omnia quæcunque volueris pro te sustinenda.

10. Saluator mundi, qui à perdito discipulo venditus fuisti, ne quæso permittas, vt pro vili pretio rerum terrenarum te summum bonum meum vendam & derelinquam.

DECAS VIII.

1. **H**Vmille Iesu, qui serui obsequio lauisti pedes discipulorum tuorum, amplius laua me ab iniquitate mea, & à Spiritu superbiæ libera me.

2. O dilecte cordis mei, qui imminente passione tua perpetui amoris tui pignus immensum reliquisti nobis, corpus tuum scilicet in cibum, & sanguinem in potum; præpara me ad hoc conuiuium, & orna animam meam virtutibus tuis.

3. O Rex supreme, qui nutris sanguine tuo populum tuum, vt simus omnes de regio tuo sanguine genus electum, regale sacerdotium, gens sancta; fac me agnoscere genus

meum, & de eo gloriari, & à moribus tuis nunquam degenerem esse.

4. Vt passio tua esset acerbior, amabilissime Iesu, omnem lætitiā à te procul abiecisti, incipiens pauere, contristari, & mœstus esse, & vbi dolor meus in causa tua & mea? Fac me semper memorem tristitiæ tuæ, vt omnem angustiam quacumque ex causa mihi aduenientem pro tui nominis gloria libenter patiar.

5. O lætitia Angelorum, qui in tristitia tua ad orationis remedium confugisti, concede mihi misero, vt ab lacte à lacte, & auellar ab vberibus humanarum consolationum, meque totum orationi applicem, in qua sanctissimam voluntatem tuam & cognoscam, & exequar.

6. Transeat à te, Domine, ad me calix tuus: omnis enim amaritudo pro te degustata erit mihi iucundissima.

7. Quis mihi det dolores tuos ita sentire, afflictissime Iesu, vt vel eorum cogitatio sanguineum à me sudorem eliciat? Adiuua me gratiā tuā, vt voti huius compos efficiar,

8. Laudo

8. Laudo & glorifico te, mitissime Iesu, pro tua ineffabili mansuetudine, quam ostendisti à perfido discipulo osculo traditus, & ab impijs comprehensus, atque ligatus: da mihi hunc spiritum lenitatis, quo erga meipsum seuerus sim, & erga proximum mansuetus.

9. Quàm celeriter ire cogeris à tuis hostibus raptatus, dulcissime Iesu, sed multò magis à tua charitate: ne quaeso patiaris, vt à te alacriter sequendo desistam, etiam si multi labores, & dolores subeundi sint.

10. Iesu innocentissime, qui per diuersa tribunalia crudeliter trahi voluisti, victima meorum criminum; dirige gressus meos in viam pacis, & iube me venire ad te; nam & si oportuerit me mori tecum, non te negabo.

DECAS IX.

I. **O** Bone Iesu, virtus & fortitudo animæ meæ, qui tot irrisiones, percussiones, & contumelias admirabili patientia tolerasti,

doce me omnia mihi aduersantia
miti silentio vincere, & tranquillo
corde suscipere,

2. Pijsissime Iesu, qui nequissimo
latrone & homicida nocentior pro-
clamatus fuisti, fac me vana homi-
num iudicia contemnere, & oppro-
brium tuum semper præ oculis ha-
bere, falsisque mundi honoribus
præponere.

3. Mitissime Iesu, qui nudus ad
columnam alligatus, & durissime
propter scelera mea flagellatus fuisti;
concede animæ meæ, vt diuturnis
criminum tempestatibus iactata in
hac columna portum inueniat, Liga
me ad eam in funiculis Adam, in
vinculis charitatis.

4. Rex Christe, corona Sancto-
rum omnium, qui inaudito suppli-
cio spinis coronatus fuisti, & iocu-
lari purpura indutus; fac me om-
nem contemptum patienter ferre,
atque inglorium omnibus apparere,
tuasque spinas semper amare.

5. Benignissime amator homi-
num, qui ab iniquo iudice morte
turpissima damnatus fuisti, cum sis

speculum innocentia, & sanctitatis: quanto magis me pati oportebit sinistra hominum iudicia, qui in multis tam sapè deliqui?

6. Proficiscere, bone Iesu, ligno crucis onustus, sed multo magis amoris pondere pressus, & qui dolori tuo non parcis, parce peccatis meis.

7. Iugum tuum, Domine, suaue est, & onus tuum leue, fac vt illud gaudenter portem, abnegans metipsum, & crucem meam baiulans post te.

8. Suauissime Iesu, qui tam inhumaniter in cruce extendi voluisti, vt numerari possent omnia ossa tua: præsta vt omnia membra, sensus, & potentias ad te semper erectas tibi amanter vniam, & clauis timoris tui cruci tuæ perpetuò affixus maneam.

5. Ad te, Domine, clamantem exaudi, & qui dixisti Apostolis tuis, cum exaltatus fuero à terra, omnia traham ad me ipsum; trahe me ad te, & excipe animam meam in foraminibus petra, in cauernis maceria.

10. Agnosco, gloriosissime Fili Dei, titulum tuum; tu es enim Iesus Nazarenus Rex Iudæorum. Vtinam orbis vniuersus hunc titulum legat, & admittat, teque omnes confiteantur Regem suum & Saluatorem.

DECAS X.

1. **I**esu vita morientium, qui cum iam mortuus esses pro nobis, latus tuum lancea aperiri voluisti, vt accedentibus ad te facilis pateret aditus ad cor; admitte me in latus tuum, vt in eo sit requies mea in seculum seculi.

2. O quinque Christi pretiosa vulnera, diuina dulcedine plena saluto & veneror vos: in vobis enim medicina vitæ, copia gratiæ, plenitudo indulgentiæ.

3. In latere tuo latere volo, Iesu mi crucifixe, ibi orare, ibi tractare negotia mea: quia ibi quicquid voluerō obtinebo.

4. Gratias ago tibi, Saluator mundi, quia opus Redemptionis nostræ

AD DEVM, CAP. XVII. 245
perfectissimè peregisti: perfice & in
me opus quod incœpisti, vt plena
in me, & consummata iustitia repe-
riatur.

5. Quanta duritia cordis mei?
concutitur terra, dissiliunt saxa, ob-
tenebrantur cœli, moriente Domi-
no: solum cor meum immortuum
erit, qui tantæ necis causa fuit? Scin-
de illud, Domine, & frange sangui-
ne tuo.

6. Sepeli cor meum tecum, &
absconde me intra vulnera tua, di-
lectissime Iesu, vt extra te nusquam
reperiar.

7. Obsignacor meum, Domine,
& sensus ac facultates sigillo chari-
tatis tuæ, vt sic obsignatus tecum
maneam in æternum.

8. O Rex gloriæ, Domine virtu-
tum, qui post mortem descendisti
ad inferos, & iustos è carcere edu-
xisti, gaudeo de hoc tuo triumpho,
& precor, vt omnem tartaream po-
testatem virtute tua vincere me fa-
cias.

9. O Triūphator gloriosissime, fac
me participem passionis tuæ, vt sim.

etiam resurrectionis: tecum moriar, ut tecum resurgam, & tecum tandem ascendam in cœlum.

10. Rex sempiternæ, qui sedes ad dexteram Patris, trahe me post te, ut illic semper fixum sit cor meum, ubi tu es thesaurus meus, & gloria mea, Deus cordis mei, & pars mea Deus in æternum.

CAPVT XVIII.

Ex qualibet re, quæ occurrit motus anagogicos elici posse. Scale à visibili creatura ad inuisibilem Creatorem.

Luc.
16. 8.

I. **O** Primè dictum est à Redemptore nostro filios huius seculi prudentiores esse filiis lucis in genere suo. Nam quis ex nobis, qui filiorum lucis nomine censetur, tantam adhibet industriam in spiritualibus bonis procurandis, quantam mundani homines in terreno lucro ex omni re solertissimè captando?

Languet nimirum spiritus, & vigent sensus: & quia cœlestia ab oculis corporalibus remota sunt, mentem humanam vix percellunt: atque ideò plerumque fit, vt in temporalibus lynces in æternis talpæ sinus. Ne igitur seculo addicti homines surgant contra nos in iudicium, quod viuaciores fuerint & diligentiores in perituris diuitiis, quam nos in veris & perpetuis congregandis; varias artes excogitare debemus opes quam plurimas spirituales accumulandi, in omni opere ac negotio lucrum spirituale sectando, & ad Deum aspirando, qui omnium actionum nostrarum finis est & principium. Id quæ ratione, fieri possit, non meis, sed Sanctorum Patrum verbis indicabo, quò maiorem huic doctrinæ conciliem auctoritatem.

2. Diuinus Ephræm hoc lucrum in oratione potissimum consistere docet & ait: [Bonum fuerit semper orare, & nunquam deficere, quemadmodum ait Dominus. Quare siue opereris, siue dormias, siue iter facias, siue comedas, siue bibas, siue

TOM.
I. hom.
mil. de
orando
Deum.

decumbas, caue orationem tuā inter-
miseris. Siue in Ecclesia fueris, siue
domi tuæ, siue in agro: & si oues
pascas, & si ædificia construas, & si
in symposio verferis, ab oratione ca-
ue desistas, & quodcumque po-
tueris, genua flecte; quando non po-
tueris, mente Deum inuoca. Quod
si orationem operi præmiseris, & sur-
gens è lecto primorum motuum tuo-
rum initia ab oratione duxeris, adi-
tus peccato in animam non patebit.]
Homil. Consonat Chrysostomus dicēs: [Ac-
24. in cedamus ad Deum, orantes omni
Matt. tempore, quia nunquam contingit
importunè accedere. Eum quippe,
qui cupit largiri semper opportunè
oramus. Sicut enim respirare im-
portunum omnino nunquam est; ita
etiam non quidem petere, sed non
petere potius importunum est. Si-
cut enim respiratione hac iugiter in-
digemus, ita etiam eo, quod à Deo
Orat. præstatur, auxilio.] Idem Chryso-
Kalen- stomus alibi explicans Apostoli sen-
dis ha- tentiam dicentis: Omnia in gloriam
bita. Dei facite, varios proponit modos
Deum glorificandi in omni actione

& omissione, scilicetque nobis de singulis creaturis faciendi, qua ad Deum ascendamus. De qua re cum prolixum habuerit sermonem, sic concludit: [Si voluerimus, per omnem vitam hanc spirituales mercaturas faciemus, & ex omni re lucrificabimus. Siue ergo precemur, siue ieiunemus, siue accusemus, siue condonemus, siue laudemus, siue vituperemus, siue ingrediamur, siue exeamus, siue vendamus, siue emamus, siue taceamus, siue dispuemus, siue aliud quid faciamus, omnia referamus ad Deum.] Hæc ille docens quomodo ex omni re motus anagogici elici possint, quibus ad Deum assurgamus. Similia tradit Magnus Basilius. [Accumbens mensæ, ora; esitans panem, largitori gratiam re- pendito; bibis vinum, memento eius qui illud tibi dedit ad lætitiā & infirmitatum solamen; tunicam indueris, gratias agito benigno datori; suspicis in cælum, & siderum pulchritudinem intueris, procide Deo, & cole eum, qui omnia hæc in sapientia creauit.] Omitto reliqua. Nam

Homil.
in S.
Iulit.
Mart.

Orat.

1.

vt alterius Basilij Seleuciæ Episcopi
verba vsurpem : [Cùm Deus res
creatas in morem scalæ adaptauerit,
per eas sui amantibus ascensum ad se
extruxit.]

In sti-
mulo
amoris
c. 10.

3. Quicquid igitur occurrit in crea-
turis ad laudem reducere oportet
Creatoris, vt piè admonet Seraphi-
cus Bonauentura : [Cum videris ali-
quos, inquit, in prælatione tempo-
rali, vel in dignitate constitutos, co-
gitabis hoc esse factum ad diuinam
magnificentiam ostendendam, & sic
in eis Dei potentiam collaudabis.
Cum autem videris alios scientiæ in-
sistentes, & non solum Creatoris, sed
etiam creaturarum occultissima in-
quirentes, & quemlibet versiculum
curiosius ordinantes, hoc esse factum
ad manifestandam diuinam sapien-
tiam non ignores, & sic in eis Dei sa-
pientiam commendabis. Cùm verò
videris alios temporalibus negotiis
insistentes, in eis diuinam laudabis
prouidentiam per tales quiescenti-
bus prouidentem. Si aliquos videris
cæteros judicantes, diuinum judi-
cium time : Si pœnas inferentes, di-

uinam iustitiam cogita: si rigidos, diuinæ iustitiæ expauesce rigorem: si reprehensores, & causarum discussores, futuri iudicii recordare. Si verò videris prælatos circa punitiōnem in aliorum remissos, in eis diuinam misericordiam commendabis. Si videris aliquos insistere operibus charitatis & pietatis, in ipsis laudabis diuinam bonitatem, & suam clementiam infinitam se breuiter ad omnia diffundentem. Si calorem habueris, recogita erga nos Dei Patris nimiam charitatem, qua suum filium voluit incarnari, & pro nobis omnibus crucifigi. Si frigus habueris, ab omni æstu miseriæ refrigerium anhelabis: & sic per singula discurrendo omnia potes & debes reducere in laudem & magnificentiā Creatoris.] Hoc sancti viri documento quasi acuto ferro medulla spiritus eruitur ex omnibus rebus, quæ sensibus percipiuntur. In promptu enim est juxta Apostolum, Omni videnti ratione, inuisibilia Dei per ea quæ facta sunt, intellecta conspicere. Quod si accesserit moralis intelligentia re-

R om.
I. 20.

rum omnium, quæ præ manibus versantur, iam ingens sylua vnicuique aperitur quamplurimos affectus erga Deum ex qualibet re eliciendi. Hanc autem intelligentiam curioso Lectori suppeditabunt ex antiquis Patribus Clemens Alexandrinus, Origenes, Gregorius Magnus, Rupertus Abbas, Bernardus, Eucherius, & alij: ex recentioribus Sanctes Pagninus in Isagoge ad mysticos scripturæ sensus, Ioannes à S. Geminiano in summa de exemplis & similitudinibus, Hieronymus Lauretus in Sylua Allegoriarum, Petrus Berchorius in Reductorio, & Repertorio morali, & omnes ferè Interpretes Sacræ Scripturæ.

Lib. de
præ-
muis.

4. Philo disertissimus Iudæorum scalas ad Deum esse creata omnia asseuerat. Via enim patet nobis, vt dixi, ab his quæ videmus & contrectamus, ad Opificem Deum, quem non videmus. Nemo est, si internas aures admouere voluerit, qui vocem naturæ non audiat ingenti clamore conditorem suum prædicantis: [Cælum, mare, terra, & omnia

quæ in eis sunt, ait S. Prosper, con-
sono speciei suæ, ordinationisque
concentu gloriam Dei protestantur,
& prædicatione perpetua majesta-
tem sui loquuntur auctoris.] Mag-
nus est liber creaturarum, in quo non
solum vir incomparabilis Antonius
Abbas, vt de eo Athanasius refert, sed
etiam mundi sapientes studuerunt.
Trismegistus dixit mundum esse li-
brum Diuinitatis, & speculum diui-
norum, in quo Deus seipsum clarè
expressit. Orpheus in hymnis mun-
dum esse ait musicam admirabilem,
quæ prædicat, & laudat Deum: quod
etiam noster hymnographus cecinit
dicens; [Cæli enarrant gloriam
Dei.] Sunt Creaturæ natus, qui-
bus Deus se nobis manifestat, ex sen-
tentia Augustini^a, & Gregorij Papæ:
^b Sunt venæ diuini susurrij, vt idem
Gregorius^c testatur. Sunt Choreæ,
quas mater natura Numini statuit,
vt canit Synesius.^d Sunt fontes diui-
ni amoris, vt docet Angelicus Do-
ctor^e. Nulli ergo dubium, quin fa-
cillimè possit, quicumque huic stu-
dio animum applicauerit, ex aspectu

Lib. 2.

de vo-

cat. Gē-

tium.

In vita

S. An-

tonij.

Psalm.

18. 1.

^a Lib.

2. de

lib. ar-

bit. c.

17.

^b Mo-

ral. lib.

26. c. 8.

^c Ibid.

lib. 5.

c. 20.

^d Hym-

no. 3.

^e Opus-

culo 61.

cujuslibet creaturæ in Deum assurgere, & piis affectibus ad Creatorem aspirare. Præxim huius exercitij mox tradam, si prius monuero fuisse quemdam virum sanctum, qui omnia quæcumque audiebat, & videbat, ad Christi passionem referebat. Si clamor occurreret, aut tumultus, vel ictus malleorum: Si scalas aspiceret, aut ligna, aut lanceas, aut clauos, aut aliud quidpiam, ex omnibus occasionem captabat Christi passionem grato animo recolendi. Poterit autem huiusmodi exercitatio ad totam Domini vitam extendi, adhibitis Aspirationibus, quæ superiori capite descriptæ sunt.

CAPVT XIX.

*Diarium, & Syluula Aspiratio-
num pro omni actione diei,
& pro qualibet occasione.*

EX vberima messe spicilegium
faciam, cuncta enim percurrere

ex quibus elici Aspirationes possunt,
 immensi voluminis foret; sed sicut
 scriptum est: [Da occasionem sa- Prou.
9.9.
 pienti, & addetur ei sapientia. Pri-
 mò autem præcipuas diei actiones,
 & exercitia proponam; tum plera-
 que alia, frequentius occurrere so-
 lent, vt in quolibet actu, & occa-
 sione piorum affectuum sylua sem-
 per in promptu habeatur.

Cum quis noctu expergiscitur.

1. **D**Eus propitius esto mihi pec-
 catori: educ me de tenebris
 & umbra mortis, & dic de tenebris
 lucem splendescere.

2. Voca me, Domine, in admira-
 bile lumen tuum; & illumina tene-
 bras meas, tu lux filiorum lucis, tu
 dies qui nescis occasum.

3. Tuere me, Domine, ne tene-
 bricosa peccati caligine inuoluar:
 eripe me ab omni inquinamento car-
 nis & spiritus.

4. Fiat mihi nox ista illuminatio
 mea in delitiis meis, quoniam me-
 mor fui nocte nominis tui Domine.

5. In lectulo meo quæsiui per noctem quem diligit anima mea. Docce me, Domine quærere te, & ostende te quærenti.

6. Anima mea desiderauit te in nocte, sed spiritu meo in præcordiis meis; de mane vigilabo ad te, splendor paternæ gloriæ.

7. Nox est, & alta rerum quies, ac profundum silentium. Amemus Deum nostrum, anima: nam amor secretum optat.

8. Ardeant tibi & luceant, Deus meus, sidera tua, & tot accende tædas amoris in corde meo, quot in cælo splendent stellæ.

9. O si animus ad amoris lucernam vigil hæreret, dum somnum corpus capit, itaut dicere possem cum sponsa, ego dormio, & cor meum vigilat! Da mihi, Domine, cum necessaria somni quiete perpetuam amoris vigilantiam.

10. Gratias ago tibi, Deus meus, quia dum nox in suo cursu medium iter haberet, omnipotens sermo tuus è regalibus sedibus venit, vt eos illuminaret, qui sedebant in tene-

bris, & vmbra mortis.

Mane cum surgis.

1. **B**enedicta sit Sancta Trinitas,
atque indiuisa Vnitas, Pater,
& Filius, & Spiritus Sanctus, confi-
tebimur ei, quia fecit nobiscum mi-
sericordiam suam.

2. In nomine Domini nostri Iesu
Christi crucifixi surgo; ipse, qui me
redemit, me custodiat, protegat, at-
que defendat ab omni malo hodie,
semper, & in hora mortis meae.

3. Credo tibi, Domine mi, in te
spero, ac toto corde te diligo: ex te
enim, & in te, ac pro te sunt omnia.
Deus meus, & omnia.

4. Deus, Deus meus, ad te de lu-
ce vigilo: Sitiuit in te anima mea,
quam multipliciter tibi caro mea.

5. Pater sancte, in vnione amoris
dilectissimi Filij tui commendo tibi
hodie spiritum meum.

6. Offero tibi cor meum, & oro
te, vt omnis cogitatio, locutio, &
operatio, ac voluntas mea secundum
beneplacitum tuum hodie dirigatur.

7. Laudo, glorifico, & saluto cor-
tuum, dulcissime Iesu Christe, gra-
tias agens pro fideli custodia, qua
me hac nocte protexisti: & quia lau-
des pro me, & gratiarum actiones,
atque omnia, quæ ego debeo Deo
Patri incessanter persoluis.

8. Commendo, Domine, diuinæ
sapientiæ tuæ visum meum interio-
rem, & exteriorem, vt lumen cogni-
tionis mihi largiaris, quo volunta-
tatem tuam agnoscere valeam, vi-
sumque cohibeam ab omni vano &
illicito objecto.

9. Commendo auditum meum mi-
sericordiæ tuæ, vt ab auditione ma-
la me protegas, & intellectum tri-
buas ad omnia, quæ hodie auditurus
sum.

10. Commendo benignitati tuæ os
meum & vocem, vt gustum diuini
spiritus infundas mihi, & ab omni
lapsu linguæ me custodias.

11. Commendo pietati tuæ manus
meas: vt opera mea tuis apponas
operibus, & in eis omnia mea san-
ctifices, & perficias, & ab omni pra-
uo opere me retrahas.

12. Commendo cor meum diuino amorituo, vt illud cordituo vnias, tuoque amore ita succendas, vt nunquam deinceps de re aliquaterrena delectetur.

Dum indueris.

1. **E**Xue me, Domine, veterem hominem cum actibus suis, & indue me nouum hominem, qui secundum Deum creatus est in iustitia, & sanctitate veritatis.

2. Indue, Domine, animam meam cyclade auro texta, vesteque nuptiali charitatis, quæ operiat multitudinem peccatorum meorum; & immensis monilibus virtutum exorna me.

3. Largire quæso animæ meæ vestes & ornamenta, quæ eam maxime deceant, ne deformitas mea appareat coram re, & Sanctis Angelis tuis.

4. Præcinge lumbos meos, purissime Iesu, cingulo castitatis & pudicitiae, vt viam mandatorum tuorum expedite currere possim.

5. Fac, pie Domine, mecum quod solent mundi proceres; vestes patientiæ & humilitatis, quæ tibi regnanti in gloria non sunt amplius necessaria largire mihi pauperculo seruo tuo, qui eis maximè indigeo.

6. Te sic præcipiente, Deus meus, corpus terrenum terrenis vestibus induo: non propter ornatum & superbiam; sed propter necessarium operimentum, & vt ex habitu status meus discernatur.

7. Dum ego corpori suas vestes tribuo, tu Deus indue animam veste innocentiae, vt habitus eius laudabilis appareat coram te.

Cum manus abluis.

DA virtutem, Domine, manibus meis ad abstergendam omnem maculam, vt sine pollutione mentis & corporis valeam tibi seruire.

2. Amplius laua me, Domine, ab iniquitate mea, & à peccato meo munda me.

3. Domine Iesu, qui lauisti nos &

peccatis nostris in sanguine tuo, la-
ua omnes animæ meæ sordes, & su-
per niuem dealbabor.

In ortu Solis.

1. **E**Xorere, exorere Sol justitiæ,
& illustra splendoribus tuis
animam meam.

2. Emitte lucem tuam, & verita-
tem tuam, ipsa me deduxerunt, &
adduxerunt in montem sanctum
tuum, & in tabernacula tua.

3. O lux, quæ illuminas omnia,
absorbe me in charitatis abyssum, vt
videam semper te in te, & me in te,
& cuncta sub te: nam sine te omnia
mihi sunt tenebræ, & nox obscu-
ra.

4. O sol animæ meæ, Deus meus,
quam amabilis est pulchritudo tua!
Amo te lumen æternum, & arden-
tius amare desidero.

Ante Diuinum Officium.

1. **V**Ocabis me, Domine, &
ego respondebo tibi, ope-

ri manuum tuarum porrige dexteram.

2. Domine in vnione illius intentionis, qua ipse in terris laudes Deo Patri persoluiſti, hoc tibi officium persoluere intendo.

3. Benedic anima mea Domino, & omnia quæ intra me sunt nomini sancto eius.

4. Ergone ranuncula vilis de cœno iniquitatum egressa coram Domino maiestatis perſtrepere audebo? Et quis sum ego puluis & cinis, vt loquar ad Dominum meum?

5. Introibo in domum tuam, adorabo ad templum sanctum tuum, & confitebor nomini tuo. In conspectu Angelorum psallam tibi.

6. Confiteantur tibi, Domine, omnia opera tua, & Sancti tui benedicant tibi. Psallire Domino Sancti eius, & confitemini memoriæ sanctitatis eius.

7. Summè desidero laudare te, Domine Deus meus, & sic honorem afferre tibi, quoniam tu dixisti, Sacrificium laudis honorificabit me.

8. Accipe laudationem meam, Do-

mine, vitulos labiorum meorum, & quia vir pollutus labiis ego sum, sanctifica me, & mitte Angelum tuum, qui calculo ignito emundet os meum, & faciat me dignum laudibus tuis.

9. Illumina intellectum meum, Domine, vt corde percipiam quod ore pronuncio: transforma in te sensus & cogitationes meas, vt nihil præter te cogitem: affectus purifica, & voluntatem inflamma, vt te solum amem, & desiderem.

10. Te laudare volo bone Iesu; tu supple pro me, quicquid minus est in me.

Post Officium.

1. **G**Ratias tibi ago, Domine Deus, quod meas indignas orationes audire dignatus sis, & de manu mea laudum tuarum sacrificium suscipere.

2. Vnde mihi hoc, vt inuenirem gratiam ante oculos tuos, Domine mi, qui consolatus es me, & fiduciam præbuiſti orandi te?

3. Dimitte, Domine, secundum

magnitudinē misericordiæ tuę quicquid in tuo seruitio scienter, vel ignoranter peccaui; & admitti jubeas ante conspectum majestatis tuę deprecationem serui tui.

4. Recordare fragilitatis meę, & ignoscens distractionibus meis miserere mei Deus, & omnium, pro quibus oravi.

5. Suscipe, benignissime Iesu, obsequium seruitutis meę in pijssimum cor tuum, & illud tuis, atque Sanctorum precibus adjungens purifica, supple, perfice, & offer Deo Patri ad tuam, & Sanctorum gloriam, ad meam, & omnium salutem.

Ante Missam, vel Communionem.

1. **D**omine Iesu, in memoriam tuę passionis & mortis offero tibi huius Missę, & omnium Missarum, quę in toto mundo celebrantur, hostiam immaculatam sacrosancti corporis, & sanguinis tui.

2. Suscipe me, Domine, cum oblatione huius hostię immaculatę in laudem,

laudem, gloriam, & beneplacitum
tuum in vnione illius oblationis, qua
temetipsum in ara crucis obtulisti.

3. Memoriam fecisti mirabilium
tuorum, dulcissime Deus animæ
meæ, & in escam vnâ omnes amo-
ris vires contraxisti. Utinam hic ci-
bus me tranformet in te, & lapideum
pectus meum igne tui amoris accen-
dat, & disrumpat.

4. Veni, Domine, & noli tarda-
re; reple bonis tuis esurientem ani-
mam meam, & calice suauitatis tuæ
inebria sitientem.

5. Melior est panis tuus, quàm om-
nes delitiæ mundi, quas idè respuo
& abominor: & calix tuus inebrians
quàm præclarus est!

6. Panis dulcissime sana palatum
cordis mei, vt sentiam suauitatem
amoris tui. Sana me ab omni lan-
guore, vt nullam præter te amem
pulchritudinem.

7. Ignis qui semper lucet, amor
qui semper ardet, illumina & accen-
de me, vt citra condemnationem
assistam metuendo altari tuo.

8. Ne proijcias me à facie tua cum

diuinissimis donis tuis venientem ad te: neque me aduerferis propter nimiam indignitatem meam.

9. Quemadmodum desiderat ceruus ad fontes aquarum, ita desiderat anima mea ad te Domine Iesu, Saluator meus.

10. Manna suauissimum, omnem habens saporis suauitatem pro cuiusque desiderio, recrea hodie, ac suauiter affice aridum palatum animæ meæ.

11. Veni, obsecro, æterna sapientia, tam potenter hodie in animam meam, vt cunctos profliges hostes meos, cuncta vitia consumas, cuncta peccata remittas.

12. Ignem venisti mittere in terra, benignissime Iesu, accende illum in me, & euentila gratiâ tuâ, vt semper crescat.

Ad eleuationem Hostiæ & Calicis.

1. **P**rorector noster aspice Deus, & respice in faciem Christi tui.

2. Amore, & adoro toto corde & affectu. Lata me in tuo sanguine, &

da mihi pati pro amore tuo.

3. Tu Rex gloriæ Christe: tu Pater sempiternus es Filius.

4. Amantissime Iesu, per effusionem sanguinis tui fac ut mundo mortuus tibi soli uiuam, à me ipso penitus deficiens.

Post Missam, vel Communionem.

1. **G**ratias ago tibi, Domine Iesu, quia me vilissimum peccatorem admittere dignatus es ad uiuificum tuæ mensæ conuiuium. Ignosce uilitati meæ, & fac me hominem secundum cor tuum.

2. Saucia, Domine, cor meum vulneribus tuis, mentem meam inebria sanguine tuo, ut quocumque me uertam semper te videam crucifixum, & quicquid aspexero tuo sanguine tinctum appareat mihi.

3. Sanctifica, Domine, animam meam, & benedictionem tuam in ea relinque. Ingredere cubiculum cordis mei, & illud posside in sempiternum.

4. Respice in me, Pater æternæ,
M ij

quia Unigenitus filius tuus intra viscera mea clamat ad te.

5. Penetret amor tuus, clementissime Iesu, intima mea, & omnem alium amorem expellat.

6. Transforma me totum in te, ut omnis substantia mea pereat in te, nec me ampliùs inueniam nisi in te.

7. Recedo modicum à te, sed non sine te, Domine mi, consolatio mea, & omne bonum meum. Da mihi viuere semper in te, & tibi iugiter adherere.

Ante mensam, & dum reficeris.

1. **D**A mihi, Domine, operari non cibum qui perit, sed qui permanet in vitam æternam.

2. Ecce, Domine, ad mensam accedo, da mihi congruam seruare moderationem, ne ex indiscreta parsimonia deficiat corpus; aut ex nimietate grauetur & insolescat.

3. O quanti pauperes fame pereunt! mihi autem nihil deest. Grattias ago tibi Deus, qui pascis me à iuuentute mea, & vsque nunc.

4. Quàm suavis es, Domine, animæ quærenti te! Vtinam nihil sapiat, nihil dulcescat mihi, nisi tu. Tu cibus meus, tu potus suauissimus, tu omnis delectatio mea.

5. O si deterior ferculorum pars mihi semper contingeret, sicut decet me? Indignus enim sum rationalis creaturæ cibus, & pane filiorum, quia jumentis insipientibus similis factus sum propter innumerabilia & execranda peccata mea.

6. Fac me semper, Domine, esurire & sitire justitiam. Sitiuit anima mea ad Deum fontem viuum, quoniam apud te est fons vitæ.

7. Quàm dulcia faucibus meis eloquia tua! super melori meo.

8. Dederunt in escam meam fel, & in siti mea potauerunt me aceto.

9. Præsta mihi, Domine, vt sicut corpus terreno cibo, ita cœlesti alimonia mentem reficiam.

Post mensam.

1. **G**Loria tibi Domine, qui me cibo ac potu necessario refeci.

sti: fac me semper abundare in omni opere bono.

2. Singulas buccellas, & guttas quas sumpsi offero tibi in laudem æternam; in vnione illius amoris, quo tu Deus meus pro me factus homo cibum & potum sumpfisti in terris ad honorem Patris tui.

3. Parce mihi, Domine, quia temperantiæ limites transgressus sum: da vt deinceps omnem concupiscentiam superem, & omnia gulæ irramenta.

Ante quodlibet opus.

1. **D**omine Iesu, da vt peragam opus istud ad gloriam tuam, & salutem meam, sicut tibi placitum est.

2. Da mihi sedium tuarum assistentiam sapientiam, vt mecum sit, mecum laboret, vt sciam quid acceptum sit coram te omni tempore.

3. Da mihi, Domine, spiritum discretionis, vt vera à falsis discernere queam; vt sciam eligere bonum, & reprobare malum.

4. Fac vt optimum finem semper intendam, & omnia prauideam quæ accidere mihi possunt.

5. Adiuua, dirige, & conforta me, vt secundum te, tecum, & propter te hoc opus perficiam, quia sine te nihil sum, nihil possum.

Opere peracto.

1. **D**omine Iesu hoc opus, quod peregi commendo mellifluc cordi tuo emendandum ac perficiendum: tibi que illud offero in vnione operum tuorum.

2. Domine, si quid vnquam tibi gratum feci ex gratia tua, id omne approbo & ratifico, id renouo & confirmo.

3. Quicquid neglexi offerre tibi ex actionibus meis, id hoc momento quantum possum compenso, & tibi omnia propter te offero omnium Angelorum, & Sanctorum affectu.



Cum è domo, vel cella egrederis.

1. **V**ias tuas, Domine, demonstra mihi, & semitas tuas edoce me. Perfice gressus meos in semitis tuis, vt non moueantur vestigia mea.

2. O quanti sunt infirmi & claudi, quibus ambulare concessum non est! Grantias tibi ago, Domine, quia corpus integrum dedisti mihi, & me hactenus incolumem conseruasti.

3. Sequar te, Domine, quocumque ieris, quia verba vitæ æternæ tu habes.

Cum regrederis.

1. **A**perite mihi portas iustitiæ, & ingressus in eas confitebor Domino. Hæc porta Domini, iusti intrabunt in eam.

2. Hæc requies mea in seculum seculi, hîc habitabo, quoniam elegi eam.

3. Elegi abjectus esse in domo Dei mei, magis quam habitare in taber-

Ad sonitum Horologij.

1. **B**enedicta sit illa hora, qua
Dominus noster Iesus Chri-
stus incarnari voluit & pati pro no-
bis.

2. Respice in me, Domine, & mise-
rere mei præsertim in hora mortis
meæ: & fac me talem in hac hora,
qualem me desideras in æternita-
te.

3. O Deus infinitè amabilis, quam
parum hactenus dilexi te! Dixi, nunc
cœpi. Da quod jubes, & jube quod
vis.

4. Quàm pœnitet me temporis, cu-
jus inutiliter iacturam feci! Vtinam
illud possem reuocare, vt in rebus ti-
bi placitis totum insumerem.

5. Ecce lapsa est hora, Deus meus,
& nullum in me sentio amoris incre-
mentum. Vtinam geminatis ignibus
hanc iacturam resarciam.

6. Quanta est misericordia tua,
Domine, quia me vsque ad hanc ho-
ram tolerasti? Gratias ago, & doleo,

quod tam ingratus fuerim.

7. Offero tibi, æterne Pater, quicquid dixero, fecero, cogitauero hac hora. Vtinam eam vtiliter transigam ad maiorem tui gloriam.

In dolore & quacumque tribulatione.

1. **F**asciculus myrrhæ dilectus meus mihi, inter vbera mea commorabitur. Auge, Domine, dolores, auge afflictiones; sed auge etiam patientiam. Hic vre, hic seca, vt in æternum parcas.

2. Recordare, Domine, fragilitatis meæ, & dic Angelo percutienti, cesset iam manus tua. Verumtamen non mea, sed tua voluntas fiat.

3. Tu es refugium meum, Iesu crucifixe, in tribulatione, quæ circumdedit me: exultatio mea, erue me à circumdantibus me.

4. Si vis, Domine, omnia mala pœnæ libenter patiar pro te, sine vlla consolatione. Omnia volo, nihil volo.

5. Bonum mihi, Domine, quia

humiliaſti me. Propter te ſuſtinui opprobrium, operuit confuſio faciem meam.

6. Gratiſ agō tibi Deus, quia voluntas tua in me adimpletur, qua voluiſti ab æterno, vt hæc mihi euenirent. Offero ea tibi ad gloriam tuam, in vnione paſſionis Chriſti.

7. Tuus ſum ego, Domine, tu ſciſ quid mihi expediat. Offero me tibi in omne beneplacitum tuum.

8. Gratiſ tibi agō, quia nos etiam inuitos rectè ſingis, & per externum hominem internum purgas.

9. O Amor, ea intentione, qua pœnam iſtam de corde Dei mihi attuliſti, tibi committo; vt eam in ſumma gratitudine ibidem reconfignes.

10. Tibi, Domine, hæc omnia patior. Sit nomen tuum benedictum in ſecula, qui voluiſti hanc tribulationem venire ſuper me. Sicut placuit tibi, ita factum eſt.

In proſpero ſucceſſu.

Non nobis, Domine, non nobis; ſed nomini tuo da glo-

riam. Fallax est honor mundi, fallaces huius vitæ consolationes: Satiabor cum apparuerit gloria tua.

2. Valdè quidem me consolatur res ista, Domine Iesu; eam tamen nolo, nisi à te, in te, & propter te, paratus ea carere, quoties voveris.

3. Nolo, Domine, hîc consolari & felix esse; sed afflige me in præfenti, vt misericordiam in fine consequi valeam.

4. Benedictus es, Domine, qui adiuvisti me, & consolatus es me; cum mihi minimo, & infelici nulla debeatur consolatio, nulla prosperitas.

5. Refulge cordi meo, veritas summa, vt mihi ipsi vilescam, ac omni humana consolatione me indignum existinem.

In omni tentatione.

I. **S**aluator mundi salua nos, qui per crucem & sanguinem tuum redemisti nos, auxiliare nobis, te deprecamur Deus noster.

AD DEVM, CAP. XIX. 277

2. Confige timore tuo carnes meas,
à iudiciis enim tuis timui.

3. Tu Domine, qui ad exercitium
facis, vt sentiam, adiuua me, ne con-
sentiam.

4. Excita Domine potentiam tuā
& veni, & exurge in adiutorium
mihi.

5. Da mihi, Domine, patientiam
& pacem, ne perdam coronam in
cælo. Tu enim dixisti: In patientia
vestra possidebitis animas vestras.

6. Inclina cor meum in testimonia
tua, & esto mihi turris fortitudinis à
facie inimici.

7. Tu scis, Domine, quā liben-
ter puram animam tibi exhiberem:
sed quia immundum vas habeo, ple-
num temptationibus; ipsum tibi offe-
ro quale est. Munda illud sanctissi-
mo sanguine tuo, vt diuini influxus
capax efficiatur, tibi, quæ in gratia
acceptum fiat.



Cum te allici sentis ad complacentiam ex pulchritudine, vel alia perfectione creaturarum.

1. **E**Cce isti sunt riuuli, Domine Deus meus, qui ex te vero & increato fonte omnium bonorum dimanant: hæ sunt guttæ inexhausti maris tuæ ineffabilis bonitatis.

2. Auerte oculos meos, ne videant vanitatem, ne per fenestras oculorum intret mors in animam meam.

3. Resisto, Domine, seductionibus oculorum, ne implicentur pedes mei, quibus ingredior viam tuam: & erigo ad te inuisibiles oculos, vt euellas de laqueo pedes meos.

4. Multa fecisti tu Domine Deus meus mirabilia tua, sed tu omnium pulcherrimus & perfectissimus es. Quando veniet dies, vt in te solo delecter.

5. Quàm callidè hic lates absconditus maledictæ serpens, vt me ruo veneno inficias! Benedicta sit bonitas Dei in æternum, qui mihi hostem hic latentem, & animæ meæ

AD DEVM, CAP. XIX. 279
dolosè insidiantem tam benignè de-
texit.

*In transitu ante Ecclesiam, & in
eius ingressu.*

1. **E**Rgòne putandum est, quòd
verè Deus habitet super ter-
ram? Si cælum, & cæli cælorum te-
capere non possunt, quantò minus
hæc domus?

2. Tu Domine, qui pollicitus es,
ecce ego vobiscum sum omnibus
diebus vsque ad consummationem
seculi, exaudi orationem seruorum
tuorum orantium in templo isto.

3. Domine in multitudine miseri-
cordiæ tuæ introibo in domum tuā,
adorabo ad templum sanctum tuum,
& confitebor nomini tuo.

4. Omnes Sancti & Sanctæ Dei,
quorum Reliquiæ, & imagines hîc
sunt, saluto & veneror vos, interce-
dite pro me.

5. Saluete Christi fideles animæ,
quæ hîc & vbique requiescitis; re-
quiem æternam vobis donet, qui
pro vobis passus est.

Ante Crucifixum.

1. **D**omine Iesu Christe per illam amaritudinem, quam sustinisti propter me in cruce, maxime in illa hora, quando anima tua egressa est de corpore suo, miserere animæ meæ in egressu suo.

2. Suscipe me, Domine, in vlnas tuas, quas in cruce expandisti, protege me ab hoste maligno, & fac me participem crucis tuæ.

3. Adoramus te Christe, & benedicimus tibi, quia per crucem tuam redemisti mundum.

Cum aridus es.

Pater cœlestis pro frigida & misera cordis mei ariditate offero tibi feruida desideria, & ardentissimum amorem dilectissimi filij tui, Beatæ Virginis, & omnium electorum tuorum.



Cum loquendum est.

Iesu fili Dei, qui coram Iudice tacuisti, tene linguam meam, donec cogitem qualiter & quid loquar. Pone, Domine custodiam ori meo, & ostium circumstantiæ labiis meis.

Ante studium.

Domine Iesu, æterna sapientiâ, purga animam meam igne amoris tui, illumina intellectum, memoriam confirma, vt bonas literas discam, quibus te vnum sapiam, & diligam; quia extra te quisquis sapit, desipit.

Cum audis Confessiones.

Ad singulos pœnitentes hac orationiuncula vti poteris. Sana, Domine, per me hanc animam in omne peccatum lapsuram sine te. En pretium sanguinis tui, sponsa tua ab hoste vulnerata. Doce me, vt prudenter cœcam, & ægram ad te ad-

ducam, pro tua vnus gloria. Angele sancte, adiuua me.

In aspectu horti amœni.

EXorna, dilecte mi, virtutum floribus animam meam. Vtinam in me floreat lilium castitatis, humilitatis viola, rosa charitatis.

In aspectu pulchræ domus.

QVàm dilecta tabernacula tua Domine virtutum, concupiscit, & deficit anima mea in atria Domini! Melior est dies vna in atriiis tuis super millia. Beati qui habitant in domo tua, Domine, in secula seculorum laudabunt te.

Dum grata qualibet, & pulchra vides.

ECce tu pulcher es, dilecte mi, ecce tu pulcher es fons pulchritudinis: exorna splendore gratiæ animam meam, quoniam denigrata est super carbones facies mea, prop-

ter multitudinem iniquitatum mearum. Ne finas me donis tuis abuti contrate.

In aspectu rei deformis.

FActi sunt abominabiles, sicut ea quæ dilexerunt: tolle à me Domine peccati deformitatem.

Cum pluit.

IRriga, Domine, arentem animam meam, vt fructum boni operis reddat temporibus suis.

Cum sudum est.

Diffipa, Domine, à corde meo nubesculas terrenorum affectuum, & lucis tuæ radiis illustra animam meam. Refulge super me sol iustitiæ, & splendoribus Sanctorum illumina cor meum.



Cum oculis occurrunt vana.

Quid mihi est in cœlo, & à te quid volui super terram? Auerte oculos meos, ne videant vanitatem in via tua tua viuifica me.

Cum vaniloquia auribus insonant.

Narrauerunt mihi iniqui fabulationes, sed non vt lex tua.

Cum occurrit peccandi occasio.

Qui elongant se à te, Domine, peribunt: perdidisti omnes, qui fornicantur abs te. Mihi autem adhærere Deo bonum est, ponere in Domino Deo spem meam.

Ad nomen Iesus.

Vtinam potestatem haberem cœlum, & terram, & infernum cum omni creatura tibi dulcissimo,

AD DEVM, CAP. XIX. 285
& fidelissimo amatori inclinandi, ac
subijciendi.

In aspectu arborum.

LAudate Dominum ligna fructi-
fera, & omnes cedri. Ah bone
Iesu, quàm adhuc imperfectè tibi
feruio, & tamen plantatus sum secus
decursus aquarum gratiæ tuæ! Ad-
iuua me, vt fructum afferam in pa-
tientia.

In aspectu volucrum.

Benedicite omnes volucres cœli
Domino. Quis dabit mihi pen-
nas sicut columbæ, & volabo, & re-
quiescam? Eleua me, Domine, à
terra, vt alis amoris ad te volem.

In aspectu Bestiarum.

Bestix & vniuersa pecora lauda-
te nomen Domini. Da mihi,
Domine, cognoscere dignitatem
meam, ne fiam sicut equus & mulus,
quibus non est intellectus.

In aspectu ignis.

Ignem venisti mittere in terram,
Deus meus, & suades mihi, vt
eam à te aurum ignitum: accende
tu illum in me, vt liquefcam amore
tuo.

In aspectu aquæ.

Anima mea sicut terra sine aqua
tibi, sitit ad te fontem viuum.
Irriga me, & potum da mihi in la-
crimis in mensura.

In aspectu Cæli.

OMagna domus Dei, quam vilis
mihi fuisti? Pœnitet me Domi-
ne, da mihi constanriam in seruitio
ruo. Cæli Cælorum laudate Deum.
Quando aperiemini mihi, vt inue-
niam eum, quem diligit anima mea?

In alia quacumque occasione.

Nihil prorsus homini occurit, ex
quo non possit varias ad Deum

aspirandi occasiones elicere, quicumque studet Christianæ perfectioni. Nam vt superscriptis oratiunculis, & exercitiis alia quædam in exemplum adijciam; si tibi occurrat aliquis infidelis, orabis pro illo, & actum fidei elicies. Si cæcus, claudus, vel aliqua ægritudine affectus; eorum misereberis, & Deo gratias ages, qui membra integra tibi, corpusque validum dedit. Transiens Xenodochia, ora Dominum, vt det omnibus patientiam, & consolationem. Cùm legis, audis, aut vides aliquid ad laudem Dei pertinens; gaude multò magis, quàm si laudes tuas audires. Cùm videris aliquem peccantem, vel blasphemantem audieris, statim in spiritu contristare, & Deum pro illo precare. Si angit te desiderium placendi hominibus, cogita quod qui hominibus placent Christi serui non sunt; & opta Deo soli placere. Cùm recordaris alicujus peccati, elice actum contritionis. Si musicam, & concentum audis, ora cum Cæcilia vt fiat cor tuum immaculatum, Deoque psalle in cithara

cordis, & ad gaudia Angelorum suspira. Si mundi pompam vides, & hominum superbiam, eam detestare, & dic: Vanitas vanitatum, & omnia vanitas. Ex aspectu Iudicum, Principum, & Prælatorum, timorem cōcipe diuinæ justitiæ, & ora pro illis, actumque elice obedientiæ. In introitu alicujus oppidi vel ciuitatis, Angelos & Sanctos tutelares, quorumque imagines & reliquię ibi sunt, venerare, & ora pro habitantibus. Ad imaginem quoque Angelorum & Sanctorum actum dulciæ exerce, & opem eorum efflagita. Cū se offert imago Euangelistarum, vel Doctorum scribentiū, ora & dic: [Scribite me Sancti Dei in libro afflictorum, quia affligi semper desiro propter Deum: Scribite me cum Sanctis Martyribus: Scribite me in corde Iesu, & in corde Mariæ, vt nunquam obliuiscantur animæ meæ.] Si appareret arcus cęlestis benedic eum qui fecit illum, & ora pro pace. Si terram excoli cernis, considera qua diligentia agrum animæ tuæ colere debes, & roga pro fructibus terræ. Si bene operantes

operantes conspicias, congaude, & opta fieri eorum particeps, & ora pro tua & ipsorum perseverantia. Plura suggerent usus, & vnctio.

*Cum vespere accenduntur
lucernæ.*

1. **T**ua nos, Domine, veritas semper illuminet, & ab omni prauitate defendat.

2. Domine, apud quem nihil est obscurum, nihil tenebrosum, emitte lucem tuam cordibus nostris, vt in via tua ambulantes nihil patiamur erroris.

3. Te lucem veram, & lucis auctorem deprecor, vt digneris à me tenebras depellere vitiorum, & clarificare me luce virtutum.

4. Veni celestis amor, & fulgidissima face tua discute noctem ignorantie mee.

5. O amor decus, & lux virtutum omnium explica pompam radiorum tuorum in domo cordis mei, vt in lumine tuo te videam lumen æternum.

Ante somnum.

1. **F**Ac me, Iesu dulcissime, super pectus tuum requiescere: da mihi trahere anhelitum de mellifluo corde tuo: influat spiritus tuus suavissimus in animam meam, quicquid absorbeat, & inseparabiliter sibi uniat.

2. Tu, quæso, mecum maneat, mecumque dormias hac nocte, ut dormiente corpore mens semper ad te vigilet, & te præsentem videat.

3. Deus creator corporis mei & animæ, respice me misericordia tua, ne tenebrosa peccati caligine involuar.

4. Modera somnum meum, Deus meus, quem sumi præcepisti ad corporis alleviationem; peruigiles concede cogitationes, & mentem sobriam, ne me grauis opprimat sompor.

5. Peto, Domine, & desidero, ut singulæ respirationes meæ hac nocte laudem & honorem tibi exhibeant.

6. In manustuas commendo spiritum meum, redemisti me Domine Deus veritatis.

7. Veni, Diuine Amor, & tu mihi somnia dispone, vt in tuum amorem tanquam in somnum suum incumbat cor meum, & in te solo requiescam nunc, & aeternum. Amen.

CAPVT XX.

De Amore Dei. Quid sit Amor. Eius origo, prerogatiua, & proprietates. Amoris Philosophia à quibus discenda. Possesse Deum facilius amari, quàm cognosci.

1. **I**Am quod initio pollicitus fueram pro virium tenuitate, & ingenij captu executus sum: nunc consentaneum arbitror nonnulla de diuino amore veluti corollarium appingere huic libello; via enim mystica, cujus semitæ, sicut hætenus docui, breui compendio perducunt ad

Deum, ab amore principium sumit,
 & finem habet in amore. Est autem
 Amor complacentia boni, siue pro-
 pensio appetitus in bonum. Est pri-
 mus motus voluntatis omnium reli-
 quorum affectuum principium &
 radix, omnibus ad omnia ingenitus,
 vt Platonius Phædrus ait. Est ve-
 hemens, & bene ordinata voluntas,
 vt docet Guillelmus Abbas^f. Est vis
 animæ naturali quodam pondere fe-
 rens eam in finem suum; juxta illud:
 [Amor meus, pondus meum, illo fe-
 ror quocumque feror.] Est conne-
 xio & vinculum, quo rerum vniuer-
 sitas ineffabili amicitia, & insolubili
 vnione copulatur, vt ex hymnis Hie-
 rothei Magnus Dionysius Areopagi-
 ta^c commemorat. Est circulus sem-
 piternus sine & principio carens,
 propter bonum, ex bono, in bonum,
 & ad bonum indeclinabili conuer-
 sione circumiens, in eodem, & se-
 cundum idem & procedens semper,
 & manens & remeans. Quicquid in
 sacris literis, quicquid in libris San-
 ctorum continetur aut amor est, aut
 pertinet ad amorem.

Plato
 in Phæ-
 dro.
 f Ab.S.
 Theo-
 doric
 l. de
 amore
 c. 7.
 § Au-
 gust.
 lib. 13.
 Con-
 fess.
 c. 9.
 c Dedi-
 uin.
 nomi-
 nib.
 c. 4.

2. Si eius originem quæris, non te ad symposium Platonis, non ad doctas Poëtarum fabulas mittam: firmiorem enim doctrinam ab eo habemus, qui dixit: [Deus charitas est, & qui manet in charitate in Deo manet, & Deus in eo.] In ipso puro & summo bono ab æterno Amor fuit quasi ignis semper ardens, omnia accendens, & in se transmutans. Ex eo enim quod Deus suam infinitam pulchritudinem, & excellentiam intueretur, oritur in ipso infinitum amoris incendium, quo Pater seipsum & Filium à se genitum diligit: rursusque Filius eandem in Patrem reciprocatur dilectionem, qua tantum illum amat, quantum amari dignus est, hoc est infinites infinitè. Hic autem mutus amor Spiritus Sanctus est, æternus, imensus, Patri & Filio coequalis, à Deo procedens, in Deo manens: à quo, sicut radius à Sole, omnis amor dimanat, propter bonitatem suam infinitam extendens se, & descendens ad creaturas pro cuiusque captu & meritis; & omnia denuò ad se reducens: quia

1. Io-
han.
4. 16.

vt à Deo exiuius omnes, & venimus in mundum, ita mundum iterum relinquere debemus, & ad Deum redire. Nulla vox est, quæ Amoris dignitatem non dicam explicare, sed nec leuiter adumbrare valeat. Nam Amor increatus ipse Deus est, ineffabilis, incomprehensibilis, cuius magnitudinis non est finis. Amor autem creatus donum Dei est altissimum, nobilissimum, inenarrabile, termino carens, ac modo, quia, vt ait mellifluus Bernardus, [Modus diligendi Deum est diligere sine modo.]

Init.
lib. de
dili-
gendo
Deum.

Iohan.
Gerf.
sup.
Cantic.

3. Quòd si libeat eius effectus intueri, vt saltem ex illis quanta sit eius vis & potentia dignoscamus, iam Propheticum torrètem ingredimur, qui pertransiri non potest. Cancellarius Parisiensis ex cantico amoris quinquaginta eius descripsit proprietates eroticè, & diuinè; sed hanc lucubrationem amoris sagitta vulneratus corporali morte conclusit, vt in patria amantium disceret, quàm imperfectè in via de Amore scripsisset. Et quomodò ausim ego in amo-

rerudis & inexpertus eius pręrogatiuas enarrare? [Quomodo, inquit Richardus, de amore loquetur homo, qui non amat, qui vim non sentit amoris? De aliis nempe copiosa in libris occurrit materia, huius verò aut tota intus est, aut nusquam est.] Dicam tamen balbutiendo nonnulla, quę in eximiis amatoribus ipse amor operatur. Amor participatio Dei est, in ipsius pulchritudine & bonitate tanquam in sua causa conquiescens, Deum mouet, vt descendat ad creaturas, quia summè sui diffusius est: tum vicissim creaturas fursum trahit ad pulchrum & bonum. Simplex est, & multiplex; æqualis, & inæqualis: actus enim Dei simplicissimus est, quamuis ad infinita se extendat. Amantes Deo assimilant, ipsique jungit inseparabiliter, & admirabili quadam Apotheosi diuinę naturę consortes efficit; quia sibi similes semper querit, aut efficit, & qui amat manet in Deo, & Deus in eo. Terrenum & falsum amorem dixit Plato, esse animi ardorem in proprio corpore mortui, in

De
grad.
charit.
c. 1.

De di-
uin.
nomi.

Plutar-
ch. in
Opus-
culis.

alieno viuentis: quem effectum ope-
rari in anima diuinum amorem testa-
tur Dionysius dicens; Amantes sui
juris non esse, quia Amor ecstasim
facit. Ad ipsum omnia præcepta,
omnes leges, omnia consilia redu-
cuntur: neque musicam solum do-
cet, vt quidam asserit, sed omnium
artium, omnium scientiarum, om-
nium virtutum actor, magister, prin-
cipium, & finis est. Vrit, & refri-
gerat; exaltat, & humiliat; vulne-
rat, & sanat; occidit, & viuificat.
Leges præscribit amantibus ipse legis
expers: modum rebus statuit modi
nescius; finis est omnium fine ca-
rens: omnia rapit neminem spolians:
omnibus dominatur cunctis subje-
ctus: semper quiescit nunquam orio-
sus. Non deficit in aduersis, quia
non vincitur: injurias non rependit,
quia non sentit: morte non terretur,
quia fortior illa est. Nullam querit
sui causam, non fructum, non mer-
cedem, seipso contentus. Amat qui
verè amat, quia amat: amat vt amet,
& ad suum recurrens principium
semper ex eo sumit, vnde iugiter

amet. Virtutes omnes nihil aliud
esse, quàm ordinem amoris asseruit
Augustinus: nam si amor desit, quid
est spes, quid fides, quid religio,
quid fortitudo? Tabescunt omnia
instar cadaueris, quæ hoc igne non
animantur. Si habuero prophetiam,
& omnem fidem, & tradidero cor-
pus meum ita vt ardeam, charitatem
autem non habuero, nihil mihi pro-
dest.

4. Quid ergo amore iucundius,
quid securius, quid nobilius? Quan-
ta eius dignitas, & sublimitas; quot
tituli, & excellentiæ? Dicant qui
experti sunt quid sit amorem incom-
parabilem esse, insuperabilem, su-
perferuidum, semper mobilem; in-
cessabilem, actiuum, zelotem, offi-
ciosum, omnipotentem. Dicant
quæ sint eius causæ, quæ natura, quis
ordo, qui effectus, quæ exercitia,
qui gradus, quæ leges, quod initium,
qui progressus, quis finis, quæ per-
fectio. Ego enim conscius infirmita-
tis meæ & imperitiæ, tantæ rei maje-
statem & violare timeo, & assequi
despondeo. Legendi sunt eximij vi-

ri Bernardus, & Richardus, ille in tractatu de diligendo Deo, hic de gradibus charitatis. Legendus Harpius in fine suæ mysticæ Theologiæ. Addo recentiores Didacum Stellam, Iacobum Salianum, Antonium Gaudier, Laurentium Parisiensem Capuecinum, Ludouicum Granatensem, Christophorū Fonsecam, Ioannem Calaguritanum Carmelitanum, & alios, qui de arte amandi Deum, & de amore Dei doctissima nobis scripta reliquerunt. Addo singulariter nominandum Franciscum Salesium Episcopum Geneuensem omni encomio superiorē, cuius libri duodecim de hac re omne ferunt punctum miscentes vtile dulci. Nec desunt ex sequiori sexu in amoris philosophia supra communem captum excellentissima Geltrudis, Theresia, Magdalena de Pæctiis, tres Catharina Senensis, Genuensis, & Bononiensis, & aliæ; ex quibus plenior de Amore cognitio petenda est.

5. Discet autem amare Deum, qui frequenter ad eum aspirauerit. His enim piis affectibus ignis amoris ac-

ascenditur, nutritur, & in magnum
 crescit incendium. Dictum est supra
 viam scholasticam longam & diffi-
 lem esse, mysticam verò breuem &
 facilem: quia nimirum multò facilius
 est Deum amare, quàm cognoscere.
 [Facilius, ait Richardus, ad Deum
 patet ingressus piè pulsantibus, quam
 subtiliter perscrutantibus. Pulsat au-
 tem qui amat, qui orat, & pulsan-
 ti aperitur.] Cui consonans Ange-
 licus Doctor apertè fatetur Deum in
 hac vita plus amari, quàm cognosci:
 quia plus requiritur ad perfectionem
 cognitionis, quàm ad perfectionem
 amoris. Ad hanc enim sufficit, quòd
 res ametur, prout in se apprehendi-
 tur: ad illam verò necesse est sigilla-
 tim cognoscere quicquid est in re,
 partes nimirum, virtutes, & pro-
 prietates. Probatur hoc exemplo
 scientiarum, quas aliqui amant ob
 confusam & imperfectam, quam de
 eis habent cognitionem; & hoc amo-
 re ad eas perfectè discendas incitan-
 tur. Eidem sententiæ subscribunt Ab-
 bas Vercellensis, & alij Mystici, quos
 refert, & sequitur Seraphicus Bona-

L. c.

c. 3.

Thom.

1. 2. q.

27. art.

2. ad 2.

^h Itin. uetura ^h. Nec obstat illud Augustiniⁱ,
^{s.} ater. incognita non amari, quia non amat
 dist. voluntas omnino incognitum; imò
^{s.} i De vt ait Gregorius^k, [Amor ipse noti-
 Trinit. tia est.] Et sic debet intelligi comune
 l. 8. c. illud Mysticorum dictum; [Volun-
 4. & l. tas intrat, vbi intellectus foris stat.]
 10. c. quia amor mensuram cognitionis
 2. excedit, & extenuissima, atque ob-
 k Ho- securissima cognitione ingens amoris
 mil. flamma accenditur in voluntate, quæ
 27. in ideò penetrare dicitur suo acumine,
 Euang. quo non intrat intellectus. Non dici-
 l Palu- puto, an possit Deus de potentia ab-
 danus, soluta efficere, vt voluntas amet nul-
 Ochá. la prorsus cognitione præcedente:
 Tho- hoc enim controuersum est, nec de-
 mas de sunt qui partem affirmatiuam re-
 Argen- nent^l: sed dico de lege saltem ordi-
 tina, & naria non magis posse hominem in-
 alij ci- cognitum amare, quàm pingere su-
 tati à per inane. Talis quippe est natura
 Sandeo voluntatis, vt aliqua semper cogni-
 lib 2. tione indigeat, quæ faciem illi præ-
 myst. ferat, & ostendat quid appetendum.
 Theol. Ex his autem colligi potest quanta
 vbi hæc si mortalium infania^m. Amare Deum
 quæst. dum sumus in corpore, plus possu-
 diffuse tractat. mus,
 com-
 ment.
 6. exer-
 citat.

mus, quàm vel eloqui, vel cognoscere. Amando plus proficimus, minus laboramus, illi magis obsequimur. Malumus tamen semper quærèdo per cognitionem nunquam inuenire quod quærimus, quàm amando possidere. Bona quidem est scientia, sed multò melior dilectio: utilis cognitio, sed vtilior amor. Scientia sine charitate inflat, & nihil prodest; amor verò sine scientia sufficit ad salutem. Potest homo scientiam habere sine amore; at verò qui amat, quamuis scientiis careat humanitus acquisitis, plura tamen discet, quàm doceat humana sapientia, quia illum intus magistrum habet, qui docet hominem scientiam. Optimè Rogerius vir extaticus ex ordine Minorum, apud Aluarum Pelagium: [Quid, inquit, putas erit, si in intimo tuo intimus sit Deus? A quantis tenebris ad quantas duceris claritates per spiritum eius? Si illas, quæ in intimis illis siue internis secretis sunt, nosse intimas contemplationes, si illas lucidas illuminationes, si illos feruidos splendores, si illos

25. vñ
que ad
30. Vi-
de etiã
Alua-
rez to.
3. de
Orat.
lib. 4.
c. 8.
mpicus
Mirad.
lib. de
Ente &
Vno
c. 5.

Deplã-
ctu Ec-
clesiæ
lib. 2.
c. pe-
nult.

simplices radios, si illos puros fulgores, si illos viuificos ardores, si illos pacificos sapores, si illos delitiosos, imo delitiosissimos dulcores, si res incognitas & innominabiles, res tamen experimentales perfectè possideres. Ah homo, si hæc experimento nosses, puta quia, vt ego, tenebras ferres grauiter vitæ tuæ. Quando autem erit? Putasne videbo? Quando, quando, quando? Omnia in mora: nimium stenda hæc dilatio. Ah, ah, ah? Quid tibi sum ego, aut quid tu mihi, Deus meus? sed quid non mihi es? Hæc verba silentij sunt, nec extra silentium & Deum inueniri possunt, quia alibi non sunt. Vis hæc sentire? Attende quoniam nullus sic intrat, nisi prius excesserit; nec deficit, nisi prius introierit; nec transit, nisi prius defecerit; nec apprehendit, nisi prius transierit; nec transformatur, nisi prius apprehenderit; nec intuetur, nisi transformatio præcesserit; nec sic in illum amorem mouetur, nisi qui intus & valde intus fuerit; nec in beato illo silentio quietatur, nisi qui il-


lum beatum amorem nouerit.] Hæc
 Rogerius. Beatus vir, qui sic sentit,
 sic amat, sic afficitur. Verè dici po-
 test de diuina dilectione, quod olim
 de Sapientia; [Venerunt mihi om-
 nia bona pariter cum illa,] quia
 amor omnium bonorum fons est &
 origo. Quis igitur me separabit ab
 amore? Tribulatio, angustia, fames,
 nuditas, periculum, gladius, per-
 secutio? Dicam audacter cum Apo-
 stolo me certum esse, certam scilicet
 in Domino spem habere, quòd nulla
 creatura poterit me separare a chari-
 tate Dei, quæ est in Christo Iesu Do-
 mino nostro, cui cum Patre & Spiri-
 tu Sancto honor est, & gloria in cœ-
 lo & in terra, nunc & semper, & in
 secula seculorum. Amen.

Rom.
8.

FINIS.

Hunc deum amorem nonne? Hunc
 Rogatus. Beatus vir, qui se sentit
 deus, se afficitur. Veré dicitur
 est. I. deus dilectio, quod olim
 de sapientia; [Venerunt mihi om-
 nis bona pariter cum illa,] quia
 amor communis bonorum fons est &
 virtus. Omnis tamen me separabit ab
 amor; Tribulatio, angustia, fames,
 indies, periculum, gladius, per-
 ictio; Dicam subacti cum A. Ro-
 m. 8.
 Hic in carcerem esse, carcerem scilicet
 in domino spem habere, quod nulla
 creatura poterit me separare a chari-
 tate Dei, qui est in Christo Iesu Do-
 mino nostro, cui cum Patre & Spi-
 ritu Sancto honor est, & gloria in se-
 culum & in eternum, amen & semper, & in
 seculum seculorum. Amen.

him
Rog
de
te
de
nis
sin
at
no
and
lo
tho
in
cre
are
min
vi
h
le



Nog. 32. Kop. 30

Biblioteka Jagiellońska



stdr0023471



Ar.

Uet. Lat:

79° 50.